

Kememite'uti'iniatsie

'Ixaheri xiiyarimama kememite'uti'iniatsie

¹ Merikitsi Yawé Muitsexi kaniutahiawe, 'ixuriki tukiari manuwe, Tsinahi mirakutewa makumawetsie, mexiakame tukaritsie hutarieka metseriyaritsie, kepauka 'ixaheritsixi 'Ekipitu memayewitikié huta wiyari 'anuyemiekakuri. Mipai katinitahiawe:

² «Yunaime keniwaraka'utia mana kiekatari, 'Ixaheri xiiyarimama meta nuiwarimama yuxexuiti kememiyipapame, yunaime 'ukitsi kememitetetewa xewaraka'utiwati yuxexuime.

³ 'Eki, 'Aruni hamatia xekaniwaraka'utiaakuni 'ixaheritsixi waniwema yunaime 'ukitsi kuyaki 'aixia memi'anene, xeitewiyari wiyari memihitika.

⁴ 'Iki xemiwati'iniataki xeime xekanita'inikuni wa'ukiyari miki yuxexuime wanuiwaritsie mieme manuyeka.

Memihiritiarié memiwaka'utianiki

⁵ »'Iki mekanihikitini kemi'ane memixeparewieni:

Xuweni xiiyarimama hetsiemiemete, 'Eritsuxi Tserehuxi nu'aya,

⁶ Tsimehuni xiiyarimama, Tserumieri Tsurit-sarahi nu'aya,

⁷ Kura xiiyarimama, Nahatsuni 'Aminarawi nu'aya,

- 8 'Itsakaxi xiiyarimama, Natanaheri Tsuhaxi nu'aya,
 9 Tsawuruni xiiyarimama, 'Eriyawu Heruni nu'aya,
 10 Kutse nu'aya xiiyarimama hetsiemiemete: 'Eritsama 'Amihuri nu'aya, 'Epirahini xiiyarimama hetsiemiemete meta Manatsexu xiiyarimama Kamarieri Peratsuxi nu'aya,
 11 Wenikamini xiiyarimama hetsiemiemete, 'Awirani Kerehuni nu'aya,
 12 Rani xiiyarimama, 'Akihetsexu 'Amitsarahi nu'aya,
 13 'Atsexu xiiyarimama, Pakieri 'Ukirani nu'aya,
 14 Kahari xiiyarimama hetsiemiemete, 'Eriyat-sati Rehuheri nu'aya,
 15 Nepitahari xiiyarimama hetsiemiemete, 'Akira 'Enahani nu'aya».

16 'Iki mekanihikitini kiekatari memanuyeyaxe, memaka'utiarie nuiwarite kememitehiki meta kuyaxi 'Ixaheritsixi tewa'aitiwamete.

Memaka'utsie kememutipamerixi

17 Hiki Muietsexu, 'Aruni hamatia 'ukitsi mekaniiwarukuxerieni memiiwaraka'utianiki kememitetetewatika memanayexeyarie wahetsie,

18 hutarieka metseriyaritsie 'itsutiakaku yunaime kiekatari mekaniiwarukuxerieni. Yuxexuiti mekanaka'utsieni hakewa memeye-nunuiwaxi kemi'ane memitehaxiiyari. 'Ana mekanaka'utuarieni yunaiti 'ukitsi xeitewiyari wiyari memexeiyatika,

19 Muiťsexi yakatinikayani, Yawé kemítita'aitiakai. 'Iki Muiťsexi kaniwaraka'utiani Tsinahi 'uyeikati makumawatsie.

20 Xuweni xiíyarimama, 'Ixaheri matíarieya, mekanaka'utsieni kemi'ane memuteháníwema meta memítehaxiíyarima, kehepai memíte'ununuiwaxi. Yunaiti 'ukitsi xeitewiyari wiyari memihitika mekanaka'utíarieni kuyaxiki 'aixia memi'anenekai memiyíwawe.

21 Xuweni xiíyarimama huta tewiyari heimana 'ataxewi miriyari heimana 'auxíwi tsienituyari (46.500) 'ukitsi mekanakine.

22 Tsimehuni xiíyarimamata mekanaka'utsieni kemi'ane memuteháníwema meta kemi'ane memítehaxiíyarima, kehepai memíte'ununuiwaxi. Yunaiti 'ukitsi xeitewiyari wiyari memihitika mekanaka'utíarieni kuyaki 'aixia memi'anene.

23 Tsimehuni xiíyarimama huta tewiyari heimana tamamata heimana 'atanauka miriyari heimana haika tsienituyari (59.300) 'ukitsi mekanakine.

24 Kahari xiíyarimama mekanaka'utsieni kemi'ane memíteháníwema meta memítehaxiíyarima, kehepai memíte'ununuiwaxi. Yunaiti 'ukitsi xeitewiyari wiyari memihitika mekanaka'utsieni kuyaxiki 'aixia memi'anenekai.

25 Kahari xiíyarimama huta tewiyari heimana 'auxíwi miriyari heimana 'ataxewime tsienitu-

yari heimana huta tewiyari heimana tamamata (45.650) 'ukitsi mekanakine.

26 Kura xiiyarimama mekanaka'utsieni
kemi'ane memitehانيwema meta
memitehaxiiyarima, kehepai
memite'ununuiwaxi. Yunaiti 'ukitsi
xeitewiyari wiyari memihitikatei
mekanaka'utsieni kuyaki 'aixia memi'anene.

27 Kura xiiyarimama haika tewiyari heimana
tamamata heimana nauka miriyari heimana
'ataxewime tsienituyari (74.600) 'ukitsi
mekanakine.

28 'Itsakaxi xiiyarimama mekanaka'utsieni
kemi'ane memitehانيwema meta
kemi'ane memitehaxiiyarima, kehepai
memite'ununuiwaxi. Yunaiti 'ukitsi
xeitewiyari wiyari memihitikatei
mekanaka'utsieni kuyaki 'aixia memi'anene.

29 'Itsakaxi xiiyarimama huta tewiyari heimana
tamamata heimana nauka miriyari heimana
nauka tsienituyari (54.400) 'ukitsi mekanakine.

30 Tsawuruni xiiyarimama mekanaka'utsieni
kemi'ane memitehانيwema meta
kemi'ane memitehaxiiyarima, kehepai
memite'ununuiwaxi. Yunaiti 'ukitsi xeit-
ewiyari wiyari memihitika mekanaka'utsieni
kuyaki 'aixia memi'anene.

31 Tsawuruni xiiyarimama huta tewiyari
heimana tamamata heimana 'atahuta miriyari
heimana nauka tsienituyari (57.400) 'ukitsi
mekanakine.

³² Kutse xiɣarimama:

'Epirahini xiɣarimama mekanaka'utsieni
 kemi'ane memitehaniwema meta
 kemi'ane memitehaxiɣarima, kehepai
 memite'ununuiwaxi. Yunaiti 'ukitsi
 xeitewiyari wiyari memihitikatei
 mekanaka'utsieni kuyaki 'aixia memi'anene.

³³ 'Epirahini xiɣarimama huta tewiyari miri-
 yari heimana 'auxiwime tsienituyari (40.500) 'uk-
 itsi mekanakine.

³⁴ Manatsexi xiɣarimamata mekanaka'utsieni
 kemi'ane memitehaniwema meta
 memitehaxiɣarima, kehepai
 memite'ununuiwaxi. Yunaiti 'ukitsi
 xeitewiyari wiyari memihitikatei
 mekanaka'utsieni kuyaki 'aixia memi'anene.

³⁵ Manatsexi xiɣarimama xeitewiyari heimana
 tamamata heimana huta miriyari heimana huta
 tsienituyari (32.200) 'ukitsi mekanakine.

³⁶ Wenikamini xiɣarimama mekanaka'utsieni
 kemi'ane memitehaniwema meta
 memitehaxiɣarima, kehepai
 memite'ununuiwaxi. Yunaiti 'ukitsi
 xeitewiyari wiyari memihitikatei
 mekanaka'utsieni kuyaki 'aixia memi'anene.

³⁷ Wenikamini xiɣarimama xeitewiyari
 heimana tamamata heimana 'auxiwi miriyari
 heimana nauka tsienituyari (35.400) 'ukitsi
 mekanakine.

³⁸ Rani xiɣarimama mekanaka'utsieni
 kemi'ane memitehaniwema meta
 memitehaxiɣarima, kehepai

memite'ununuiwaxi. Yunaiti 'ukitsi xeitewiyari wiyari memihitika mekanaka'utsieni kuyaki 'aixia memi'anene.

³⁹ Rani xiiyarimama haika tewiyari heimana huta miriyari heimana 'atahuta tsienituyari (62.700) 'ukitsi mekanakine.

⁴⁰ 'Atsexi xiiyarimamata mekanaka'utsieni kemi'ane memitehaniwema meta memitehaxiiyarima, kehepai memite'ununuiwaxi. Yunaiti 'ukitsi xeitewiyari wiyari memihitikatei mekanaka'utsieni kuyaki 'aixia memi'anene memikamama.

⁴¹ 'Atsexi xiiyarimama huta tewiyari heimana xewi miriyari heimana 'auxiwime tsienituyari (41.500) 'ukitsi mekanakine.

⁴² Nepitahari xiiyarimama mekanaka'utsieni kemi'ane memutehaniwema meta memitehaxiiyarima, kehepai memite'ununuiwaxia. Yunaiti 'ukitsi xeitewiyari wiyari memihitika mekanaka'utsieni kuyaki 'aixia memi'anene.

⁴³ Nepitahari xiiyarimama huta tewiyari heimana tamamata heimana haika miriyari heimana nauka tsienituyari (53.400) 'ukitsi mekanakine.

⁴⁴ Merikite 'ipai yupaimetu mekanakine kepauka Muitsexi 'Aruni hamatia memiwaraka'utiatsie, mewaparewiekaku 'Ixaheri xiiyarimama tamamata heimana huta meyupaimetu, miki yuxexuiti yunuiwari hetsiemieme mekaniyiakaitini.

⁴⁵ Yunaiti 'ixaheritsixi xeitewiyari wiyari

memihitikatei, kuyaki 'aixia memi'anene
mekanaka'utsieni, kememiyupaimakai
nuiwarite.

⁴⁶ Yunaiti 'ixaheritsixi memaka'utsie,
'ataxewime tsienituyari heimana haika miriyari
heimana 'auxiwime tsienituyari heimana
huta tewiyari heimana tamamata (603.550)
meyupaimeti mekanakine.

Rewitsixi

⁴⁷ Rewitsixi teiteriyari mepikahaka'utiarie
hipame wahamatia,

⁴⁸ matsi Yawé Muitsexi mipai
mitiutahiaweikaiki:

⁴⁹ «Rewi xiiyarimama pepikawaraka'utiani,
'Ixaheri niwemama wahamatia
memikayutinininweniki.

⁵⁰ 'Aixia kaniyimiki, 'eki pemiwahiritianiki tiratu
tukita mayeka hepaitsita meta naime hepaitsita
ketipaimeti muwa mitiyepine kemitiyukumaiwa.
Rewitsixi Kakaiyari tukieya mepi'iwiyani
naime muwa mitiyepine. Yaxeikia yuheyemeki
muyepatsietsie mekatene'uximayakakuni
'ahurawa memakuteitsie meheitayeme.

⁵¹ Kepauka tukieya xemanukwenit-
sie rewitsixi xeikia mekanitaxinakuni,
kepauka memeitawewienitsie miki xeikia
mekaneyiakakuni. Kemi'ane 'ahurawa mauyani
tukieya manuka kamawari wewiwametiti
kanemimiki.

⁵² Yunaiti 'ixaheri teiteriyari yateewa
mekanikuyaxixiakuni yuxexuiti me'ukutetikaiti
yupatera mehexeiyatikaiti kememiteyunuiwari.

⁵³ Hiki rewitsixi tiratu tukita manuka 'aurie mekanikuyaxikuni, 'Ixaheri kwieyaritsie xeminuakaki kepauka Kakaiyari ha'ati wahetsie munuani. Meriki rewitsixi xeikia mekanihikitikakuni tiratu tukita hepaitsita tehiwemete».

⁵⁴ Hiki naimeki 'ixaheritsixi yamekatenikakine Yawé Muiťsexi kemitiuta'aitia.

2

Makumawetsie nuiwarite kememitekuyaxixi

¹ Merikitsi Yawé Muiťsexi 'Aruni mame mipai katiniwarutahiawe:

² »'Ixaheritsixi 'ixuriki tukiari manuwe memayutixexeiriwa 'aurie mekanayaxetikikuni yupatera mehexeyati meta yu'iniari, hepana meheutaneniereti, yuxexuiti kememiyupapaime nuiwarite.

³ »Tau manatineika 'aurie, mana mekanitiyaxikuni kemi'ane Kura memaweia, kememiyupapaime. Nahatsuni wa'ukiari kanihikitini 'Aminarawi nu'aya.

⁴ Yunaiti haika tewiyari heimana tamamata heimana nauka miriyari heimana 'ataxewime tsienituyari (74.600) 'ukitsi mekaniyupaimeni.

⁵ »Kura memakutei wa'aurie 'Itsakaxi xiiyarimama mekanitiyaxikuni. Natanaheri wa'ukiari kanihikitini Tsuhaxi nu'aya.

⁶ Yunaiti huta tewiyari heimana tamamata heimana nauka miriyari heimana nauka tsienituyari (54.400) 'ukitsi mekaniyupaimeni.

⁷ »Tapa pitata Tsawuruni xiiyarimama mekanikuyaxikuni. 'Eriyáwi wa'ukiyari kanihikitini Heruni nu'aya.

⁸ Yunaiti huta tewiyari heimana tamamata heimana 'atahuta miriyari heimana nauka tsienituyari (57.400) 'ukitsi mekaniyupaimeni.

⁹ »Yunaiti Kura xiiyarimama mekaniyupaimeni, xeitsienituyari heimana nauka tewiyari heimana 'ataxewi miriyari heimana nauka tsienituyari (186.400), miki mekananuyeyaxikuni.

¹⁰ »Tatsutiata Xuweni memaweiya yunaiti kememuyupame yupatera hetia mana mekanitiyaxikuni, 'iki yameyupaimeti. 'Eritsuxi wa'ukiyari kanihikitini Tserehuxi nu'aya.

¹¹ Yunaiti kuyaximama huta tewiyari heimana 'ataxewi miriyari heimana 'auxiwiwe tsienituyari (46.500) 'ukitsi mekaniyupaimeni.

¹² »Xuweni wa'aurie Tsimehuni xiiyarimama mekanitiyaxikuni. Tserumieri wa'ukiyari katinitewaka Tsuritsarahi nu'aya.

¹³ Yunaiti huta tewiyari heimana tamamata heimana 'atanauka miriyari heimana haika tsienituyari (59.300) 'ukitsi mekaniyupaimeni.

¹⁴ »Wa'aurieta mekanitiyaxikuni Kahari xiiyarimama. 'Eriyatsati wa'ukiyari kanihikitini Xehueri nu'aya.

¹⁵ Yunaiti huta tewiyari heimana 'auxiwi miriyari heimana 'ataxewi tsienituyari heimana huta tewiyari heimana tamamata (45.650) 'ukitsi mekaniyupaimeni.

16 »Yunaiti Xuweni xiiyarimama memakutei, me'iniariti kememuyupaime wanuiwarite, xeitsienituyari heimana huta tewiyari heimana tamamata heimana xewi miriyari heimana nauka tsienituyari heimana huta tewiyari heimana tamamata (151.450) 'ukitsi memuyupaime, miki hutariekatsie memiyehu.

17 »Merikite 'ixuriki tukiyari me'akweti rewit-sixi mekaniyekikakaitini yunaime wahixiapa memukutei. Yaxeikia mekateniyaxikuni kehepai memiteheukutekai yuxexuiti yuhuyeripa meta yupatera me'akweti.

18 »Tau makayuyuipiketsie yupatera hetia mekanitiyaxikuni 'Epirahini xiiyarimama, kehepai memiteheukununuiwa. 'Eritsama wa'ukiyari kanihikitini 'Amihuri nu'aya.

19 Kuyaximama nauka tewiyari miriyari heimana 'auxiwime tsienituyari (40.500) 'ukitsi memuyupaime.

20 »'Epirahini 'aurieta mekanitiyaxikuni Man-atsexi xiiyarimama. Kamarieri wa'ukiyari kanihikitini Peratsuxi nu'aya.

21 Kuyaximama xeitewiyari heimana tamamata heimana huta miriyari heimana huta tsienituyari (32.200) 'ukitsi mekaniyupaimeni.

22 »Xaitsieta mekanitiyaxikuni Wenikamini xiiyarimama. 'Awirani wa'ukiyari mihiki Kerehuni nu'aya.

23 Yunaiti xeitewiyari heimana tamamata heimana 'auxiwi miriyari heimama nauka tsienituyari (35.400) 'ukitsi mekaniyupaimeni.

²⁴ »Yunaiti kuyaki memiyiwawe 'Epirahini 'aurie memukutei, yunaiti me'iniariti yameyupapaiyeti, xeitsienituyari heimana 'atahaika miriyari heimana xeitsienituyari (108.100) 'ukitsi, miki mekaniyehuni hairiekatsie.

²⁵ »Tayeta mekanitiyaxikuni Rani xiyyarimama, kememiyupaiye. 'Akihetsexi wa'ukiyari kanihikitini 'Amitsarahi nu'aya.

²⁶ Mekaniyupaiyeni yunaiti haika tewiyari heimana huta miriyari heimana 'atahuta tsienituyari (62.700) 'ukitsi.

²⁷ »Rani 'aurieta 'Atsexi xiyyarimama mekanitiyaxikuni. Pakieri wa'ukiyari mihiki 'Ukirani nu'aya.

²⁸ Yunaiti huta tewiyari heimana xewi miriyari heimana 'auxiwi tsienituyari (41.500) 'ukitsi memihiki.

²⁹ »Wa'auriepaita mekanikuyaxikuni Nepitahari xiyyarimama. Wa'ukiyari pihiki 'Akira 'Enahani nu'aya.

³⁰ Yunaiti mekaniyupaiyeni huta tewiyari heimana tamamata heimana haika miriyari heimana nauka tsienituyari (53.400) 'ukitsi.

³¹ »Yunaiti memuta'inierie kuyaxi Rani 'aurie mekanikuyaxe, yunaiti xeitsienituyari heimana huta tewiyari heimana tamamata heimana 'atahuta miriyari heimana 'ataxewime tsienituyari (157.600) 'ukitsi mekaniyutipaimere, miki wa'utimake mekanayekinikuni yupatera me'akweti».

³² Merikite 'iki mekanihikitini 'ixaheritsixi

waniwema memaka'utiarie kuyaxiki
 memiyiwawe kememiyupapaimekai. Yunaiti
 Kuyaxi memuta'inierie yuxexuiti 'ataxewi
 tsienituyari heimana haika miriyari
 heimana 'auxiwi tsienituyari heimana huta
 tewiyari heimana tamamata (603.550) 'ukitsi
 mekaniyutipaimere.

³³ Peru Rewitsixi hipame 'ixaheritsixi wama-
 hatia mepika'utiniitiarie, Yawé Muitsexi kemu-
 tiuta'aitiakai yapitiuyi.

³⁴ Hiki 'ixaheritsixi Yawé Muitsexi mipai
 kemitiutahiawekai yamekatenikakine:
 kememiyupapaimekai 'axeikia
 mekanikuyaxikekaitini yupatera mehex-
 eiyatikaiti meta memayekikakaitsie
 kememite'ununuiwaxi mipai mekate-
 nayekikakaitini 'iwamarixi xeinuiwaritetsie
 miemete.

3

Rewi xiɣarimama

¹ Merikite 'Aruni niwemama mipai mekate-
 naka'utiarieni Muitsexi hamatia, kepauka Yawé
 Muitsexi hamatia mitiutixa Tsinahi hiriyaritsie.

Mawari wewiwamete

² Mipai mekatenaka'utiarieni ke-
 memitetetewakai 'Aruni niwemama: Narawi
 matiarimieme, 'Awihu, 'Eriyatsaxi meta 'Itamaxi
 'imatireme.

³ Miki 'Aruni tɣriyamama memanayexeiyarie
 memipatsie mekanihikitini, mawari wewi-
 wamete te'uximayatamete memakineki.

4 Narawi 'Awihu matiari mekaniukwini Yawé hixie, kepauka makumawetsie Tsinahi mirakutewa memu'uwakai, mawari taiyariyari mekaniwaruwewirieni yakixeikia mihiki. Matsi Narawi 'Awihu hamatia tiiri memikawarayexeiki, 'Eriyatsaxi 'Itamaxi hamatia xeikia mekani-mawari wewiwametetikaitini yupaapa tukarieya hepaitsita, 'Aruni hetsiemieme.

Rewitsixi kememite'uximayata

5 Yawé Muitsexi mipai katiniutahiawe:

6 «Rewi xiyarimama keniwawitimie 'Aruni hixie keniwati'uitia. Rewitsixi mekaniparewikuni mira'uximayatsie.

7 'Aruni kemitiyurienekai yamekateniyuriekakuni hetsiena mieme meta yunaiti mana kiekatari, mewahiritiati memite'uximayakaki miki 'ixuriki tukiyarita.

8 Naime muwa mitiypine 'ixuriki tukiyarita mekateni'iwiyakakuni, muwa mete'uximayati 'ixaheritsixi, yamemiteyuriekaki memite'uximayakaki meyhiritati 'ixuriki tukiyarita.

9 'Aruni, rewitsixi pekaniwahiritiamiki mitiwata'aitianiki meta waniwema. Miki xeikia mekanihikitikakuni nehetsiemieme memite'uximayaka 'ixaheritsixi watsata.

10 'Aruni niwemama mawari wewiwame-teki xeikia mekaniwaranayexeyakuni. Kemi'ane kamawari wewiwameti 'ixuriki tukiyarita miye'ani miki kanimieriemiki kareuyehiwiarieti».

Rewitsixi kememite'anayexeyarie

11 Yawé Muitsexi mipai katiniutahiawe:

12 «Ne 'Ixaheritsixi wanuiwaritsie rewitsixi nekaniwaranuyexeiya, matiari nunuiwakate wahepai. Rewitsixi nehetsia miemete mekanihikitini,

13 matsi matiari nunuiwakate nehetsia miemete memihikiki. Kepauka 'Ekipitu matiari nunuiwakate nemiwarutayuniyaxitsie, 'ana nekaniwarupata nehetsia memimiemetetini matiari nunuiwakate 'ixaheritsixi teiteriyari, teiteri meta tewaxi. 'Ayumieme hiki nehetsia mekanimiemetetini. Ne Yawé mekanihikitini».

Rewi xiïyarimama kememite'uti'iniatsie

14 Merikitsi Yawé Muitsexi mipai katiniutahiawe Tsinahi makumawetsie paiti:

15 «Rewi xiïyarimama meta nuiwarimama kememiyupapaime keniwaraka'utia, yunaime 'ukitsi xeimetseri memexeiyatika mana meutiyune».

16 Hiki Muitsexi kanitsutiani waraka'utiwati, Yawé kemirehiawekai yakatinikayani.

17 Rewi niwemama mepihiki:

Keritsuni, Kuhati meta Merari.

18 Keritsuni nuiwarimama memaki:
Riwini hamatia Tsimi.

19 Kuhatitsixi memihikitikai:

'Amirani, 'Itsaxi, Hewuruni meta 'Utsiheri.

20 Merari nuiwarimama:

Makiri meta Mutsihi.

'Iki mekanihikitini rewitsixi wanuiwarima, memaka'utsie kememite'ununuiwaxi.

Kerutsunitsixi memihiki

21 Keritsuni hetsie memiyenunuiwakai Riwini mekanihikitini Tsimi hamatia. 'Iki kerutsunitsixi memiwaraweiyakai mekanihikitini.

22 Yunaime 'ukitsi xeimetseri memexeiyatika mana meutiyune, 'atahuta miriyari heimana 'auxiwi tsienituyari (7.500) 'ukitsi meyupaimeti mekanakine.

23 Keritsuni nuiwarimama memihiki tau manukayuyupike 'aurie mekanikutekaitini tuki manuwe hetia.

24 Keritsuni nuiwarimama wa'ukiyari 'Eriyat-sati kanihikitikaitini Raheri nu'aya.

25 'Ixurikite tukiyari hetsiememe, Keritsuni nuiwarimama mekanihiritiariiekaitini tuki manukanakaiki mireutahakitiretsie, nawi manukawere 'ixurikite heima,

26 'ixuriki kuraruyari takwa maka meta 'ixuriki meuwu kuraru kiteniyaritsie meta mawari taiyame warita makatei, yaxeikiata tinaime kimana mirakuwewire memitekumaiwakai.

Kuhatitsixi memiwaraweyakai

27 Kuhati hetsie mepiyeki 'Amirani nuiwarimama, 'Itsaxi nuiwarimama, Hewuruni nuiwarimama meta 'Utsiheri nuiwarimama. 'Iki Kuhati nuiwarimama mepihikitikai,

28 memite'uximayakai tukita. Yunaime 'ukitsi xeimetseri memexeiyatika mana meutiyune, 'atahaika miriyari heimana 'ataxewi tsienituyari (8.600) mekaniyupaimekaitini 'ukitsi.

29 Kuhati memaweyakai tuki manuwe tserieta mekanititekaitini.

30 Kuhatitsixi kememiyupaimekai 'Eritsapani wa'ukiyari kanihikitikaitini 'Utsiheri nu'aya.

31 Miki mekanihiritiariiekaitini tukita kakuni, mexa, kixeme, mawari taiyameta, tukita mirayepine xakirite, watsute, 'itite miki mepitekumaiwa meta 'ixuriki waikawa

muyepatsieta meuwikai, yaxeikia naime tita
mireuyewekai memite'uximayakaki.

³² Rewitsixi wa'ukiyari yemeki 'Eriyatsaxi
kanihikitikaitini 'Aruni nu'aya mawari wewi-
wame, miki mihiritiariekaiki tuki muyepatsieta
mitiwa'aitiakaki miwa'ukiyaritikaiki.

Meraritsixi memiwaraweiya

³³ Merari hetsia miemete Makiri hamatia Mut-
sihí mekanihikitini. 'Tki mekanihikitini Merarit-
sixi nuiwarimama.

³⁴ Yunaima 'ukitsi xeimetseri memexeiyatika
mana meutiyune, 'ataxewime miriyari
heimana huta tsienituyari (6.200) meyupaimeti
mekanakine 'ukitsi.

³⁵ Meraritsixi wa'ukiyari Tsurieri
kanihikitikaitini 'Awikahiri nu'aya. Mer-
ari nuiwarimama tuki manuwe 'utata
mekanikutekaitini.

³⁶ Miki mekanihiritiariekaitini
memitetimawaniki, tatsiari tukitsie
miranuyehipite, mexa hetsiena ma'uni, meta
muka'utika meta tinaiti muwa mitiyepine
mitiyukumaiwa.

³⁷ Yaxeikia kiyexi muka'utika
mekani'iwiyakaitini meta tekiapai maheitikatei
naime makuwutikatei kaunariyari.

Rewi xi'iyarimama

³⁸ Muitsexi 'Aruni hamatia meta waniwema
yunaiti 'ixuriki tukiyari hixie mekanititekaitini,
tatsiari tau manatineika 'aurie, 'ixuriki tukiyari
memihiritiariekaiki 'ixaheritsixi wahetsiemieme
memiwayetuayaniki. Peru kemi'ane kamawari

wewiwametiti mana 'ahurawa miye'ani, miki mekanitakwikwiwakaitini.

³⁹ Muitsexi 'Aruni hamatia rewitsixi mekaniwaruka'utiani Yawé kemitiwaruta'aitiakai tiwarutaxatiaka. Yunaiti rewitsixi xeimetseri memexeiyatika huteiki mauiyune mekanaka'utsieni, kememiyupapaimekai mekaniuti'ani xeitewiyari heimana huta miriyari (22.000) meyupaimeti mekanakine 'ukitsi.

Rewitsixi meta matiari miemete

⁴⁰ Merikitsi Yawé Muitsexi mipai katiniutahiaawe: «Keniwaruka'utia yunaime 'ixaheritsixi matiari miemete 'ukitsi xeimetseri memexeiyatika mana meuiyune kememitetetewa pewaraka'utiwati.

⁴¹ Yunaiti rewitsixi nehetsiemieme mepakine 'ixaheritsixi matiari miemete wahetsiemieme, metatsiere rewitsixi watewama, 'ixaheritsixi watewama matiari miemete wahetsiemieme. Ne Yawé nekanihikitini».

⁴² Muitsexi 'ixaheritsixi kaniwaruka'utiani matiari miemete, Yawé kemitita'aitiakai.

⁴³ Yunaiti me'iniariti 'ukitsi xeimetseri memexeiyatika mana meuiyune, mexiakate memaka'utsiwakai kememitetetewa xeitewiyari heimana huta miriyari heimana huta tsienituyari heimana haika tewiyari heimana tamamata heimana haika (22.273) mekaniuyutipaimere 'ukitsi.

⁴⁴ Hiki Yawé Muitsexi mipai katiniutahiaawe:

⁴⁵ «Yunaiti rewitsixi nehetsiemieme mepakine 'ixaheritsixi matiari miemete wahetsiemieme, metatsiere rewitsixi watewama, 'ixaheritsixi watewama matiari miemete wahetsiemieme.

Rewitsixi nehetsiemieme mepakine. Ne Yawé nekanihikitini.

⁴⁶ »Para pemiwatawikweitsitia niki huta tsienituyari heimana haika tewiyari heimana tamamata heimana haika (273) mexiakate 'ixaheritsixi, rewitsixi memikayuwaikawaki,

⁴⁷ pekaniyetuamiki 'auxiwime tumini pirata raheteme yuxexuime wahetsiemieme, tukita mieme tumini kemirahete, tamamata heimana xewi kiramuyari pirahete.

⁴⁸ Miki tumini yunaima pekaniwayetuiiemiki 'Aruni meta niwemama, 'ixaheritsixi kepemitiwarutawikweitsitia memuti'iniatsietsie memiyumiirekaiki».

⁴⁹ Hiki Muitsixi miki tumini kananu'ini 'ixaheritsixi wahetsiemieme, rewitsixi memikayuwaikawakaiki.

⁵⁰ Kaniuku'ini, xeimiriari heimana haika tsienituyari heimana haika tewiyari heimana 'auxiwi (1.365) tumini piratayari, kemitini'iniatakai tumini tukita mieme.

⁵¹ Hiki kaniyetuani miki tumini 'Aruni hetsia meta niwemama wahetsia, yemeki Yawé kemitita'aitia.

4

Kuhatitsixi kememiteyurieka

¹ Merikite Yawé Muitsixi 'Aruni mame mipai katiniwarutahiawe:

² «Rewitsixi xekeniwaraka'utia, Kuhati nuiwari-mama meta hetsiena memiyeki.

³ Yunaima xekeniwaraka'utia xetewiyari heimana tamamata wiyari huteiki meheutiyuneme, huta tewiyari heimana

tamamata wiyari me'uti'akame 'ukitsi
'aixia memi'anene 'ixuriki tukiyarita
memite'uximayakaki.

⁴ »Kuhatitsixi tehiwemete mekanihitakakuni
'ixuriki tukita mitiyepine kwinimieme
mitimaiwetika hepaitisita piinitiarika.

⁵ Kepauka 'ixaheritsixi memayekinetisie, 'Aruni
yuniwemati 'ixuriki tukita mekaneutahaxiakuni
mekaneixinakuni 'ixuriki meuwie memeiku-
naniki kakuni tiratuyari maukunakaki.

⁶ 'Ariketa ketsi 'amipa nawiyarieya
mekaneikunakuni meta tuwaxaki miyitsikimaiye,
kiyexita mekananukutuakuni kimana
memikukwetiweniki.

⁷ »Yawé hixie mexa muwe 'ixuriki
miyitsikimaiye mekananakawerakuni, mana
mekatenapikuni xakirite, pateyute yakimipepe,
tekixite, ye'irite 'aminene kaxie winuyari
mitiyeuriwa mawariyari yunikame. Yaxeikiata
paa mana kanamakamiki yuheyemeki
mimawarie.

⁸ Naime 'iki wahetsie xekanenukawerakuni
'ixuriki mixetaki. Yaxeikia mexa ketsi
'amipa nawiyarieya xekanenukanakuni
meta kiyexita mekananukutuakuni kimana
memikukwetiweniki.

⁹ »Xeime 'ixuriki miyitsikimaiyeki kixeme
'uitiwame meta kixemete, titikime, naxi yetsame
meta naime tita mitiyukumaiwa hatseitiki
xekatenanukanakuni.

¹⁰ Hiki xekanenukanakunita kixeme 'uitiwame
meta naime mana timieme ketsi 'amipa nawi-
yarieya, kaxetatsie xekaneikayekuni.

11 »Meta 'ixuriki miyitsikimaiye, miratimawati re huruki xeikia miwewiya xekanenukaweriekuni metatsiere ketsi 'amipa nawiyarieyaki, kiyexita xekananukutuakuni kimana mukukweiyeneniki.

12 »Xekanita'eimakuni 'ixuriki miyitsikimaiyeki naime tita mitiyukumaiwa 'ixuriki tukita, heimana ketsi 'amipa nawiyarieyaki xekanikanakuni meta kiyexitsie xekaniyehiakuni manitikieniki.

13 »Mitiwatitaiyariwatsie naxi xekaneyayewi-wikuni, 'ana 'ixurikiki kwimixetaki xenita'eimakuni.

14 Hetsiena xekatenikapikuni naime tita mana mitiyukumaiwakai, ti muiname, tepia manixite, 'iti 'amipa, tekixite ye'irite 'aminene, meta naime tita mana mitiyukumaiwa. Hiki heimana ketsi 'amipa nawiyarieyaki xekanenuka'eimakuni meta kiyexi xekananuye'uitiakuni para mikutikieneni.

15 »Kepauka 'Aruni yuniwema wahamatia memitinini mete'anukanarimati naime, hiki 'anake 'ixaheritsixi mekaniyehuni. 'Ana kuhatitsixi mekanenitikuni tuki, perutsi meka'ikumaiwati nikahirixie me'ukwiniki. Yaxeikiata muwa 'ixuriki tukita mirayepine mekatenanutikuni.

16 »Hiki, 'Eriyatsaxi 'Aruni nu'aya, kanihiritariiekamiki hatseiti kixeme hetsiemieme 'ikwa witsimu'ia meta tiriku mawariyari hetsiemieme meta hatseiti mitiyupata. Metatsiere 'ixuriki tukita ti'iwiyame kanihikitikamiki meta naiti muwa mitiyepine».

17 Yawé Muietsexi 'Aruni mame mipai katini-warutahiawe:

18 «Kuhati hetsie memiyeki xekeniwa'iwiyani para Rewi nuiwarimama memikaheuyewautseniki.

19 Kepauka 'ahurawa memikikanitsie mitimaiwetika hetsie, memikakukukuweniki mipai xekateniyuriekakuni: 'Aruni yuniwema wahamatia mekaniwaranayexeiyakuni, yux-exuime kememiteyurieka meta memite'anitiniki.

20 Peru kuhatitsixi mepikatetixexeiyani piinite mitimaiwetika 'etsiwa tima, kapa me'ukwiniki».

Kerutsunitsixi kememite'uximayata

21 Merikite Yawé Muitsexi 'Aruni mame mipai katiniwarutahiawe:

22 «Xekeniwaraka'utiata Keritsuni nuiwarimama, wanuiwarima yunaime xewa'iniatati kememiyupapaime.

23 Yunaime xekeniwaraka'utia xetewi-yari heimana tamamata wiyari huteiki meheutiyuneme, huta tewiyari heimana tamamata wiyari me'uti'akame 'ukitsi 'aixia memi'anene 'ixuriki tukiyarita memite'uximayakaki.

24 »Keritsuni nuiwarimama tetikimete mehiritiarieti mekateni'uximayakakuni.

25 'Ixuriki tukiyaritsie timieme xepite'anutini, memayutixexeiriwa heima manukawerire, ketsi 'amipa nawiyarieya manukawerire heimana meta 'ixuriki mirewatixaxatsiwa memanutakikatsie meuwie.

26 'Ixuriki kuraruyari takwa maka meta 'ixuriki meuwi kuraru kitenieyaritsie mepite'anutini meta takwa mieme maka, yaxeikiata tinaime muwa mitiyukumaiwa kimana mirakuwewire memitekumaiwakai.

27 'Iki naiti 'uximayatsika memite'anitini
mitiyukumaiwa, yatini 'ixuriki tukita xika
meteta'uximayatakuni, 'Aruni meta niwemama
wahetsia xeikia xekaniywawekuni. Miki xeikia
yamehaitikaikaku piyiwani miranutikieni.

28 Kepauka memite'uximayaka Keritsuni
nuiwarimama 'ixuriki tukiari memayutix-
exeiriwatsie, 'Itamahi 'Aruni nu'aya mawari
wewiwame kaniwataxeiyakamiki.

Meraritsixi kememite'uximayakai

29 »Xekeniwaraka'utia Merari xiuyarimama,
wanuiwarima yunaime xewa'iniatati
kememiyupapai.

30 Yunaime keniwaraka'utia xetewiari
heimana tamamata wiyari memexeyatika
huteiki meutiyune meta huta tewiari
heimana tamamata wiyari me'uti'akame,
'ukitsi memiyiwawe 'ixuriki tukiari
memite'uximayakaki.

31 Miki mekanihiritariiekaitini
memitetimiwani, tatsiari tukitsie
miranuyehipite, mexa hetsiena ma'uni, meta
muka'utika meta tinaime muwa mitiyepine
mitiyukumaiwa,

32 yaxekiatu takwa warita ma'utiyeika,
muka'uwe, manukuhipite meta kimana
mahiaretiyeika naime tita mitiyikimaiwa
waikawa mireuyewetse. 'Eki yapeti-
wakihiawekaku kehepai memiteyurieka
yuxexuti tita memite'anutixiani.

33 Merari nuiwarimama memite'uximayakatsie
'ixuriki tukita memayutixexeiriwatsie, 'Itamahi

waxexeyame pihikitini mawari wewiwame 'Aruni nu'aya».

Kuhati maremama kememite'uti'iniatsie

³⁴ Muitsexi 'Aruni hamatia meta 'ukirawet-sixi memanuyetei, Kuhati nuiwarimama mekanwaruti'iniata kememiyupapame.

³⁵ Mekanaka'utsieni yunaiti xeitewiyari heimana tamamata wiyari meutiyune meta huta tewiyari heimana tamamata wiyari me'uti'ati, 'aixia memi'anene 'ixuriki tukiyarita memite'uximayakaki.

³⁶ Yunaiti me'iniariti miki nuiwari mekanakine huta miriyari heimana 'atahuta tsienituyari heimana huta tewiyari heimana tamamata (2.750) 'ukitsi.

³⁷ Mipai meyupaimeti mekanakine Kuhati nuiwarimama memite'uximayakaki 'ixuriki tukita, memiwaruti'iniataxi Muitsexi meta 'Aruni, Yawé kemitiwaruta'aitiakai.

Keritsuni nuiwarimama kememite'aka'utiarie

³⁸ Mekanaka'utsieni Keritsuni maremama kememiyupapaimekai nuiwari.

³⁹ Mekanaka'utsieni yunaiti xeitewiyari heima tamamata wiyari meheutiyuneti meta huta tewiyari heimana tamamata wiyari me'uti'ati 'aixia memi'anene 'ixuriki tukiyarita memite'uximayakaki.

⁴⁰ Yunaiti me'iniariti miki nuiwari mekanakine huta miriyari heimana 'ataxewime tsienituyari heimana xeitewiyari heimana tamamata (2.630) 'ukitsi.

⁴¹ Mipai yupaimeti mekanakine Keritsuni maremama 'ixuriki tukita memiteta'uximayata,

Muitsexi kememite'waruti'iniataxi 'Aruni hamatia, Yawé kemitiwaruta'aitia.

Merari maremama kememite'uti'iniatsie

⁴² Merari xiiyarimama mekanaka'utsieni kemiyupapaimakai nuiwarite.

⁴³ Yunaiti mekanaka'utsieni 'ukitsi xeitewiyari heimana tamamata wiyari meutiyune meta huta tewiyari heimana tamamata wiyari me'uti'ati, 'aixia memi'anene 'ixuriki tukiyarita memite'uximayakaki.

⁴⁴ Yunaiti me'iniariti mekanakine haika miriyari heimana huta tsienituyari (3.200) 'ukitsi.

⁴⁵ Mipai meyupaimeti mekanakine memaka'utsie Merari nuiwarimama, Muitsexi meta 'Aruni kememite'waraka'utia, Yawé kemitiwaru'aitiakai.

Kememite'uni

⁴⁶ Muitsexi meta 'Aruni hamatia, meta memanuyetei 'ixaheritsixi mekanikwaruti'iniata rewitsixi kehepai memite'ununuiwaxi kemi'ane memitehanuiwari.

⁴⁷ Yunaitiri me'iniariti 'ukitsi xeitewiyari heimana tamamata mehautiyuneti meta huta tewiyari heimana tamamata me'uti'ati 'aixia memi'anene 'ixuriki tukiyarita memite'uximayakaki meta memite'anutiniki,

⁴⁸ mekanakine 'atahaika miriyari heimana 'auxiwime tsienituyari heimana nauka (8.580) tewiyari.

⁴⁹ Yawé, Muitsexi kemitiutahiawixi, yuxexuiti yamekateniuta'aitiarieni kememite'yuriekakekai meta tita memite'utitikinikekai.

Mipai mekatenaka'utsieni Yawé Muite sexi
kemi tiuta'aitiakai.

5

Memakuteitsie kememite'itiyaka

¹ Hiki Yawé Muite sexi mipai katiniutahiawe:

² «'Ixaheritsixi mipai ketiniwaruta'aitia kemi'ane
kati'itiyakame mitimayiani haiya yunawiyarit-
sie memexeiyatika yuhetsia memiwarayeni'aniki,
yatini timikime mitiumayiani, yatini mikumayia
xeime piniya 'uhanitsitiakame.

³ Tsepaneti 'ukitsi meta memi'ukari,
xemakuteitsie pekaniwarayeni'amiki, para
memikaxewiriekaki mana xemakuteitsie xeme
neteiterima».

⁴ Hiki mipai mekateniuyurieni 'ixaheritsixi
memakuteitsie mekaniwarayeni'ani, Yawé
Muite sexi kemirehiawekai ti'aitiati.

Kemiranuyeyani 'axatiuyurieme

⁵ Yawé Muite sexi mipai katiniuta'aitiani

⁶ 'Ixaheritsixi mipai mitiwatahiaweki:
«Kemi'ane 'uki yatini 'uka, yu'iwa 'axamuyuri
yatini mitinawatsiri, ne Yawé nehixie
'axakatiniuyurieni 'ayumieme yukimana
katinayukatamiki.

⁷ Kaniyutahekiatamiki ke'axamitiuyuri,
meta katinekapitiamiki kemi'ane 'axamuyuri
'auxiwimexia 'anamanekame kaniyetuiriemiki.

⁸ Peru xika miyami ranuyetia 'iwamama
me'umaweni, mitiyetuiyani Yawé hetsiemieme
katinayeimiki mawari wewiwame katiniye-
tuiriyariemiki, muxa 'uki heutinikame
mitimawarieniki 'axamitiuyuriki.

9 Naiti mawari 'ixaheritsixi memiyetuaya mawari wewiwame hetsia miki hetsiena mieme katinihikiti.

10 Kemi'ane yikimana mitiupata miki katinihetsienamiemeyaritini, peru mawari wewiwame tita mutiyetuiriyariwa katinipiinieyatini».

'Iniariki 'itetsarika hetsiemieme

11 Yawé Muiťsexi mipai katiniuta'aitiani

12 'ixaheritsixi mipai mitiwatahiaweiki: «'Iniariki tetekuxatati, xewiti 'uka 'aixia tiwikietiti xaitsie kaneukuyune yikina 'aixia 'iyari kapawitikikai

13 xeime hamatia huneti, 'iniariki tetekuxatati kename kahahekia miyamiyane, miki 'awie mukahuiki, meta xewiti mikarakumateki memika'uxeiyarieki mipaimeyati.

14 Xika kinaya 'itetsarikaya hetsiena ye'ani mipai retimani kename 'iyaya mayiya, tsepa mika'ukumayiya,

15 hiki nenuwitimiki mawari wewiwame hetsia, harina tsewarayari huta kiruyari kanitimawamiki hetsienamieme. Mawarika hetsie hatseiti pikaheutitu'ani meta 'ikwa witsimu'ia, 'itetsarika hetsiemieme mitiyaneki, hatsi mawarikayari 'axamiti'ane mitihekiareki.

16 »Mawari wewiwame Yawé hixie 'ukaratsi kananuwitimiki,

17 haa mipatsie tekixita kaniukatuamiki, 'etsi-wata kwie kaniukawiwimiki tukita mieme.

18 Hiki Yawé hixie kanenuwitimiki, kipaya kanikuxinamiki, 'iyaritarika mawariyari katinipitiamiki, mawari wewiwame mexi tekixi 'ahana 'axami'ane matsiwi muyema.

19 Hiki mawari wewiwame 'uka yuriki mipai katinitahawimiki: “Xika 'akina matsi'awitikikaku

xeime hamatia pekakahuiweni, xika 'axami'ane peka'anukuweiyaweni, 'iki haa matsiwi 'axami'itiarie 'atsipikamatsiyurieni.

²⁰ Peru xika 'akina pehexeiyatiti pe'iku'eirieni, 'axapekani'ayurieni 'akimana xeime pita hamatia 'uki pehuimiti

²¹ —'ena mawari wewiwame 'ukaratsi yuriki yakatinitahiwimiki—, Yawé, 'ahetsie 'axamiti'ane ke'ukawiwieni kemaine 'ahetsiemieme, pekaniweweme kematsi'ayeitiani, 'aniweyame ke'utahani.

²² Kepauka 'iki haa pamanuhareni, 'ahuka ke'utahairiya, pekaniweweme kematsi'ayeitiani". 'Ukaratsi mipai ke'utayini: "Aixia pi'ane. Mipai ketiyyini kemitinake".

²³ »Mawari wewiwame 'iki 'axami'ane xapatsie kaneka'utiamiki, haa matsiwi 'ukaratsi menuhareni 'aixia katiniyurimiki.

²⁴ Hiki 'ukaratsi haa matsiwi kana'itiamiki het-siena mikayuneki waikawa mitikwinitianiki.

²⁵ »Mawari wewiwame mawarika katinanupimiki 'itetsarika hetsiemieme. Katiniti-mawamiki Yawé hixie mawari matitaiyariwatsie,

²⁶ xeimamayari kananatitikimiki hatsi mititaiyaki mawari taiyametsie Yawé me'eriwaniki. 'Anakeri 'ukaratsi haa kananu'itiamiki.

²⁷ Kepauka miki haa manuhareni 'axami'itiarie, xika yukina 'aixia 'iyari kahawitikikaitini, hukaya kanitahaimiki kaniweweti kanayeimiki. Mipai miki katinikwinitiarimiki hipame wahixie.

²⁸ Xikata hawaiki mipai ka'utiyini, xika 'aixia tiuyeikakaitini, 'ana miki 'atsipikayini, tiniweyati kanayeimiki.

29 »'Iki 'iniari kanihikitini 'itetsarika hetsiemieme, kepauka 'ukaratsi yukina minanaimani, 'axakaniyuyurimiki yikimana xeime hamatia pita mikahuiki,

30 kepauka kinaya 'itetsarika hexeiyati mayani meta yu'iya mitixeimani. Mawari wewiwame 'ukaratsi Yawé hixie 'enuwitime 'iki 'iniari kaniwewiriemiki kemire'uxa.

31 Kinaya tixaiti hetsiena pikarahiyani, 'ukaratsi hirixia tiuka'eniwati kanayeimiki miya mitiuyuriki».

6

Aitsika memiyihiritia wahetsiemieme

1 Yawé Muiťsexi katiniuta'aitiani

2 'ixaheritsixi mipai mitiwatahiaweki: «Xika xewiti 'uki yatini 'ukaratsi natsareyuki yihiritiamikini, Yawé hixie yake'utayini,

3 miki kaxie winuyari pikaye'eni matsiwi meta kwinimieme miratsiwi. Meta hipame winu, kaxie hayari, kaxie takariyari mipatsarutsietika pikakwa'ani.

4 Mexi kexemite'uxa 'areutewini natsareyu hepai, kaxie takariyari xepikakwa'ani meta kararayari hatsiyari nitima.

5 »Mexi 'areutewini Yawé hetsiemieme patsieti, tatsiari natsareyu hepai pitimatsiikini, yaxeikiata pika'ikaxikani yukipa matsi kanihayewakamiki mitiwawereki meta puyukweriwayurieka 'itiyati.

6 »Kepauka mipai 'aneti muyeikani Yawé hixie, miki manukatsie 'ahurawa pika'uyeikani,

7 tsepa paapaya, maamaya, mutaya, kurieya memukwi. Miki waheki ka'iyati

pikahayuyeitiwani, matsi mipai pikayianeni Yawé 'iniarieya mexeiyaki yumu'utsie.

8 Kepauka patsieti 'amuyeikani Yawé hetsiemieme, yu'itieti kaniuyeikamiki patsieti.

9 »Xika 'atsikara'eriwakaku xewiti 'auriena 'umini, yumu'utsie kemitiipatsiekai mipai ka'aneti kanayeimiki, 'atahuta tukari heutineyu, kepauka mi'itiyanitsie, 'ana naime yumu'utsie kaniyukaximiki.

10 'Atahaika tukari heutineyu yuhutame kukuruxi kaniwaranitikimiki yatini haimixi, mawari wewiwame kaniyetuiriemiki 'ixuriki tukiari miranutahakitiretsie muka memayutixexeiriwatsie.

11 Miki xeime mawari wewiwame kanitimawamiki 'itiya mawariyari meta hipame mawari taiyariyari mihikitiniki. 'Ana mawari wewiwame natsareyu patsiekame kaneyeitiamiki, 'iki 'axamitiuyuriki miki 'umayiaka. 'Ana miki tukaritsie natsareyu pi'itiyani yumu'utsie,

12 'axakemitiyurienekai natsareyu Yawé hixie 'aixia piyiyuriekai muxatsi warehapanati xeiwiyari mehitikaime mawariwewieti mikiki mireuyehiwiyariekaki. 'Ayumieme pikanaki'eriwani meripai mieme matsi puhayewariekairi 'aixia mika'uyuyuriki mana pituyuy'a.

13 »'Iki 'iniari natsareyu hetsiemieme kanihikitini kepauka manutinetiarieni patsieti. Nanuwitikiemiki tuki kitenieyaritsie,

14 mana katinitimawamiki kanitataiyamiki muxa Yawé hetsiemieme xeiwiyari hikame

katikuyeme, meta xeime muxa 'ukitime 'itiya mawariyari mayaniki, meta 'aixia memiteyuxeianiki mawariyari.

¹⁵ Meta kanitimawamiki xeitsikiiwitiyari paa mikakuxanariyarietika, meta tiriku mitixiyari 'aixia mi'ane pihikitini wiyamatikaiti, tsuiraxi kakuxanariyarietikaime wiyamatikaime xeikia meta hatsite mawariyari, metatsiere kaxie winuyari mitiyeuriwa yinikame.

¹⁶ »Hiki mawari wewiwame Yawé hixie kanitimawamiki, mawarika mireuyehiwiyarieniki, mawarika taiyariyari natsareyu hetsiemieme.

¹⁷ Muxa 'uki kanitimawamiki Yawé hetsiemieme 'aixia memiteyuxeianiki mawariyari mayaniki, paa xeitsikiiwitiyari hamatia. Meta hatsite kanitimawamiki metatsiere kaxie winuyari mitiyeuriwa yinikame.

¹⁸ »Hiki tuki kitenie memayutixexeiriwatsie natsareyu kaniyukaximiki yumu'utsie. Yukipa mupatsietika, taipa kaneuwiwimiki 'aixia memiteyuxeianiki mawariyari mataiyarietsie.

¹⁹ »'Ariri natsareyu yukaxiyu, mawari wewiwame paa kananatituimiki tsikiiwititsie mikakuxanariyarie meta muxa 'uki naiparieya, miki naime natsareyu katinipitiamiki,

²⁰ 'anaketa naime Yawé hixie pekaniyuitiwamiki mawarika hepai. Naiti katinipatsieka mawari wewiwame hetsiemieme katinihikitini, naiti tawitsiemieme, teurite kimana mirayukatuiya. Mipai tiyurieme naime natsareyu winu manu'ieni kaniyiweni.

²¹ »'Iki 'iniari kani'ayumiemetini kemi'ane natsareyuki miyihiritiani. 'Iki naime mawarika ka-

tiniwewimiki Yawé hetsiemieme natsareyu hetsiemieme meta kaniyiwēni tita mītiyetuani ketita mirexeiyani. 'Iniari kemaine natsareyu hetsiemieme, xika natsareyu yuyetiāmikini kan-eye'atiamiki kemaine».

Mawari wewiwamete hipame 'aixia memiwayurieniki

²² Yawé Muiṭsexi mipai katiniuta'aitiani:

²³ «Mipai ketiniwarutahiawi 'Aruni meta niwemama, 'ixaheritsixi 'aixia memiwayurieka*ki* 'iki niukiki:

²⁴ »“Yawé kematsi'iwiyani
'ahamatia ke'uyeikani,

²⁵ Yawé 'aixia kematixeyani
yunaki'eriya kematsipitiaka,

²⁶ Yawé kematsiparewieka
kayuwati kematsipitiaka”.

²⁷ »Mipai xeputiuyaneni kenemititewa
'ixaheritsixi watsata, yuriki ne neheyemeki
nemixe'iwianiki».

7

'Imikierite 'ixuriki tukiyarita timieme memiteyetua

¹ Muiṭsexi kepauka tuki muni, 'aixia kaniyurieni naime katiniuti'iya hatseitiki muwa mītiyepine. Metatsiere mawari taiyame 'aixia kaniuyurieni meta naime muwa mirakapine.

² Hiki 'Ixaheri nuiwarimamatsie yuxexuime memanuyetei, memiwaruka'utiakai, kememiteyiwawe mekateniyetuani wanuiwarima yunaiti miki 'imikierite.

3 Tukita paiti mekatenetini Yawé hixie memiteheyetuaniki. Yuhuhutakati memanuyetei xeikaxetayaritsie mekatenetini, yuxexuitita tuurutsixi mekaniwayetuaxiani, yunaiti 'ataxewi kaxetate 'anukanatikaiti meta tamamata heimana huta tuurutsixi mekanakine.

4 Yawé Muiťsexi mipai katiniutahiawe:

5 «'Iki mawarite 'ahetsie katinimiemetini memimeteyeturiwa 'ahetsie ketinehika, mitikumayiiyaniki mitiwakumayiiwatsie 'ixuriki tukiari hetsiemieme. 'Eki rewitsixi pekaniwayetuiemiki, yuxexuiti kememite'uximaya 'uximayatsika hepaitsita».

6 Hiki Muiťsexi kaxetate meta tuurutsixi katiniyetuiiriyarieni, mikita rewitsixi kaniwayetuiirieni.

7 Keritsuni nuiwarimama hutame kaxetate mekaniuhapatarieni meta yunaukame tuurutsixi, memitehauyehiakaiki yu'uximayatsika hepaitsita.

8 Meraritsixi yunaukame kaxetate mekaniuhapatarieni meta tuurutsixi 'atahaikame, mireuyewekaiki wa'uximayatsikatsie. 'Aruni mawari wewiwame nu'aya 'Itamaxi yunaime miki katiniwa'aitiakaitini.

9 Kuhatitsixi tixaiti mepikateyetuiiriyarie, miki memihiritiariakaiki memiteheutitikaniki yuwaritsie piinite naime miti'itiatika.

Mawari taiyame hetsiemieme mawarika

10 Kepauka mawari taiyame 'aixia mu'itiarie, 'ixaheritsixi wa'ukiyarima mawari muwa mekaniyetuani,

11 Yawé Muiṭsexi mīpai mitikihawekaiki: «Mawari memiyetuayaniki mawari taiyame hetsiemieme, yuxexuiti wa'ukiyarima xexuime tukaritsie mekateniyuriekakuni».

Kura mawarikaya

12 Mexiakame tukaritsie mititimawaki Nahatsuni kananayexeyarieni 'Aminarawi nu'aya, Kura xiyyarieya.

13 'Iki hatsite 'imikieriyari, pīrata xakiyari 'amatikuni katiniyetuani meta xeime pīrata pateyuyari, mikitsie tiriku mitixiyari 'aixia mi'ane pihipinekai hatseitiki pinariekame. Kemiti'iniatakai tuki xaki 'amatikuni xeikiruyari heimana 'imeriyu katinahetekaitini meta pateyu 'atahaika tsienituyari kiramuyari raheteti.

14 Meta xeime pateyu yakimipe huruki miwewiya kaniyetuani, xeitsienituyari heimana tamamata kiramuyari katinahetekaitini, 'ikwa witsimu'ia hineme.

15 Mawari taiyariyari hetsiemieme, tsikeru xei-wiyari hikame kaniyetuani, xeime muxa 'uki meta xeime muxa xeiwiyyari hikame.

16 Mireuyehiwiyyarieniki, xeime tsipu 'ukitime kaniyetuani mawari mayaniki.

17 'Aixia memiteyuxeiyani mawariyari, yuhutame tuurutsixi kaniwayetuani, yu'aixiwimeta muxatsi 'ukitsi, meyu'aixiwime muxatsi tsipuri 'ukitsi meta meyu'aixiwime muxatsi xeiwiyyari memihitika.

Nahatsuni 'Aminarawi nu'aya 'iki mawarikaya kanihikitini.

'Itsakaxi mawarikaya

18 Hutarieka tukaritsie Natanaheri Tsuhaxi nu'aya mawari miwewieniki kanayexeyarieni, 'Itsakaxi xiyarieya wa'ukiyari.

19 Hatsite mititimawarieniki, katiniyetuani pirata xaki 'amatikuni meta pirata pateyuyari hipineme tiriku mitixiyari 'aixia mi'ane pinarieti hatseitiki. Kemiti'iniatakai tuki, xaki 'amatikuni xeikiruyari heimana 'imeriyu katinahetekaitini, meta pateyu 'atahaika tsienituyari kiramuyari katinahetekaitini.

20 Metatsiere xeime pateyu yakimipe huruki miwewiya kaniyetuani xeitsienituyari heimana tamamata kiramuyari raheteme, 'ikwa witsimu'ia hineme.

21 Mawari taiyariyari hetsiemieme, tsikeru xeime kaniyetuani, xeimeta muxa 'uki meta muxa xeiwiyari hikame.

22 'Itiya mawariyari hetsiemieme, xeime tsipu 'ukitime kaniyetuani.

23 'Aixia memiteyuxeianiki mawariyari, yuhutame tuurutsixi kaniwayetuani, meta yu'aixiwime muxatsi 'ukitsi kaniwayetuani, yu'auxiwimeta tsipuri 'ukitsi meta yu'aixiwime muxatsi xeiwiyari memihitika kaniwayetuani.

'Iki Natanaheri mawarieya kanayani Tsuhaxi nu'aya.

Tsawuruni mawarikaya

24 Hairieka tukaritsie 'Eriyáwi Heruni nu'aya kanayexeyarieni mititimawaki, Tsawuruni xiyarimama wa'ukiyari.

25 Hatsite m̄ititimawak̄i, katiniyetuani pirata xakiyari 'amatikuni meta xeime pirata pateyuyari, hineme tiriku m̄itixiyari 'aixia m̄i'ane hatseitiki pinariekame. Kemiti'iniatakai tuki xaki 'amatikuni xeikiruyari heimana 'imeriyu katinahetekaitini, meta pateyu 'atahaika tsienituyari kiramuyari katinahetekaitini.

26 Metatsiere xeime pateyu yakimipe huruki miwewiya kaniyetuani, xeitsienituyari heimana tamamata kiramuyari katinahetekaitini, 'ikwa witsimu'ia hineme.

27 Mawari taiyariyari hetsiemieme, xeime tsikeru kaniyetuani, xeimeta muxa 'ukitime meta xeime muxa xeiwiylari hikame.

28 'Itiya mawariyari hetsiemieme, xeime tsipu 'uki kaniyetuani.

29 'Aixia mem̄iteyuxeiiyaniki mawariyari, yuhutame tuurutsixi kaniwayetuani, yu'aixiwime muxatsi 'ukitsi, yu'auxiwimeta tsipuri 'ukitsi meta meyu'auxiwime muxatsi xeiwiylari mehitikaime kaniwayetuani.

'Iki 'Eriyáwi mawarikaya kanihikitini Heruni nu'aya.

Xuweni mawarikaya

30 Naurieka tukaritsie 'Eritsuxi kanayexeyarieni mutitimawak̄i Tserehuxi nu'aya, Xuweni xiiyarimama wa'ukiyari.

31 Hatsite mawariyari, pirata xakiyari 'amatikuni kaniyetuani meta xeime pirata pateyuyari, hipineme tiriku m̄itixiyari hatseitiki pinariekame. Kemiti'iniatakai tuki, xaki 'amatikuni xeikiruyari heimana 'imeriyu

katinahetekaitini, meta pateyu 'atahaika tsienituyari kiramuyari katinahetekaitini.

³² Meta xeime pateyu yakimipe huruki miwewiya kaniyetuani, xeitsienituyari heimana tamamata kiramuyari raheteme, 'ikwa witsimu'ia hineme.

³³ Mawari taiyariyari hetsiemieme, tsikeru xeime kaniyetuani, xeimeta muxa 'uki meta xeime muxa xeiwiyari hikame.

³⁴ 'Itiya mawariyari hetsiemieme, xeime tsipu 'ukitime kaniyetuani.

³⁵ 'Aixia memiteyuxeiyani mawariyari hetsiemieme, yuhutame tuurutsixi kaniwayetuani, meta yu'aixiwime muxatsi 'ukitsi meta yu'aixiwime tsipuri 'ukitsi meta meyu'aixiwime muxatsi xeiwiyari mehitikaime kaniwayetuani.

'Eritsuxi Tserehuxi nu'aya 'iki mawarieya kanihikitini.

Tsimehuni mawarikaya

³⁶ 'Auxiwirieka tukariyaritsie kanayex-eiyarieni Tserumieri Tsuritsarahi nu'aya mititimawaki, Tsimehuni xiiyarimama wa'ukiyari.

³⁷ Hatsite mawariyari, xeime pirata xakiyari 'amanukuyewa kaniyetuani meta xeime pirata pateyuyari, hipineme tiriku mitixiyari hatseitiki pinariekame. Kemiti'iniatakai tuki, xaki 'amatikuni xeikiruyari heimana 'imeriyu katinahetekaitini, meta pateyu 'atahaika tsienituyari kiramuyari katinahetekaitini.

³⁸ Meta xeime pateyu yakimipe huruki wewiyakame kaniyetuani, xeitsienituyari

heimana tamamata kiramuyari katina-hetekaitini, 'ikwa witsimu'ia hineme.

³⁹ Mawari taiyariyari hetsiemieme, tsikeru xeime kaniyetuani, xeime muxa 'uki meta xeime muxa xeiwiyari hikame.

⁴⁰ 'Itiya mawariyari hetsiemieme, xeime tsipu 'ukitime kaniyetuani.

⁴¹ 'Aixia memiteyuxeiyani kiramuyari hetsiemieme, yuhutame tuurutsixi kaniwayetuani, yu'aixiwimeta muxatsi 'ukitsi, meta yu'aixiwime tsipuri 'ukitsi meta muxatsi meyu'aixiwime xeiwiyari mehitikaime.

'Iki kanihikitiini Tserumieri mawarikaya Tsuritsarahi nu'aya.

Kahari mawarikaya

⁴² 'Ataxewiriekaka tukaritsie kananyexeyarieni 'Eriyatsati Rehuheri nu'aya mititimawaki, Kahari xiiyarimama wa'ukiyari.

⁴³ Hatsite mawariyariki, pirata xakiyari 'amanukuyewa meta xeime pirata pateyuyari kaniyetuani, hipineme tiriku mitixiyari 'aixia mi'ane hatseitiki pinariekame katiniyetuani. Kemiti'iniatakai tuki, xaki 'amatikuni xeikiruyari heimana 'imeriyu katinahetekaitini, pateyuta 'atahaika tsienituyari kiramuyari katinahetekaitini.

⁴⁴ Meta xeime pateyu yakimipe huruki wewiyakame kaniyetuani, xeitsienituyari heimana tamamata kiramuyari raheteme, 'ikwa witsimu'ia hineme.

⁴⁵ Mawari taiyariyari hetsiemieme, tsikeru xeime kaniyetuani, meta muxa 'uki meta xeime muxa xeiwiyari hikame kaniyetuani.

⁴⁶ 'Itiya mawariyari hetsiemieme, xeime tsipu 'ukitime kaniyetuani.

⁴⁷ 'Aixia memiteyuxeianiki mawariyari hetsiemieme, yuhutame tuurutsixi, yu'aixiwimeta muxatsi 'ukitsi, meta meyu'aixiwime tsipuri 'ukitsi meta meyu'aixiwime muxatsi xeiwiari memihitika.

'Iki kanihikitini 'Eriyatsati mawarikaya Rehuheri nu'aya.

'Epirahini mawarikaya

⁴⁸ 'Atahutarieka tukaritsie kanayexeyarieni 'Eritsama mititimawaki 'Amihuri nu'aya, 'Epirahini nuiwarimama wa'ukiyari.

⁴⁹ Hatsite mawariyari, xeime pirata xakiyari 'amakuni meta xeime pirata pateyuyari katinietuani, hipineme tiriku mitixiyari 'aixia mi'ane hatseitiki pinarieti. Kemiti'iniatakai tuki, pateyu xeikiruyari heimana 'imeriyu katinahetekaitini, meta xaki 'amakuni 'atahaika tsienituyari kiramuyari pirahetekai meta pateyu 'atahaika tsienituyari kiramuyari raheteme.

⁵⁰ Meta xeime pateyu yakimipe huruki wewiyakame kaniyetuani, xeitsienituyari heimana tamamata kiramuyari katinahetekaitini, 'ikwa witsimu'ia hineme.

⁵¹ Mawari taiyariyari hetsiemieme, tsikeru xeime kaniyetuani, xeime muxa 'uki meta xeime muxa xeiwiari hikame kaniyetuani.

⁵² 'Itiya mawariyari hetsiemieme, xeime tsipu 'uki kaniyetuani.

⁵³ 'Aixia memiteyuxeianiki mawariyari hetsiemieme, yuhutame tuurutsixi, meta

yu'aixiwime muxatsi 'ukitsi, meyu'aixiwime tsipuri 'ukitsi meta meyu'aixiwime muxatsi xeiwiwari mehitikaime kaniwayetuani.

'Iki kanihikitini 'Eritsama mawarikaya 'Amihuri nu'aya.

Manatsexi mawarikaya

⁵⁴ 'Atahairieka tukaritsie kanayexeyarieni Kamarieri mititimawaki Peratsuxi nu'aya, Manatsexi nuiwarimama wa'ukiyari.

⁵⁵ Hatsite mawariyari, xeime pirata xakiyari 'amakuni meta xeime pirata pateyuyari katiniyetuani, hipineme tiriku mitixiyari 'aixia mi'ane hatseitiki pinariekame. Kemiti'iniatakai tuki, xaki 'amakuni xeikiruyari heimana 'imeriyu katinahetekaitini, pateyuta 'atahaika tsienituyari kiramuyari katinahetekaitini.

⁵⁶ Meta xeime pateyu yakimipe huruki wewiyakame kaniyetuani, xeitsienituyari heimana tamamata kiramuyari katinahetekaitini, 'ikwa witsimu'ia hineme.

⁵⁷ Mawari taiyariyari hetsiemieme, tsikeru xeime, xeime muxa 'uki meta xeime muxa xeiwiwari hikame.

⁵⁸ 'Itiya mawariyari hetsiemieme, xeime tsipu 'uki kaniyetuani.

⁵⁹ 'Aixia memiteyuxeianiki mawariyari hetsiemieme, yuhutame tuurutsixi kaniwayetuani, yu'aixiwime muxatsi 'ukitsi, meyu'aixiwimeta tsipuri 'ukitsi meta meyu'aixiwime muxatsi xeiwiwari mehitikaime kaniwayetuani.

'Iki kanihikitini Kamarieri mawarikaya Peratsuxi nu'aya.

Wenikamini mawarikaya

⁶⁰ 'Atanauriekā tukarietsie kanāyayexeyarieni 'Awirani mītitimawakī Kereuni nu'aya, Wenikamini nuiwarimama wa'ukiyari.

⁶¹ Hatsite mawariyari, xeime pīrata xakiyari 'amakuni meta xeime pīrata pateyuyari katiniyetuani, hipineme tiriku mītixiyari 'aixia mī'ane hatseitiki pīnariēkame. Kemiti'iniatakai tuki, xaki 'amakuni xeikiruyari heimana 'imeriyu katinahetekaitini, meta pateyu 'atahaika tsienituyari kīramuyari raheteme.

⁶² Meta xeime pateyu yakimipe huruki wewiyakame kaniyetuani, xeitsienituyari heimana tamamata kīramuyari raheteme, 'ikwa witsimu'ia hineme.

⁶³ Mawari taiyariyari hetsiemieme, tsikeru xeime, xeime muxa 'uki xeimeta muxa xeiwiyari hikame kaniwayetuani.

⁶⁴ 'Itiya mawariyari hetsiemieme, xeime tsipu 'uki kaniyetuani.

⁶⁵ 'Aixia memiteyuxeyaniki mawariyari hetsiemieme, tuurutsixi yuhutame kaniwayetuani, yu'aixiwime muxatsi 'ukitsi, meyu'aixiwime tsipuri 'ukitsi meta meyu'aixiwime muxatsi xeiwiyari mehītikaime kaniwayetuani.

'Iki kanihikītini 'Awirani mawarikaya, Kereuni nu'aya.

Rani mawarikaya

⁶⁶ Tamamata tukaritsie kanāyayexeyarieni 'Akihetsexi mītitimawakī 'Amitsarahi nu'aya, Rani nuiwarimama wa'ukiyari.

67 Hatsite mawariyari, xeime pirata xakiyari 'amatikuni meta xeime pirata pateyuyari, hipineme tiriku mitixiyari 'aixia mi'ane hatseitiki pinariekame. Kemiti'iniatakai tuki, xaki 'amatikuni xeikiruyari heimana 'imeriyu raheteme, meta pateyu 'atahaika tsienituyari kiramuyari raheteme.

68 Meta xeime pateyu yakimipe huruki wewiyakame kaniyetuani, xeitsienituyari heimana tamamata kiramuyari raheteme, 'ikwa witsimu'ia hineme.

69 Mawari taiyariyari hetsiemieme, xeime tsikeru, xeime muxa 'uki meta xeime muxa xeiwiyyari hikame kaniwayetuani.

70 'Itiya mawariyari hetsiemieme, xeime tsipu 'uki kaniyetuani.

71 'Aixia memiteyuxeiiyaniki mawariyari hetsiemieme, yuhutame tuurutsixi, yu'aixiwime muxatsi 'ukitsi, meyu'aixiwimeta tsipuri 'ukitsi meta meyu'aixiwime muxatsi xeiwiyyari mehitikaime.

'Iki kanihikitini 'Akihetsexi mawarikaya 'Amit-sarahi nu'aya.

'Atsexi mawarikaya

72 Tamamata heimana xewi tukariyaritsie kananayexeyarieni Pakieri mititimawaki 'Ukirani nu'aya, 'Atsexi nuiwarimama wa'ukiyari.

73 Hatsite mawariyari, xeime pirata xakiyari 'amakuni meta xeime pirata pateyuyari katiniyetuani, hipineme tiriku mitixiyari 'aixia mi'ane hatseitiki pinariekame. Tuki kemiti'iniatakai, xaki

'amakuni xeikiruyari heimana 'imeriyu katina-hetekaitini, meta pateyu 'atahaika tsienituyari kiramuyari raheteme.

⁷⁴ Meta xeime pateyu yakimipe huruki wewiyakame kaniyetuani, xeitsienituyari heimana tamamata kiramuyari raheteme, 'ikwa witsimu'ia hineme.

⁷⁵ Mawari taiyariyari hetsiemieme, tsikeru xeime, xeimeta muxa 'uki, meta xeime muxa xeiwiayari mehitikaime kaniwayetuani.

⁷⁶ 'Itiya mawariyari hetsiemieme xeime tsipu 'uki kaniyetuani.

⁷⁷ 'Aixia memiteyuxeianiki mawariyari hetsiemieme, yuhutame tuurutsixi kaniwayetuani, yu'aixiwime muxatsi 'ukitsi, meyu'aixiwimeta tsipuri 'ukitsi meta meyu'aixiwime muxatsi xeiwiayari memihitika.

'Iki Pakieri 'Ukirani nu'aya mawarikaya kanihikitini.

Nepitahari mawarikaya

⁷⁸ Tamamata heimana huta tukaritsie kanayexeyarieni, 'Akira mititimawaki 'Enahani nu'aya, Nepitahari nuiwarimama wa'ukiyari.

⁷⁹ Hatsite mawariyari, xeime pirata xakiyari 'amakuni meta xeime pirata pateyuyari katinietuani, hipineme tiriku mitixiyari 'aixia mi'ane hatseitiki pinariekame. Tuki kemiti'iniataakai, xaki 'amakuni xeikiruyari heimana 'imeriyu raheteme, meta pateyu 'atahaika tsienituyari kiramuyari raheteme.

⁸⁰ Meta xeime pateyu yakimipe huruki wewiyakame kaniyetuani, xeitsienituyari

heimana tamamata kiramuyari raheteme, 'ikwa witsimu'ia hineme.

⁸¹ Mawari taiyariyari hetsiemieme, xeime tsikeru, xeimeta muxa 'ukitime meta xeime muxa xeiwiyari hikame kaniwayetuani.

⁸² 'Itiya mawariyari hetsiemieme, xeime tsipu 'uki kaniyetuani.

⁸³ 'Aixia memiteyuxeiyaniki mawariyari hetsiemieme, yuhutame tuurutsixi kaniwayetuani, yu'aixiwimeta muxatsi 'ukitsi, meyu'aixiwimeta tsipuri 'ukitsi meta meyu'aixiwime muxatsi xeiwiyari mehitikaime.

'Iki 'Akira 'Enahani nu'aya mawarikaya kanihikitini.

Kemitinirixi

⁸⁴ Mawarika mitiyetuiya 'ixaheritsixi wa'ukiyarima memuwewi kepauka mawari taiyame 'aixia mu'itiarie, 'iki katiniyetuiyani: Tamamata heimana huta pirata xakiyari 'amipapa, tamamata heimana huta pirata pateyuyari meta tamamata heimana huta pateyu yakimipepe huruki miwewiyatika.

⁸⁵ Pirata xakiyari 'amipapa xeikiruyari heimana 'imeriyu pirahetekai, meta pateyute 'atahaika tsienituyari kiramuyari pirahetekai. Naiti pirataki mitiwewiyatika xeitewiyari heimana 'atahuta kiruyari katinahetekaitini, tuki kemiti'iniatakai.

⁸⁶ Tamamata heimana huta pateyute yakimipepe huruki miwewiyatika, 'ikwa witsimu'ia hipineme xeitsienituyari heimana tamamata kiramuyari katinahetekaitini, tuki kemiti'iniatakai. Naiti pateyute yakimipepe

huruki muwewiyatika xeikiruyari heimana nauka tsienituyari kiramuyari katinahetekaitini.

⁸⁷ Tewaxi mawari taiyariyari hetsiemieme tamamata heimana huta tsikerutsixi, tamamata heimana huta muxatsi 'ukitsi, tamamata heimana huta muxatsi xeiwiyari memihitika, meta tamamata heimana huta tsipuri 'ukitsi mekanakine 'itiya mawariyari hetsiemieme, meta hatsite mawariyari.

⁸⁸ Tewaxi 'aixia memiteyuxeianiki mawariyari hetsiemieme xetewiyari heimana nauka tuurutsixi mepaki, meta haika tewiyari muxatsi 'ukitsi meta tsipuri 'ukitsi haika tewiyari, meta haika tewiyari muxatsi xeiwiyari memihitika. 'Iki mawarika kanayani kepauka mawari taiyame 'aixia memuyuritsie.

Kakaiyari teiteri watsata kemitiuyuhekiataxi

⁸⁹ Muitsexi kepauka 'ixuriki tukiyarita meutaha, Yawé hamatia mititaxataki, mana tiratu kakuniyari heima Kakaiyari teitametemama me-
mana'utsie kanitahiawe.

8

Kixemete manu'utika hetsiemieme

¹ Yawé Muitsexi mipai katiniutahiawe:

² «'Aruni mipai ketineutahiawi: “Kepauka 'atahutame kixemete tatikaime pe-manu'uitiani, miki kixeme 'uitiwame hixie kanihekiariwiekamiki”».

³ 'Aruni mipai katiniuyurieni. Kixeme tatikaime 'atahutame kananu'uitiani kixeme 'uitiwame hixie maukakixeniki, Yawé Muitsexi kemitita'aitia.

⁴ Kixeme 'uitiwame tsutimeyaritia meta tuturi-yari titsunameki piwewiyakai naiti miki huru xeikia pihikitikai, matsi Yawé Muiťsexi mipai mitiutahekiatiaki.

Rewitsixi ke'aixia memu'itiarie

⁵ Merikite Yawé Muiťsexi mipai katiniutahiawe:

⁶ «Rewitsixi keniwaruta'inieka 'ixaheritsixi wat-sata, keniwaru'iti.

⁷ Memi'itiiyaniki, haa mi'itiiyaki keni-waruhatuia, mipai ketiniwarutahiawi naime memiyukaxiniki meta yukamixate memiteti'ekwaki. Mipai 'aixia me'itiiarieti mekanakinikuni.

⁸ Hiki xeime tsikeru meta tiriku mitixiyari 'aixia mi'ane hatseitiki pinariekame xekateniyetuakuni mawari mayaniki. 'Ekita xeime 'ahetsiemieme pekaniyetuamiki 'itiya mawariyari mayaniki.

⁹ Rewitsixi 'ixuriki tukiyari manuwetsie paiti pekaniwaranuwitimiki meta yunaima 'ixaheritsixi pekaniwakuxeirimiki.

¹⁰ Yawé hixie rewitsixi pekaniwataxatamiki meta 'ixaheritsixi wahetsie mekaniutimeikuni.

¹¹ Hiki 'Aruni Yawé hixie rewitsixi kaniwayetuamiki, 'ixaheritsixi wahetsiemieme mawari teiki hetserarieti 'uyuitiariwati mayaniki. Mipai me'itiiarieme Yawé hetsiemieme te'uximayatamete mekanakinikini.

¹² »Rewitsixi yumamaki tsikerutsixi wahetsie mekaneutimeikuni, 'ekita pemiwaxinaki wahetsiemieme xeime keneutimawa memi'itiiyaniki, xeimeta Yawé hetsiemieme pekanitataiyamiki.

¹³ Hiki rewitsixi 'Aruni hixie mekaniti'uikuni meta niwemama wahixie, Yawé hetsia

pekaniwayetuamiki mawari teiki hetserarieti muyuitiariwa mayaniki.

¹⁴ Mipai pekatiniwapatamiki 'ixaheritsixi watsata, rewitsixi nehetsiememete memakineki.

¹⁵ »Hiki rewitsixi pewa'itieu, mawari muyuitiariwa hepai, miki tukita mekatenita'uximayatakuni.

¹⁶ 'Ixaheritsixi watsata xewiti pumawe, miki xeikia nehetsiememete mekanihikitikakuni, miki xeikia nepiwaranuyexei. Matiarixi 'ixaheritsixi waniwema, nekaniwarupata nehetsiememe.

¹⁷ Nehetsiememete memihikiki matiari nunuiwakate 'ixaheritsixi waniwema, tsepa tewi mitihiki yatini tewa mitihiki. Nehetsiememe nekaniwarayeitiani kepauka 'ekipitutari waniwema matiari miemete nemitiwarukwinitiatie.

¹⁸ Hiki rewitsixi nekaniwaranayexeiya 'ixaheritsixi waniwema matiari miemete wahetsiememe,

¹⁹ 'Aruni meta niwemama, nekaniwaye-tuirieni 'imikieri hepai. Rewitsixi pita mekateni'uximayakakuni 'ixuriki tukiyarita, 'ixaheritsixi wahetsiememe memiwaxinaki, memikatekwinitiariekaki 'axame'itiarieti tuki 'aurie meye'axeti».

²⁰ 'Aruni Muitsexi hamatia meta yunaiti 'Ixaheri kiekatari mipai mekatenuyurieni. 'Ixaheritsixi mipai naime mekatenuyurieni Yawé Muitsexi kemitiuta'aitiakai rewitsixi wahetsiememe,

²¹ miki yu'ixurikite mekaniti'ekwa mekan-uyu'itieni. 'Aruni kaniwayetuan Yawé hixie mawari 'aixia mi'ane hepai, wahetsiememe kani-utaniuni 'aixia memi'itiarieniki.

22 Mipai me'uyikake rewitsixi tukita mekanekine memayutixexeiriwatsie, muwa memiteheta'uximayataki 'Aruni meta niwemama meteware'aitiakaku, hiki naiti kanaye'atarieni Yawé Muiťsexi kemirahawekai rewitsixi wahetsiemieme.

23 Yawé Muiťsexi mipai katiniutahiawe:

24 «'Iki 'iniari rewitsixi wahetsiemieme kanihikitini: Tuki memiyutixexeiriwatsie memiteta'uximayataki mewaraka'utiwati xeitewiyari heimana 'auxiwi wiyari memexeiyatika meta muwa memautiyune,

25 kepaukari huta tewiyari heimana tamamata wiyari maye'atarieni mekateniutahayeikawakuni,

26 'anari xeikia mekateniparewiekakuni tukita kememiteyurieka wa'iwama, 'uximayatsikari mepikahiritiariaeka. 'Iki rewitsixi pi'wa'uximayatsikatini kememitehiritiariae».

9

Patsikwa 'ixiarariyari

1 Yawé Muiťsexi kaniutahiawe makumawetsie metitekaku Tsinahi mirakutewatsie, mexiakame metseriyaritsie hutarieka wiyari 'anuyemiekaku kepauka 'Ekipitu memayekitsie. Mipai katiniutahiawe:

2 «'Ixaheritsixi Patsikwa 'ixiarariyari mekaniuwewiximekuni kemi'ane tukaritsie yanepitayini.

3 Taikai xekaniwewiximekuni tamamata heimana naurieka tukari 'umiekaku mexiakame metseritsie, mana kanika'iniarikamiki. Xekaniwewikuni 'iniari niukiyari xemaye'atiani».

⁴ Muiṭsexi katiniuta'aita Patsikwa 'ixiarariyari
'ixaheritsixi memiwewieniki,

⁵ mikita mekaniwewieni Tsinahi
mirakutewatsie makumawetsie, taikai tamamata
heimana naurieka tukari 'umiekaku mexiakame
metseriyaritsie. Yawé Muiṭsexi kemitiuta'aitiakai
'ixaheritsixi naimeki yamekatenuyurieni
kemainekai.

Xika 'aixia ka'aneni

⁶ Peru matsu hipati Patsikwa
'ixiarariyari memiwewieni mepika'upitiarie,
memika'itiyakaiki timikime memite'umayikaiki.
Miki tukaritsie Muiṭsexi meta 'Aruni wahetsia
mekananukine,

⁷ mipai mekateniwarutahiawe:

—Timikime tepitehemayia, 'ayumiemexiari
'aixia tepika'anene. Hiki tepimaiku xika
teyiawweni Yawé hetsiemieme temitetimawaki
miki tukaritsie hipame 'ixaheritsixi wahepai.

⁸ Muiṭsexi mipai katiniwarutahiawe:

—Yaxeketeneutewini Yawé keminetitahiawe
kemitiyurimiki xehetsiemieme.

⁹ Hiki Yawé Muiṭsexi mipai katiniutahiawe

¹⁰ 'ixaheritsixi mipai mitiwatahiaweki: «Kepauka
xewiti xe'iwa 'aixia mika'aneni xeime timikime
miremayia yatsepa xewiti yukwiepa mika'uyeika,
mipaitsiere 'aneti miwewieni piyiwe Patsikwa
Yawé hetsiemieme.

¹¹ Hirixiatsi xika mipai 'aneni, kaniwewimiki
taikai tamamata heimana naurieka tukariyaritsie
hutarieka metseriyaritsie 'umiekaku. Muxa kan-
itakwaimiki paa mikakuxanariyarietikaki meta
tupiriya matsiwi,

12 muxa waiyarieya 'uxa'arieka mieme mayaniki xepikakuhayeikawani meta 'umeyarieya xepika'anumurani. Kepauka Patsikwa 'ixiarariyari miwewieni kehepai mirayuwewiwa mipai katiniyurimiki.

13 »Xika xewiti Patsikwa 'ixiarariyari ka'uwewieni 'aixia 'anetiti meta 'ateewa kaheyeikati, manuyeikatsie kanayeweyariemiki Yawé mikatiutimawiriki miki tukaritsie. 'Ana katinikwinitiarieemiki 'axamitiuyuriki.

14 »Xika 'ateewa kiekame xehamatia muka Patsikwa 'ixiarariyari wewimikini Yawé hetsiemieme, kaniyiweni 'iniari kemaine mipai 'aneti. Miki Patsikwa 'iniarieya kemaine yunaime wahetsiemieme pihiki, mana nunuiwakate meta 'ateewatari».

Tuki heima hai kemitiuyeya

15 Kepauka tuki 'ixurikiyari munirie Kakaiyari tiratuya muyeka, tukariki tuki hai kanenukanakaitini, meta tikariki tai hepai 'aneti kanayani.

16 Mipai kaniuyinekaitini: Tukariki hai tuki kananukanarimakaitini, tikarikita tai kanayeikakaitini.

17 Kepauka hai manuku'ekekai tuki heima, 'ixa-heritsixi 'ana mekanayekikakaitini, hakewata hai meyuhayewa manata mekanitiyaxikekaitini.

18 Yawé kemitiwakihawekai 'ixa-heritsixi mipai mekateniyekikakaitini yatini mipai mekatenikuyaxikekaitini, kemireuteterekai hai tuki heima 'uyekaiti mana mekaniyukuhayeikawakaitini.

¹⁹ Tsepa mīxa tukari tuki heima muyeya, 'ixaheritsixi Yawé mekaneu'eniekaitini kemitiwa'aitiakai mepika'ayekikakai.

²⁰ Yaxeikiata kepauka yaki mireuteterekai tuki heima: Kepauka Yawé mipai mitiku'iniaritakai, 'ixaheritsixi 'amenitiyaxikekaitini yatini mekanekikakaitini.

²¹ Heiwa hai xetikari xeikia kanikuyuruwakaitini, tsepa tikariki tsepa tukariki, kepauka meyeikakai 'ana 'ixaheritsixi mekananuku'uwekaitini.

²² Tsepa huta tukari yatini xeimetseri yatini mīxa tukari, 'ixaheritsixi mana mekaniyukuhayeikawakaitini mekapekikakai, kepaukata meyeikakai hai mekanekikakaitini 'utimana.

²³ Kepauka Yawé yamitiwaku'iniaritiwakai, 'ixaheritsixi mana mekanikuyaxikekaitini yatini mepekikakai. Yawé mipai mekateneu'eniekaitini yaxeikiata Muitsexi Yawé yatikihiawekaku.

10

Kuxinetate yuarikayari

¹ Yawé Muitsexi mipai katiniutahiawe:

² «Hutame kuxineta titsunameki keneutiwewi pirataki wewiyatikame, mana memukutei pemiwakuxexeiriwanitsie keneutahitsiwani meta kepauka memayekinetsie.

³ Kepauka hutati mitiyuani, yunaiti teiteri 'ahamatia mekaniyukuxeirikuni 'ixuriki tukiyari miranutahakitiretsie.

⁴ Kepauka xewiti xeikia mitayuani, 'ahamatia mekaniyukuxeirikuni xeikia memanuyetei 'Ixa-heri nuiwarimama.

⁵ Kuxineta haikakia hetayuayu memiyehutsiemieme, mekananuyeyaxikuni tau makayuyuipiketsie memititei,

⁶ hutariekata tatsutia memititei. 'Ana kanitayuamiki kuxineta memiyehutsie 'amemayekineki.

⁷ Kepauka memiyuxeirikuni mematiteitsie kuxineta kanitayuamiki yiki pita tiuyuati.

⁸ »Kuxineta memitihitsieni mawari wewiwamete 'Aruni niwemama mekateniyurikuni. 'Iki 'ait-sika kanihikitikamiki xehetsiemieme meta xenui-warima.

⁹ »Kepaukari yukwietsie xemeta'axiani xemayekine xekaneyiwawekuni xeheyutakwinike memixe'aye'unie wahetsia, miki kuxineta kanitiyuamiki kepauka xemeyutakwini. Hiki 'ana xeme Yawé kanixehaye'erimiki kanixetawikweitsitiamiki memixe'aye'unie watsata.

¹⁰ »Kepauka 'ixiarari waikawa meuyewetse xemutiwewiwani, meta metseri mihekwa tukariyari 'anatsiere xekateniutihitsiwakuni mawari taiyariyari memewewieniki meta 'aixia memiteyuxeiyani mawariyari hetsiemieme. 'Ana Kakaiyari xeme pixehaye'erieni. Ne Yawé 'akakaiyari nekanihikitini».

Tsinahi memiyeki Parani memu'axia

¹¹ Xeitewiyari tukari 'umiekaku hutarieka metseriyaritsie, hutarieka wiyaritsie, hai kananuku'ene tuki heima.

12 Hiki 'ixaheritsixi Tsinahi mekaniyekine memakutekaitsie makumawetsie paiti mekaniu'axiani, Parani mirakutewatsie hai hakewa meuyeya.

13 Yawé Muiťsexi kemitiuta'aitia, 'ana 'ixaheritsixi mekaniyekine matiari.

14 Matiari memanuyeyaxixi Kura teiterimama mekaniyakaitini yupatera me'akwetí. Kaniwara'iniekaitini Nahatsuni titewati 'Aminarawi nu'aya.

15 Natanaheri Tsuhaxi nu'aya kaniwara'iniekaitini 'Itsakaxi nuiwarimama.

16 'Eriyáwi Heruni nu'aya kaniwara'iniekaitini Tsawuruni nuiwarimama.

17 Hiki tuki 'utaxinarieka, Keritsuni nuiwarimama meta meraritsixi mete'utiti mekanekine.

18 Wa'utimata memayeki Xuweni teiterimama mekaniyakaitini yupatera me'akwetí. Kaniwarawitikikaitini 'Eritsuxi Tserehuxi nu'aya.

19 Tserumieri Tsuritsarahi nu'aya Tsimehuni nuiwarimama kaniwarawitikikaitini,

20 'Eriyatsati Rehuheri nu'aya Kahari nuiwarimama kaniwarawitikikaitini.

21 Hikita miki wa'utia mekanekine Kuhatitsixi mitipatsietika tetikimete. 'Ixuriki tukiari kaniutawewierikekaitini mexi meka'uye'axiawaweni hakewa memetiayaxe.

22 Mikita wa'utima mekanekine 'Epirahini teiterimama yupatera me'akwetí. Miki 'Eritsama 'Amihuri nu'aya kaniwarawitikikaitini.

23 Kamarieri Peratsuxi nu'aya Manatsexí nuiwarimama kaniwarawitikikaitini,

24 'Awirani Kereuni nu'aya Wenikamini nuiwarimama kaniwarawitikikaitini.

25 'Imatiriekā yunaime wahiwemete mekanayekine Rani teiterimama yupatera me'akwetī. 'Akihetsexi 'Amitsarahi nu'aya kaniwarawitīkīkaitini.

26 Pakieri 'Ukirani nu'aya, 'Atsexi nuiwarimama kaniwarawitīkīkaitini,

27 'Akira 'Enahani nu'aya, Nepitahari nuiwarimama kaniwarawitīkīkaitini.

28 Mipai mekateneuku'ukaitini 'ixaheritsixi kepauka memayekīkakai.

Muitsexi Huwawi kemitiuta'ini

29 Hiki Muitsexi Huwawi Xehueri mariyani tewiyari nu'aya mipai katiniutahiawe:

—Tame tepayekīnirime Yawé kwie mitatsi'axatiatsie. Hikimi tanaiti tekaniyehuni 'aixia temiteheyuxeiyānikī, Yawé 'ixaheritsixi wahetsiemieme 'aixia mitiuka'iyariki.

30 Huwawi mipai kaniutayini:

—Ne hawaiki, ne nepikayemie, ne nekwiepa pita nekaniyemieni nemarema wahetsia.

31 Muitsexi mipai katinitahiawe:

—Neuxeitsi, pepikatatsi'uku'e'eiriwani, 'Eki pepukumate makumawetsie hakewa temeka'uxipiwēni. 'Eki pemitatsi'anuwitini pepihikitini.

32 Xika petatsi heweiya, tame tematsi heye-tuirieni 'aixia miti'ane Yawé mitareyetuirieni.

Kepauka 'ixaheritsixi memayeki

33 'Ixaheritsixi mekanayekine Yawé hirieya manukatsie, haika tukari mekaniuhukaitini Yawé tiratuya mayeka me'akwetī, wahixie kaniumiekaitini 'ikuwauneti hakewa memeka'uxipienikekai.

³⁴ Kepauka memayekikakai, Yawé haiwitirieya waheima tukariki puyeyeixakai.

³⁵ Kepauka kakuni manukukweiwakai, Muitsexi mipai kaniutainekaitini:

«Yawé, kenanukukexi.

Mekeheutaxiriexiani memimatsi 'aye'unie,

Mekeheuyuta'unaxiani memimatsiheka».

³⁶ Kepaukata kakuni muwakekakai, Muitsexi mipai kaniutainekaitini:

«Yawé, kenenua,

'ateiterima 'ixaheritsixi wahetsia
memikayu'iniatsinia memihiki».

11

Taweratsie Yawé taiki kemitiwareuyehia

¹ Tawera metiteti 'ixaheritsixi 'axamekaniu-tiuanekaitini Yawé hepaitsita mete'uka'eniwati. Miki waru'enieka waikawa kaniuyeha'ani, taiki wawarita memaititeitsie katinaxitsitiatiyani.

² Hiki 'ixaheritsixi Muitsexi waikawa mekaniwawiriekaitini, kaniuyutanenewieni Yawé mitiwareuyehiwirieniki, 'ana tai kaniutini.

³ 'Ayumieme mana miya mitiyyiki Tawera katini-uteriwarieni, Yawé taiki miwarutitaiyaxiki.

Kiwuruti-Hatawa kiekatari kemiteyu'uximatiakai

⁴ Hipati teiteri kikamete memaye'ukai waikawa meteheukwaikiti mekanakine. Hiki 'ixaheritsixi mekaniutitsuani meta mipai me'utiyuati: «Kemi'ane wai pitatsimini.

⁵ Titayari tsapari 'Ekipitutsie temiwaretikwa'akai tekateyutuati tete-wareku'eiri. Yaxeikiata pepinu meta meruni

temetikwa'akai metatsiere wexu, 'uyuri meta 'axuxi.

⁶ Hiki neuxei tekananatiwawakini, manana xeikia tekanixeyani».

⁷ Manana tsiranituru hatsiyari hepai katiniyux-exeyakaitini, witsuanari mutimerika hepai.

⁸ 'Ixaheritsixi mekanikuteixikaitini tetexi hutameki mekanititixikaitini, yatini mekanititsunakaitini xika me'ika'etsakuni meta paa kimana mekaniwewiekaitini. Paa miwiyamarie hepai kana'anekaitini.

⁹ Tikariki kepauka haitsi mikaxiriwekai memakuteitsie, manatsiere manana kanikaxiriwekaitini.

Muitsexi Kiwuruti-Hatawa kemitiuyu'uximatia

¹⁰ Hiki Muitsexi kaniu'ena 'ixaheritsixi meta watiriyama kememite'utsuanakai, yuxexuiti yuxamaru kitenie, Yawé mekanihaxiatiakaitini. Hiki yu'uximatiasi,

¹¹ Muitsexi Yawé kaniutahiawe nenewieriki:

—Xika ne neti'a'uximayatsiriwametini, ¿titayari peneti'uximatia? ¿titayari pekanetiparewie, teiteri yunaiti nehetsie memite'uhipaniki penetihiritia?

¹² ¿Netsi neniwema menehiki, neniwarutini-wexi, peminetsi'aitiaki kename newa'iwiyani, 'atiriyama waweriyame hepai, newarakatiti nemwareta'atianiki hakewa paiti kwie wa'ukiyarima pemwarexatiatsie?

¹³ 'Iki yunaiti teiteri wai mekaneniwawirieka me'utitsuati. ¿Ne hakewa nepeikaxeya?

¹⁴ Ne nexaitame nepikayiwe 'iki teiteri wahet-siemieme. Waikawa 'uximayatsika pihiki nehet-siemieme.

15 Xika mipai petiyurienemiki, ne nepimatsiwawirie netukari peminetsi nawairieniki. Mipai nepiratimaiya hiki kenemitiuka'eniwa.

Yawé Muitsexi kemitiuta'ei

16 Yawé Muitsexi mipai katiniuta'eiya:

—'Ukirawetsixi 'ixaheritsixi haika tewiyari heimana tamamata kenene'atiiri, mipai ketinemaika yuteiterima memiwakuyuitiwa xeikia mekaniyiakakini. 'Ixuriki tukiyari manuwe keniwaranuwitiki, mana 'etsiwa 'ahamatia yameketeheutewini.

17 Ne 'ahamatia nemititaxataki nekananukatemi, miki wahetsieta yanekatiniyurimiki 'iyari pemexeiya memexeinyaniki, memimatsiparewiekakiki 'iki teiteri mimatsihiritia waheki. Mipai 'eki 'axaitame xeikia pemikayianeniki.

18 »Teiteri xeikia mipai pekatiniwatahiawimiki: “Xekeneuyu'iti 'uxa'a miemeki, 'uxa'a wai xekanitikwaikuni. Xeme xekaniutitsuanu Yawé hixie, mipai xe'utiyuati: 'Wai ketatsi'umini. 'Ekipitutsie naime tepitehetikwa'akai.' Mikita hiki wai kanixemimiki, xekanitikwaikuni.

19 Xeitukari, nihuta tukari ni'aixiwime tukari, tamamata tukari, meta nixeitewiyari tukari xepika'itikwa'ani,

20 matsi xeimetseri, kepaukake xetsurita makanexiani, kepaukake xemitixani'erieni. Yawé xemu'uximatiaki, xehamatia muyeika, xemutitsuaki mipai xe'utiyuati: '¿Titayari 'Ekipitutsie tetehayeki?' »

Kakayari niukieya kanaye'atiarieni

21 Muiṭsexi mīpāṭa kaniutayini:

—Ne kuyaxi 'ataxewime tsienituyari miriyari wahamatia nekaniuyeikani, ǰ'ekita wai xeimet-seritsie xeikia petiwamini peraine?

22 Tsepaneti xeikuraruyari tsipuru miwarukwi'iri mepikatenake, tsepaneti haramaratsie tsapari memuye'uwa yunaime miwarukwi'iri yunaiti mepikatenake.

23 Yawé Muiṭsexi mīpai katiniuta'eiya:

—ǰKamitsi Yawé tirikariyaya reu'atika? Hikitsi pekaninierimiki, xika neniuki nehaye'atiamiki yati pitikatixai.

24 Hiki Muiṭsexi 'ixaheritsixi yakatini-warutahiawe Yawé kemititahiawekai. Miki kaniwarukuxeirieni haika tewiyari heimana tamamata 'ukirawetsixi, wa'aurie kaniyuhayewa ta'ikwewati 'ixuriki tukiari 'aurie.

25 Yawé haitsie 'uyekaiti Muiṭsexi hamatia katiniutaxata, meta haika tewiyari heimana tamamata 'ukirawetsixi 'iyari kaniwarupitiani Muiṭsexi meixeyikai. Kepauka 'iyari wahetsie miyuhayewaxi, metekuxatatiweti mekanakine. Tawarita mīpai pikatiyi.

26 Yuhutati 'ukirawetsixi yukie memuyuhayewakai. Xewiti 'Erirari titewati, xewitita Merari. Tsepa memanayexeyarieikai tuki manuwe mepikaheki. Yatiti, 'iyari wahetsie pitunakixi, mikita metekuxatatiweti mekanakine mematiteitsie.

27 Hiki xewiti temaikititi kaniutanautsa Muiṭsexi mikiki retaxatianike, mīpai kaniutayini:

—'Erirari, Merari hamatia mekatenekux-atatiweni temakuteitsie.

28 Kutsuhexi Nuni nu'aya, ti'uximayatame manayexeyarie Muitsexi parewiwameyaki temaikiyari paiti, mipai kaniutayini:

—Muitsexi, neti'aitiwame, keniwaruta'imaiya.

29 Muitsexi mipaita kaniutayini:

—¿Nekimana peti'itetsa? Mipai nepitiku'eriwakaku yunaiti 'iki Yawé teiterimama 'iyari mepexeyanikeku memitekuxataniki.

30 Hiki Muitsexi meta 'ukirawetsixi mekaniu'axiani mematitekaitsie.

Xi'aurixi

31 Yawé 'eka kaniuyuitiani xi'aurixi haramaratsie miemete waratikime, mematiteitsie kaniwarukaxirieni. Memakuteitsie wa'aurie xi'aurixi mekanakunikaitini, xeitukari 'umieti ranuyenakeme me'atayeuti, xeimeturuyari metsuiti kwiepa.

32 'Ixaheritsixi mekaniwarukuteixi xi'aurixi miki tukaritsie meta naime miki tikaritsie meta 'uxa'arieka. Yunaiti tamamata 'ikayari mekaniukuxeirieni. Memakuteitsie takwa yateewa mekaniwarutiwatsiixa.

33 Hiki kepauka memeitakwaixia yuteta meka'itikeiwawekaku 'akuxi, Yawé kaniuyeha'ani 'ixaheritsixi wahetsiemieme, 'ana yuwaikawati mekaniukwini.

34 Ayumieme mana mekateniuteriwa Kiwuruti-Hatawa, mana memukateukieki 'ikwaitsie xeikia memiyukihawekaiki.

35 Mana Kiwuruti-Hatawa memiyeki 'ixaheritsixi, mekanekine pita Katseruti mana mekaniuyuhayewa.

12

Miriyami, 'Aruni hamatia Muiťsexi kememiteniukimakai

¹ Muiťsexi xeime 'uka 'ekipitutanaka kaniu-tiwitini, hiki Miriyami 'Aruni hamatia mekani-tiniukimatikine mikiki.

² Mipai mekaniutiyanekaitini: «¿Kamitsi Yawé Muiťsexi xeikia tikuhiaawe? ¿Tami tameta katatikihiaawe?» Hiki Yawé kaniwaru'enieni.

³ Matsi Muiťsexi tixaiti karayuyeitiati 'amuyeika kanihikitikaitini, nixewiti tawarita hepaina 'aneti kwiepa pumawekai.

⁴ Yapauka Yawé Muiťsexi, 'Aruni meta Miriyami mipai katiniwarutahiaawe: «Xekenehu 'ixuriki tukiari manuwe xeme xeyuhaikati». Miki mekanekine.

⁵ Hiki Yawé kanakateni hai 'a'uwekametsie, 'ixuriki tukiari hixie kaniuyuhayewa. 'Aruni meta Miriyami mame kaniwaruta'inieni, kepauka yuhutati memiwaki,

⁶ Yawé mipai katiniwarutahiaawe: «Xekeneneu'eni kenemitixetahiaawe:

»Kepauka Yawé niukameya

xetsata 'amuyeika,

ne nekanikihiaweni heinitsika hepai 'anemetsie

meta nematsiikiti nekanayuyeitiwani

heinitsikatana.

⁷ Peru 'iki mipai pika'ane

Muiťsexi neti'uximayatsiriwame hamatia,

yunaiti nete'uximayatsiriwamete watsata

miki matsi yamitikamie kanihikitini.

⁸ Ne nekatnikuxaxatiwani hixiena ne'utiniereti,

hekiakameki nekarenukanamiriet.

Ne Yawé kenemi'ane kanenikuxexeiyani.

¿Ketitayari mīya xete'utiyuane
neti'uximayatsiriwame Muiṭsexi hepaitsita?»

⁹ Yawé waikawa kaniuyeha'ani wahepaitsita
hiki kaneyani.

¹⁰ Yapauka hai 'anuku'eneku tuki heima,
Miriyaṃi nawiyarieya tuxati kanayani 'iwi
hepai. Kepauka 'Aruni hepana mutia, kanixeiya
yuwaiyaritsie kwiniya hexeiyaḱame.

¹¹ Hiki 'Aruni 'ana Muiṭsexi mipai
katiniutahiawe: «Waikawa nepimatsiwawirie,
neti'aitiwame, ke'axatemite'uyuri
pepikahe'eriwani 'atsitekatemaiti temutiyuaki.

¹² Miriyaṃi yuwaiyaritsie kanepinini, nunutsi
yumaama hetsie manuyemi nawiyarieya
hepai. Ximixi kwerieti mipai pika'aneni
ketineuyehiwiriekā».

Muiṭsexi Miriyaṃi hetsiemieme
kemitiyutanenewi

¹³ Muiṭsexi Yawé mipai katiniutawawirieni:
«Kakaiyari, waikawa nepimatsiwawirie
pemenayehianiki».

¹⁴ Yawé Muiṭsexi kaniuta'eiya: «Xika paapaya
hixienatsie 'ita'aitsikawiyake ¿katiyiwe 'atahuta
tukari muyuhiweriekā? Keheyani 'atahuta
tukari kiepa pika'ukani, miki tukari 'aye'ayuke
kanipitiariemiki».

¹⁵ Mipai Miriyaṃi 'atahuta tukari yeuta ka-
niukateitini. 'Ixaheritsixi mepikaheki kepaḱake
miki wahetsia munua.

¹⁶ 'Anake 'ixaheritsixi mekanayekine Katseruti,
Parani makumawetsie mekaniu'axiani.

13

'Ixaheritsixi Kanahani kememitehekuxe

¹ Yawé Muiṭsexi mīpai katiniutahiawe:

² «Mīpai nepaine keniwaranunī'a hipame kwie memixeyayuki 'ixaheritsixi nemīwayetuirieni. Yuxexuime nuiwaritetsie memanuyetei mekaniwaranunī'akuni».

³ Yawé kemainekai, Muiṭsexi kaniwarenī'ani Parani makumawetsie mekaniyekine. Yunaiti mīki 'ixaheritsixi memanuyetei mekanihikītikaitini.

⁴ Mīpai mekatenitetewakaitini:

Tsamuha, Tsakuxi nu'aya, Xuweni nuiwari-mama wahetsiemieme,

⁵ Tsapati, Huri nu'aya, Tsimehuni nuiwari-mama,

⁶ Karewi, Kepune nu'aya, Kura nuiwarimama,

⁷ 'Ikari, Kutse nu'aya, 'Itsakaxi nuiwarimama memihiki,

⁸ 'Utseyaxi, Nuni nu'aya, 'Epirahini nuiwari-mama memihiki,

⁹ Pariti, Xapuhu nu'aya, Wenikamini nuiwari-mama,

¹⁰ Kariheri, Tsuhuri nu'aya, Tsawuruni nui-warimama wahetsiemieme,

¹¹ Kari, Tsutsi nu'aya, Manatsexi nuiwarimama (Kutse nu'aya xewiti mihiki),

¹² 'Amiheri, Kemari nu'aya, Rani nuiwarimama memihiki,

¹³ Tsetuxi, Mikaheri nu'aya, 'Atsexi nuiwari-mama wahetsiemieme,

¹⁴ Nakiwi, Watsi nu'aya, Nepitahari nuiwari-mama wahetsiemieme,

15 Kehueri, Maki nu'aya, Kahari nuiwarimama wahetsiemieme.

16 Mipai mekatenitetewakaitini memanuyetei Muitsexi miwareni'a kwie memixeyayuki. ('Utseyaxi mititewakai Nuni nu'aya, Muitsexi kani-pata Kutsuhexi pita katiniteriwa).

17 Kepauka Muitsexi miwareni'a Kanani kwieyari memixeyayuki, mipai katiniwarutahiawe: «Nekexi xekaneutiyunikuni, hiritisie paiti xekaniye'axiakuni.

18 Kwie naime xekenexeiya, xekeneyi'iwia teiteri kememe'anene, xika mehetirikawini yati mepikatehetirikawi, xika meheyuwaikawani yati 'etsi mepiteheyupame.

19 Xekenexeiya kwie keme'ane, xika 'aixia he'aneni yati 'axapire'ane, xika waki hekurarutsietikani yati pitikatixai.

20 Kwie xekenexeiya xika 'aixia rexuaweriyani yati hawaiki, xika kiyexi hexuaweni yati piremawe. Hiki xekenehu xekamamati. Tixaiti 'ikwaxi xekateni'atuakuni muwa timieme».

Miki tukaritsie kaxie takari matari mieme matikwakwaxetsie mekaniyikaitini.

21 Mekanekine tamamata heimama huta meyupaimeti 'ukitsi kwie meheuxeiyayuka, makumawetsie Tsini Xekuwi ye'atikaime, Rewu Kamati heuhurakaku.

22 Nekexi mekaneutiyune, Hewuruni mekaniye'axiani, 'Akimani, Tsetsahi meta Tarimahi memanu'uwakai 'Anaki nuiwarimama mematitekai. ('Epuruni kiekariyari meri kaniukamarieni 'ariketa 'atahuta wiyari

'anuyemiekaku Tsuhani kiekariyari kaniukamarieni 'Ekipitu mieme).

²³ Kepauka memu'axia mayeweritsie 'akitsie 'Etsikuri, xeixatsimuyari mekanaka'inini kaxie takari, yuhutati meneitini kiyetsie me'iyewieti. Metatsiere hipame 'ikwaxite kiranaraxi meta xapa takariyari mekanaka'inini.

²⁴ 'Iki kaxie takari memaka'iniki 'ixaheritsixi, mana mekatenuiteriwa 'Etsikuri mayeweri.

Kememutiya nenieremete

²⁵ Huta tewiyari tukari 'anukayaku mekaniu'axiani tamamata heimana huta 'ukitsi kwie mehekuxeyaka.

²⁶ Karetsi mekaniu'axiani makumawetsie Parani Muitsexi manukatei, 'Aruni meta yunaiti 'ixaheritsixi, mekatenuwarutaxatiani kemire'anekai meta 'ikwaxite mekatenuwaruxeitsitiani mana mirexuawekai.

²⁷ Mipai mekatenuwarutaxatiani:

—Hakewa pemitatsihetani'a miki kwieyaritsie tepaniki, puyuri mana waikawa pexuawe retsi meta xiete. 'Ena xeketeneuxeiya 'ikwaxi mana mirexuawe.

²⁸ Perutsi mana teiteri memexuawe waikawa mepetirikawi, wakiekarite 'apiremamariwawe, 'aixia rekukurarutsietikaiti. Matsita mana tekaniwarexeiya 'Anaki xiyyarimama 'amemutiti.

²⁹ 'Amarekitsixi Nekexitsie mekaniu'uwani, hiritsieta hetitsixi, kewutseutsixi meta 'amuxeutsixi hiritsie mekane'uwani metatsiere kananeutsixi haramara tetsita mekaniu'uwani Kurutani tetsita.

³⁰ Karewi kaiwati katiniwaruyatsa 'ixaheritsixi Muitsexi hixie, mipai kaniutayini:

—Hikimītika tekanihuni miki kwie tema'iwaki.
Ne mipai nepitiku'eriwa tepiyiwawe.

³¹ Hamatiana memanikinekai mipai mekaniu-
tiyuani:

—Tepikayiwawe miki teiteri wahamatia
temuyutakwini. Miki mepitirikawi waikawa.
Tame tepikatikawī.

³² Hikī 'itarikakī mekatenuitixatatikine 'ixaher-
itsixi watsata kwie memekuxei hepaitisa. Mipai
mekaniutiyanekaitini:

—Kwie temekuxei yuteiterima kaniwarekwaka,
teiteri mana meme'uwa 'amekaniutini.

³³ Matsi manata tekaniwarexeiya 'Anaki
xiyarimama 'amemutiti. Temeyuku'inuniatakai
'utsikari wahapai tepepepekai, mipai miki
mekatatenexeyakaitini.

14

'Ixaheritsixi Kaka'yari hetsie mepite'uhipakai

¹ Miki tikaritsie 'ixaheritsixi mekaniutayuanī
me'utihiwati meta me'utitsuati.

² Meyu'uximatiati Muitsexi hetsiemieme meta
'Aruni, yunaiti mipai mekaniutiyanekaitini:
«Matsi teminekwikaitini 'Ekipitu paiti. 'Ena 'aixia
piyini makumawetsie xika te'ukwini.

³ ¿Titayari Yawé 'iki kwieyaritsie tareyewiti?
¿'Ixiparakitsi temikwi'iwaki, ta'itama taniwema
memiwaranuwitini? ¿'Aixia kati'ane xika
tehakunuaxiani 'Ekipitu?»

⁴ Mipai mekatenyikihawekaitini hipati: «Xeime
manuyeyerini tepanuyexeiya mitatsi'anuwitini
'Ekipitu paiti».

⁵ Hiki Muitsexi, 'Aruni hamatia kwiepa meka-niukaxirieni yihixima 'ixaheritsixi wahixie.

⁶ Mana mekaniti'ukaitini Kutsuhexi Nuni nu'aya meta Karewi Kepune nu'aya yukamixa mekaneukatsanaxiani hiwerika 'iniariyari mewewieti. Miki memekikinixiakai kepauka kwie memekuxeitsie,

⁷ hiki mipai mekateniwarutahiawe yunaime 'ixaheritsixi:

—Kwie temekuxei matsi 'aixia kane'aneni temikateheyeneniere hepai.

⁸ Xika Yawé tatsiparewiekamiki mana kataniye'atiamiki. Kataniyetuiriemiki kwie hakewa waikawa mexuawe retsi meta xiete.

⁹ 'Ayumieme Yawé hixie 'axaxepikateyu'eniwani meta mana teiteri memetama xepikawareumakaxeni. Tixaitiri mepikatehiki, yuhetsie nunuwame mepikahexeiya, tame Yawé kataniparewimiki. 'Ayumieme xepikawareumakaka.

¹⁰ Peru yunaiti 'ixaheritsixi mipai memite'uxatakaiki memiwatituaxaki, Yawé xawatiriyaya tuki hixie kaniuyuhekiata 'ixaheritsixi yunaime wahixie.

¹¹ Hiki Yawé Muitsexi mipai katiniutahiawe:

—¿Kepaukake mepitehayewa 'axameneteku-mamateketi 'iki teiteri? ¿Kepaukake yuri mepiteta'erieni nehetsie, mamariwaweme tititsi watsata nemitiyuriene?

¹² Kwiniya nekananuni'amiki wahet-siemieme miwakwiniki, 'ahetsie xeikia kiekari kanayenemiki mariweti tirikaiyeti keyamemutiyuane.

¹³ Muitsexi Yawé mipai katiniutahiawe:

—Kenaye'eri kepauka 'eki 'atirikariyaki 'Ekipitu pemīwarayewiti 'iki teiteri. Kepauka 'ekipitutari memitehetimani kepemitiuyuri,

¹⁴ mipai mekateniwataxatiakuni 'iki kwieyaritsie kiekatari, mipai memitemate kename 'eki Yawé 'ahixie tematsixeiya, 'ahai 'ateiterima waheima muyeyeixa, kename 'eki pehiki pemīwaruwituxime, tukariki hai 'a'uwemeki, tikarikita taiki.

¹⁵ Xika pewarukwini yunaima 'iki teiteri, yunaiti nuiwarite mumanetika memu'enana hepaitsita mipai mekanitiyuakuni:

¹⁶ “Yawé pika'uyiwekaxia 'iki teiteri miwaranuwitiniki hakewa kwie miwarexatiakai, kaniwarutixitiani makumawetsie wakwiti”.

¹⁷ »Neuxei hiki Yawé, 'atirikariya kenehekiatani. 'Eki mipai pemaineki

¹⁸ Yawé kenama pekahayu'eriya matsi waikawa peti'akanaki'erie meta xeniu pereuyehiwirieni 'axamiti'ane meta kemi'ane matsi'uku'eiri, peru matsi kemi'ane 'axamitiuyuri pepitkwinitiani meta niwemamatsie, teukarimamatsie, tutsimamatsie, meta miki waniwema wahatsiepaiti.

¹⁹ Waikawa pemiti'akanaki'erieki nepimatsiwawirie pemitiwareuyehiwirieniki 'iki teiteri 'axakememite'uyuri, 'Ekipitu memayekitsietiti kepemitiwareuyehiwiriekai hikita yaxaikia».

²⁰ Yawé mipai katinita'eiya:

—Penetiawawirie nemitiwareuyehiwirieniki, nekatiniwareuyehiwiriemiki.

21 Yuriki nehetsiemieme mipai nekanaineni,
meta nexawatiriya kwiepa naitserie mihineki,

22 tsepaneti nexawatiriya memuxe
meta mamariwawemeki kenemitiuyuri
'Ekipitu meta makumawetsie, 'iya kemi'ane
yuri memikaneteheta'eriri, miixamexia
meminetsiheta'iniataxi

23 pika'ixeiya kwie wa'ukiyarima yuri
nehaiti nemipayetuirienikekai. Nixewititima
minetsi'utaniukima pika'ixeiya.

24 Neti'uximayatsiriwame Karewi,
yiki'aneame 'iyari kanexeiyani, 'aixia
katinikamieni, nekanixatiamiki kwie ke'aneame
mexei meta nuiwarimama wahetsiemieme
kanayeimiki.

25 'Uxa'a Haramara Mixeta hepa xekenehu,
'amarekitsixi meta kananeutsixi mayeweritsie
memekieki.

26 Yawé Muietsexi 'Aruni mame mipai katini-
warutahiawe:

27 —¿Kepaukake mepitehayewa 'iki
teiteri 'axame'utiyuati menetsiniukimati?
Nekaniwa'enieka kehepai memiteniukixie
'ixaheritsixi nehetsiemieme.

28 Hiki mipai ketiniwarutahiawi nehet-
siemieme: “Yuriki nehetsiemieme mipai nepaine,
ketita xemiteheuyehiwa yanekatiniyurimiki.

29 Yunaiti xeme xekanikwikuni makumawetsie
xekaxari 'ena puyuhayewa. Nixewiti
memaka'utsie xetewiyari wiyari mehex-
eiyatikaiti 'axamemutiyua nehetsiemieme,

30 kwie pikayetuiriyarieni nemixexatia. Mana
xeikia mekaneutahaxiakuni Karewi Kepune
nu'aya meta Kutsuhexi Nuni nu'aya.

31 Tiiri xeikia kwiepa mekaneutahaxiakuni xeme mipai xemutiyuaki kename kuyaxi mewaranuwitini wahetsiemieme memakineki. Miki mekaniyiaakakuni miki kwietsie memu'uwani xeme xemitixani'eritsie.

32 Xeme xe'umete 'ena makumawetsie kaniyuhayewamiki.

33 Huta tewiyari wiyari xeniwema 'ena makumawetsie mekanu'uwakuni. 'Iki mekatenanutikuni kexemikateheu'enana, yunaiti xe'akuxiyuke.

34 Kwie xemukuxeitsie huta tewiyari tukari xepeyuri, hikita xeitukari pi'iniarini xeiwiyari. Huta tewiyari wiyari xekaniyurikuni xete'uka'eniwati 'axaxemite'uyuriki, mipai xekatenetimaikuni kenemitixe'aye'unie".

35 Ne Yawé nekanihikitini, nekati-naye'atiamiki kemire'uxa kenemutayi 'iki teiteri 'axamemite'u'iyari wahetsiemieme, mekaniyukuxeirieni menetsi'aye'unieti. 'Ena makumawetsie mekanikumawerikuni. 'Enatiti mekanikwikuni.

36 'Iya 'ukitsi Muitsexi miwarutani'akai kwie memixeiayuki miki mekaniyini, mehakunuaxiaka yikipita memite'uxa kename kwie 'axahe'aneakai. Mipai me'utiyuaku yunaiti teiteri mekaniuyu'uximatiani.

37 'Ayumieme 'iki 'itarikaki niuki memutsutia kwie hepaitsita miemeyari, Yawé hixie mekaniuk-wini kwiniyaki.

38 Yunaiti kwie memekuxeiyakai, Kutsuhexi xeikia kaniyuhayewa Nuni nu'aya meta Karewi Kepune nu'aya.

'Ixaheritsixi mekaniyuta'iniata kwietsie mieme

³⁹ Kepauka Muitsexi mitiutahayewaxi mipai ti-wakihaweti yunaiti 'ixaheritsixi mekaniutitsua-nakaitini karima meyuhiwerieti.

⁴⁰ 'Uxa'arieka ximeri paiti mekananutikine hiritsie 'amanutitewatsie 'ixaheritsixi mipai me'utiyuati:

—Tekanihuni kwie Yawé mitatsi haxatiatsie, mipai temitemateki kename 'axatete'uyuri.

⁴¹ Peru Muitsexi mipai katiniwarutahiawe:

—¿Titayari tawarita Yawé niukieya xekate'enieni? Hiki kexemiteku'eriwa yapikatiyunake.

⁴² Xika xeheukine xekana'iwariekuni, Yawé xehamatia mika'uyeikakiri.

⁴³ 'Amarekitsixi meta kananeutsixi wahamatia xekaneyutakwikuni, miki mekanixekwikuni 'ixiparaki. Xeme Yawé xemuku'eiri, miki pikaxeparewieni.

⁴⁴ Miki meka'enanati matsi mekanekine mihiriyatsie paiti, Muitsexi meta Yawé kakunieya tiratu mayeka wahamatia mekahayekineku mematiteitsie.

⁴⁵ Hiki 'amarekitsixi meta kananeutsixi mana memikiekataritikai mekaniwarutakwini mekaniwara'iwa, mewaruweiyati Kuxima mirayetewatsie paiti mekaniwaye'atiani.

15

'Aitsika mawarika hetsiemieme

¹ Yawé Muitsexi mipai katiniutahiawe

² 'ixaheritsixi mipai mitiwatahiawe: «Kepauka xemeutahaxiani kwietsie hakewa nemixehexatia mana xemutiteniki,

³ xika xewiti Yawé reumawiriemikini, xeime wakaxi, xeime muxa, meta mawari taipa warikariekame, mawari taiyariyari meta miyihiritiani mawariyari, yatini kemitiyuwairiya mawariyari, yatini 'ixiarari patsiekameki memiyukuxexeiriwa. Miki mawarika witsimu'ia Yawé minake,

⁴ kemi'ane yumawari miyetuani kanenayat-samiki hatsite mawariyari, huta kiruyari tiriku mitixiyari 'aixia mi'ane hatseiti xeirituruyariki pinariekame.

⁵ Yawé xika muxa nunutsi 'utimawirieni mawari taiyariyari mayaniki, yaxeikiata heutinikame xeirituruyari kaxie winuyari mitayeyuriwa.

⁶ »Muxa 'uki xika hikitini, hamatiana hatsite mawariyari kaniyetuamiki nauka kiruyari tiriku mitixiyari 'aixia mi'ane, hatseiti xeirituruyari heimana 'imeriyuki pinariekame.

⁷ Mita'iyarieniki winu xeirituruyari heimana 'imeriyu. Mipai 'aneti 'aixia 'u'iatu kanayeimiki Yawé hetsiemieme.

⁸ »Xika tsikeru xeime peyetuamiki mawari taiyariyari mayaniki, yatini kemitiyihiritia meye'atianiki, yatini 'aixia memiteyuxeianiki mawariyari Yawé hetsiemieme,

⁹ tsikeru hamatia pekanitimawamiki hatsite mawariyari, 'ataxewime kiruyari tiriku mitixiyari 'aixia mi'ane huta rituruyari hatseitiki pinariekame.

¹⁰ Yaxeikiata kaxie winuyari mitiyeuriwa huta rituruyari heutinikame. Taipa warikariekame mawariyari mayaniki, miki mawarika witsimu'ia

Yawé minake.

¹¹ Yuxexuiti wamawarikayari tsikeru, muxa 'uki, muxa temaiki, meta tsipu, yapitikuwewiwani kemire'iniari.

¹² Mipai pekatiniyurienemiki yuxexuime wahetsiemieme, tsepa kememiyupaime tewaxi pemiwayetua.

¹³ »Kemi'ane 'Ixaheri tewiyari mititimawa taipa miemeyaritsie, Yawé 'aixia miti'ikweki, 'iki 'aitsika kehaye'atiani.

¹⁴ Yatini ku'uwamete xehamatia muka yaxeikia katiniyurimiki taipa mawariyari meta 'aixia mu'ia Yawé hetsiemieme wewimikini 'iki 'aitsika kehaye'atiani,

¹⁵ xekiekaritsie xewiti 'aitsika xeikia kaniuyeikamiki 'ahetsiemieme meta 'ateewa kiekame hetsie 'akiekaritsie muka. 'Iki 'aitsika 'anuiwarima wahetsiemieme kanihikitini. 'Eki meta 'ateewa kiekame yaxeikia xekani'aneneni Yawé hixie.

¹⁶ 'Ayumieme miki 'aitsika xeyunaime xehetsie katini'aitani 'ahetsie meta kuyeikame hetsie 'ahamatia muka».

'Ikwaxi matiari mieme mawariyari

¹⁷ Yawé Muitsexi mipai katiniutahiawe

¹⁸ 'ixaheritsixi mipai mitiwatahiaweiki: «Kepauka kwietsie xemeutahaxiani hakewa nemixehewiti,

¹⁹ mana miretixuxuawere xika xetehetikwani, Yawé hetsie timieme xekateneyetuakuni.

²⁰ Kepauka matiari paa peme'imanitsie, mitiyetuiwatsie timieme pekaniyetuamiki, harina 'aixia mi'ane papayari.

21 Yunaiti 'anuiwarima mekateniyetu-
ayakuni yemeki Yawé hetsiemieme matiari
memite'imanitsie timieme.

*Mawarika 'axamitiuyuri hetsiemieme kepauka
mika'imani*

22 »Mipaita pitiiyiwe mipai xekateha'eriwati
'axaxepite'uyuriwawe, 'iniari niukiyaritsie Yawé
miyetua Muitsexi hetsia,

23 naime 'iniari Yawé mixeyetuirie Muitsexi
hetsia, kepauka mipai mutayi kename xenuiwari
wahetsiemimetini.

24 Xika 'axamete'uyurieni yunaiti kiekatari
mipai mekateha'eriwati, hiki miki xeime
tsikeru xeiwiyari hikame mekanitataiyakuni
witsi'u'iakame Yawé minake, kaxie winuyari
mitayeuriwa heutinikame, hatsite mawariyari,
xeime tsipu 'uki 'itiya mawariyari mayaniki,
kemire'uxa.

25 Hiki mawari wewiwame yunaime 'ixaherit-
sixi kaniwaxinamiki, mekateneuyehiwiwariekuni
memika'imaki, meta Yawé hetsiemieme
mawarika taiyariyari memuwewiki meta
'itiya mawariyari memuwewiki meta
'axamemite'uyuri meka'imaitiweti.

26 Yunaiti teiteri 'ixaheritsixi
mekateneuyehiwiwariekuni, meta 'ateewa
kiekatari, yunaiti 'axamemite'uyuriki
meka'imaitiweti yuhetsie.

27 »Xika yuxaita 'axatiuyurieni ka'imaineti,
xeime tsipu 'ukaratsi kaniyetuamiki xeiwiyari
hikame 'itiya mawariyari mayaniki.

28 Mawari wewiwame kanixinamiki Yawé hixie
'axamitiuyuri ka'imaineti. Mawari wewiwame

yakatiniyurimiki, hiki tewi 'axamitiuyuri katineuyehiwiyariemiki.

²⁹ 'Iki yuxewiti xeikia 'iniari yunaiti wahetsie kanimiemetini kemi'ane 'axamitiuyuri ka'imaineti, 'ixaheri tewiyari hetsiemieme meta 'ateewa kiekame wahamatia muka hetsiemieme.

³⁰ »Peru kemi'ane 'axamitiuyuri mima, tsepa mana munuiwakame yatini 'ateewa mikiekame, Yawé hixie 'axakatiniuyurieni. Miki yuteiterima watsata payeweyarieni.

³¹ Yuhetsie kanihimiki Yawé niukieya mutananaimaki, 'iniari niukiyaritsie yamikatikatiaki».

'Uxipiya tukari minanaima

³² Heiwamieme 'uxipiya tukaritsie, 'ixaheritsixi me'uxipiekaku makumawetsie, xewiti 'ixaheri kaniuxeyarieni kiyexi naiwame 'ineti.

³³ Hiki kemi'ane memixei meneiwitini Muitsexi meta 'Aruni wahetsia yunaime 'ixaheritsixi wahixie.

³⁴ Matari kananutahiyakatini xeikia, mikahahekiakaiki kememiyurienikekai.

³⁵ Hiki Yawé Muitsexi mipai katiniutahiawe: «Miki tewi ke'umierieni. Yunaiti 'ixaheritsixi mekeheittituaxixiani 'ateewa paiti».

³⁶ Hiki 'ixaheritsixi mematiteitsie 'ahetee-wakaku mekaneihana, mekaneittituaxixiani mekanimieni, Yawé Muitsexi kemirahawekai.

Matawi memaye'eriwaniki

³⁷ Yawé Muitsexi mipai katiniuta'aitiani

³⁸ 'ixaheritsixi mipai mitiwatahiaweki: «Xeme xeyunaiti xenuiwarima yukamixa

'amitititsie matawire xekanawipaxiakuni hiru miyitsikimaiyeki.

³⁹ Miki matawi xekamixatetsie kanix-eparewiewiki xemaye'eriwaniki, naime 'iniari niukiyari Yawé hetsiemieme xemikayuwairiyaniki xe'iyari kemitixekuyuitiwa meta xehixite ketita mireuhiwe'erie.

⁴⁰ Naime ne'aitsika xekanexeyakakuni, xekane'atiakakuni. Mipai xe'aneti neteiterima memipatsie xekanihikitikakuni

⁴¹ Ne Yawé xekakaiyari nekanihikitini, nemixe'ayewiti 'Ekipitu xekakaiyari nemayaniki. Ne Yawé nepihiki».

16

Kure, Ratani meta 'Awirani ke'axamemite'uyuri

¹ Merikite Kure 'Itsaxi munu'ayatikai, Kuhati miteukarieyatikai meta Rewi mitutsieyatikai. Meta xuwenitsixi Ratani meta 'Awirani 'Eriyáwi niwemama meta 'Uni Pereti niweya,

² miki Muitsexi hepaitisa mekate-niutixatatikine mewaparewiekaku huta tsienituyari heimana huta tewiyari heimana tamamata 'ixaheritsixi. Yunaiti miki mekani'uitiariiekaitini, memanuyetei 'ixaheritsixi memiwaranuka'uitiakai.

³ Mekaniuyukuxerieni Muitsexi meta 'Aruni wahepaitisa memeuniuniki, mipai mekateniwarutahiawe:

—Xemeri yemeki mamariwawemete xepayuyeitia. Xika 'iki kiekari patsieka meta kiekatari, ¿titayari xeme Yawé kiekarieya kutsiyarima xetehayuyeitiwa?

⁴ Kepauka Muitsexi mu'enaxi kememu-tiyuanekai, kaniukatunumakeni

⁵ mipaita Kure katiniutahiawe meta yunaime:

—'Uxa'a Yawé yapitayini kemi'ane hetsien-amieme mipatsie. Miki menayexei kanihikitini, miki kanita'inimiki.

⁶ Merikite Kure, mipai xekateniyurikuni 'uxa'a 'ateiterima yunaiti: 'ikwa taiyame xekaniti'ikuni,

⁷ tii xekanakayatsakuni 'ikwa witsimu'ia xeke-nakawiwixia Yawé hixie. Kemi'ane manayex-eiya miki kanihikitikamiki. Xemetiti Rewi niwe-mama xepihiki kwinimieme memitehanutihu.

⁸ Muitsexi Kure mipai katiniutahiawe:

—Hikita xekeneneu'eni rewitsixi.

⁹ ¿Kamitsi tixaiti xekatehayeitia Yawé mixe'anayexei 'ixaheritsixi watsata 'ahurawa 'auriena xemu'uwaniki, Yawé tukita xemite'uximayakaki, hipati memika'ane wahepai xemite'uximayakaki?

¹⁰ Kakaiyarititi yu'aurie kanixeti'uitiaka, 'eki meta rewitsixi yunaiti, ¿hikita mawari wewi-wamete xetekiniku?

¹¹ 'Eki, 'ateiterima yunaiti xekaniuyukuxerieni Yawé hepaitsita 'axaxe'utiyuati, tixaiti 'Aruni pikatihiki xeminiukima.

¹² Muitsexi Ratani meta 'Awirani, 'Eriyáwi niwemama katiniwarutani'airieni, peru miki mipai mekaniutiyuani:

—Tame tepikahu.

¹³ ¿Kamitsi tixaiti pekarayeitia pemitatsi'ayewiti hakewa retsi meta xiete waikawa mexuawe, pemitatsikwiximeniki 'ena makumawetsie ti'aitame pemayuyeitianiki tahetsie?

14 Kaniyuritini 'eki pepikatatsi 'atiawe 'akuxi hakewa xeniu retsi meta xiete waikawa mexuawe meta kwiepa miraka'etsitire meta kaxie haraweriyari pepikatatsiyetuiriewe. Xiari tekaheuneniereme pekatani'erieka para temimatsi'uweiyaniki. Tame matsi tepikayehu.

15 Hiki Muitsexi waikawameki ha'ati, Yawé mipai katiniutahiawe:

—Wamawari pepikanaki'erieka tita memitehapini, ne xeime nixeime wapiinite nepikatiwanawairiewe meta watewama nepikatiwakwinitia.

16 Muitsexi Kure mipai katiniutahiawe:

—'Eki meta 'ateiterima meta 'Aruni 'uxa'a 'ena Yawé hixie xekaniti'uikuni.

17 Yuxexuiti xeme Yawé hixie 'ahurawa xekaniikinikuni 'ikwa taiyametsie 'ikwa witsimu'ia hipineme xe'u'iti, huta tsienituyari heimana huta tewiyari heimana tamamata 'ikwa taiyame xe'u'iti 'ahurawa xekaniikinikuni. Meta 'eki 'Aruni hamatia yuputsiwiwame xekananu'uikuni.

18 Hiki yuxexuiti 'ikwa taiyame me'u'iti 'ixuriki tukiari hixie mekaniti'uni, Muitsexi meta 'Aruni wahamatia.

19 Kepauka Kure yunaime yuteiterima muwarukuxeiri Muitsexi meta 'Aruni wahapaitsita 'axamemitiyuaneikai 'ixuriki tukiari hixie Yawé yuxawatiriya kaniuhekiata miki wahixie.

20 Hiki Yawé Muitsexi meta 'Aruni mipai katiniwarutahiawe:

21 —Xekeneutayeixia miki teiteri wahamatia xepikati'uka, ne nekaniwakwimiki hiki.

²² Hiki Muitsexi 'Aruni hamatia kwiepa meka-niukahixima'uni, mipai mekateniuihiwa:

—Yawé, yunaime teiteri wahetsiemieme pemikakaiyari: xewiti xeikia tewi 'axapitiuyuri, ¿'ekita petiyeha'ani yunaime 'iki wahetsiemieme?

²³ Hiki Yawé Muitsexi mipai katiniutahiawe:

²⁴ —Yunaime 'ixaheritsixi mipai ketiniwaru-tahiawi Kure, Ratani meta 'Awirani waxamaru mati'u mepika'ukikani.

²⁵ Hiki Muitsexi meta 'ukirawetsixi 'ixaheritsixi wahetsiemiemete mekanekine hakewa memetitekai Ratani meta 'Awirani.

²⁶ Hiki Muitsexi 'ixaheritsixi mipai katiniwaru-tahiawe:

—'Iki 'axamemite'u'iyari waxamaru 'aurie xepika'u'uwani. Tixaiti wapi-
ini xepikatekumaiwani, xemeta kapa
xete'ukwinitiarieniki miki 'axamemite'uyuriki.

²⁷ Hiki teiteri mekaneutayeixiani, Kure, Ratani meta 'Awirani waxamaru 'aurie. Ratani meta 'Awirahami 'amemitewayeki yuxamaru kitenie, mana mekaniti'ukaitini yu'itama meta yuniwema mewarawititi.

²⁸ Muitsexi tawarita mipai kaniutayini:

—Hiki xekatenetimaikuni xika Yawé netsini'aka yati kenemitinekihiawe xeikia nepitiyuriene.

²⁹ Xika 'iki teiteri kwiniyaki me'ukwini, 'ana mipai katinimatsiikini kename ne Yawé kanetsi-heyen'a.

³⁰ Xikata Yawé hekwameki yiki tiuyurieni kwie 'anutayepieni, xika wareukakwani meta naime wapiinite, xika me'ayeneniereti meheuka-teukieni, hiki 'ana mipai xekatenetimaikuni kename miki Yawé tixaiti katihikitime me'ayeitia.

³¹ Kepauka Muitsexi 'amitiutahayewaxi, kwie wahetia kaneukapene,

³² kaneukaxaware kaniwareukakwani, miki meta watiiriyama, meta hipati teiteri Kure tipiinieya naiti.

³³ Me'ayeneniereti kwietia mekaneukayune, meta naiti tita memitehexeyakai, kwie waheimata nanunare. Mipai miki mekateniukumaweriyarieni 'ixaheritsixi watsata.

³⁴ Yunaiti 'ixaheritsixi mekaniyuta'unaxiani mewa'enietu mipai mete'uhiwati:

—Tepitinautsa, tameta kwie tatsi'anukakwani.

³⁵ Meta miki 'ukitsi huta tsienituyari heimana huta tewiyari heimana tamamata 'ikwa taiyame memu'ikai Yawé taiki kaniwarukwini.

'Ikwa taiyamete

³⁶ Yawé Muitsexi mipai katiniutahiawe:

³⁷ «'Eriyatsaxi mawari wewiwame mipai ketineuta'aitia 'Aruni nu'aya, 'ikwa taiyamete mipatsietika mi'iimieki, mana tixariyari muyuhayewaxi kehewiwieni 'ateewa paiti.

³⁸ 'Ikwa taiyamete keneuti'ii 'iya 'axameteyurieti memukwi tiwapiini, kimana mawari taiyame pekanikawiriamiki. Mikitsi kanipatsietikani, Yawé miyetuiriyarieki, miki 'iniari 'ixaheritsixi wahetsiemieme mihikitiniki».

³⁹ Hiki mawari wewiwame 'Eriyatsaxi miki 'ikwa taiyamete kaniuku'ini, mikiki tepia weweriti mitiwewiyaniki katiniuta'aita mawari taiyame heima mikawerarieniki.

⁴⁰ Miki tepia muwa kaniuyuhayewa 'ixaheritsixi memimakaxeniki, xewiti 'Aruni kaxiyyarieyatiti meta mipai kati'aitarieti mipai

mikatiyurieneniki Yawé 'ikwa witsimu'ia mikatairiekaki, xika mipai tiuyurieni Kure meta niwemama wahepai mekatenikwikuni, mipai katiniuyini Yawé Muiťsexi kemitiuta'aitiakai.

'Aruni teťteri wahetsie kemitiutanua

⁴¹ 'Uxa'ariekata, yunaiti 'ixaheritsixi Muiťsexi meta 'Aruni mekaniwarutiniukimatikine mipai me'utiyuati:

—Xeme Yawé teťterimama xekaniwarukwini.

⁴² Teťteri 'axamemutiyuanekaiki Muiťsexi meta 'Aruni wahepaitsita miki mekanekine 'ixuriki tukiyarita. Hiki yapauka hai tuki kananukanani, Yawé xawatiriyaya kaniuyuhekiare.

⁴³ Hiki Muiťsexi 'Aruni hamatia mekanewa'uni tuki hixie,

⁴⁴ Yawé Muiťsexi mipai katiniutahiawe:

⁴⁵ —'Tki teťteri pepikawanika, ne hiki nepiwatixitsitiani yunaime.

Hiki miki mekaniutihixima'uni kwiepa,

⁴⁶ hiki Muiťsexi 'Aruni mipai katiniutahiawe:

—'A'ukwa taiyame keneuti'ika mana tii kenekayatsaka mawari taiyametsie mieme, muwa 'ikwa witsimu'ia mana kenekawiwi, kenemie mexiima hakewa memeyuxeirie watsata, mana pemiwarexinaki, Yawé haxiaya kaninuani wahetsie meta 'iwaíyi wahetsie katiniunake.

⁴⁷ 'Aruni yakatinikayani Muiťsexi kemirehiawekai, kaniutanautsa teťteri wahixiapa mitakeniki. 'Iwaíyi wahetsie katiniunakekaitiniri, hiki 'Aruni 'ikwa witsimu'ia kaniutaiya teťteri kimana memixinarieniki.

⁴⁸ Mana memayeneniere meta memikwikwi'i watsata kaniutakeni, 'ana kwiniya katini-uhayewa.

⁴⁹ 'Ana tamamata heimana nauka miriyari heimana 'atahuta tsienituyari teiteri mekaniukwini, meka'iniariti Kure hamatia memukwi.

⁵⁰ Hiki kememitekwi'ikai heunuaku, 'Aruni kan-inuani tuki hixie hakewa Muitsexi mekatei.

17

'Aruni 'itsiya

¹ Yawé Muitsexi mipai katiniutahiawe:

² «'Ixaheritsixi mipai ketiniwarutahiawi tamamata heimana huta 'itsi mepa'ini xeinuiwariyarit-sie miemete xexuime. Wa'itsitsie mepa'utikani kemititewaka nuiwari.

³ Rewi 'itsiyatsie 'Aruni pita pekaneu'utiamiki, yuxexuiti memanuyetei yu'itsi mekanex-eiyakakuni.

⁴ Tiratu kakuniyari manuka hixie keneuti'uitia hakewa xehamatia nemiretixaxata.

⁵ Kemi'ane 'itsiya mitayira miki neme-nayexeiya kanayeimiki. Mipai 'ixaheritsixi mekatenihayewakuni menetsi'uximatiati ke'axamemutiyuane xehepaitsita».

⁶ Hiki Muitsexi 'ixaheritsixi mipai katiniwarutahiawe, memanuyetei tamamata heimana huta 'itsi mekaniyetuaxiani, xexuime nuiwaritetsie miemete. 'Aruni 'itsiya wahamatia kanayewekaitini.

⁷ Muitsexi 'aixia katini'uitiani tukita paiti Yawé hixie meta tiratu kakuniyari muyeka hixie.

⁸ 'Uxa'arieka ximeri Muitsexi heutahaku tiratu kakuniyari muyeka, kepauka 'Aruni 'itsiya muxei Rewi nuiwariyaritsiemieme kaniyirakaitini 'arimetira, 'etsipepeti heukateti meta tuturiyari yutakariyari hexeiya.

⁹ Hiki Yawé hixie naime 'itsite kanewaye'ini, 'ixaheritsixi wahixie kaniti'uitiani, memixeiyaki kemitiuyikai, hiki yuxexuiti yu'itsi mekaniuti'ini memanuyetei.

¹⁰ Yawé Muitsexi mipai katiniutahiawe: «Hutarieka 'Aruni 'itsiya tiratu kakuniyari hixie keneutiketsa, mana mekanixeiyakuni 'axamemutiyuane. Mipai mekatenihayewakuni 'axame'utiyuati nehetsiemieme meta 'ixaheritsixi memikakwi'iniki».

¹¹ Muitsexi yakatiniuyurieni Yawé kemitita'aitiakai.

¹² Hiki 'ixaheritsixi Muitsexi mipai mekateniutahiawe: «Tame tekanitatimaiyariiekuni, yemeki tekaneuyewekuni. Tekanikwikuni.

¹³ Yunaiti kemi'ane Yawé tukieya manuwe memiye'axe mekanitakukuweni, 'ayumieme tame teyunaiti tekanikwikuniri».

18

Mawari wewiwamete meta rewitsixi kemitiwahiritiarika

¹ Yawé 'Aruni mipai katiniutahiawe: «Yunaiti Rewi xiiyarimama muwa mitipatsietika mirayepine 'aurie mepika'ukikani, 'eki meta 'aniwema xehetsie xeikia katinahiyamiki, xeme xika 'axaxete'uyurieni kemikatixe'uximayatsika xemimawari wewiwameteki.

2 Kepauka 'eki meta 'aniwema xemite'uximayaka 'ixuriki tukiyarita kakuni tiratuyari muyeka, xe'iwama Rewi nuiwarimama mekanixeparewiewakakuni.

3 Miki mekameniparewiewakakuni kepemitiyurieneni, miki mekani'iwikakuni 'ixuriki tukiyar, 'ahurawa xeikia mepika'ukikani piinite mitipatsietika 'aurie meta mawari taiyametsie, xemikatakukuweniki.

4 Miki 'aparewiwamete mekanihikitikakuni, tuki mekanixeyiakakuni meta naiti muwa kemitikumayiiwa. Merikite kepauka xeme xemite'uximaya xewiti pikaxeparewieka mipai mikaranayexeyarie.

5 »Xeme xeikia xekatenikumaiwakuni mitipatsietika meta mawari taiyame hetsie mirakapine, nehaxia tawarita 'ixaheritsixi nemikawakupitiwaniki.

6 Mipai ketinemaika ne nekatiniuyurieni nemiiwaranayexei, 'ixaheritsixi watsata, 'a'iwama Rewitsixi nemimatsiyetuirieniki 'imikieri hepai. Miki Yawé hetsiemimeteri mekanihikitini 'ixuriki tukiyarita memite'uximayakaki.

7 'Eki xeikia meta 'aniwema nekanixepitiaka xemimawari wewiwametetiniki, xemitekumaiwaniki mawari taiyametsie timieme meta 'ixuriki meuwie warita timieme. Xeme nekanixepitiaka xemimawari wewiwametetiniki, kemi'ane tawarita 'ahurawa mayani mitimaiwetikatsie mipai katipitiarieti kanimimiki».

Mawari wewiwamete ke'aixia memiteyurieka

⁸ Yawé 'Aruni mīpai katiniutahiawe: «Ne neka-matinihiritiaka naime mitimaiwetika 'ixaheritsixi memiteyetuaya. 'Eki meta 'aniwema nekatini-eyetuirieka xehetsiemieme 'aixia miti'ane, 'iniari 'aitsikayari hepai.

⁹ 'Ahetsiemieme katinayeikamiki piinite kwinimieme mitimaiwetika mikatititaiyariwa. 'Ahetsiemieme katinihikitikamiki 'ixaheritsixi memitimawani hatsite hamatia, 'itiya mawariyari meta wahetsie mirahiwa mawariyari. 'Iki naime meminete'atirieni waikawa mitipatsie katinihikitikamiki 'ahetsiemieme meta 'aniwema.

¹⁰ Pekatinikwakamiki waikawa mitipatsietika, mīpai pekatinimaikamiki. Yunaiti 'ukitsi mekanitikwa'akuni.

¹¹ »Metatsiere mitiyetuiwa 'ahetsiemieme katinayeimiki mawari teiki hetserarieti 'uyuitiariwati 'ixaheritsixi memiteyetuaya. 'Eki meta 'aniwema 'ukitsi 'ukari 'aitsika nekaniwayetuirieni yuheye-meki 'amititeriwe.

¹² »Matiari timiemete memite'atiwa Yawé hetsiemieme, nekamaniyetuirieka hatseiti 'aixia mi'ane, winu mihekwa meta hatsite.

¹³ Miki kwie matiari mitiutixuaweriyatsiemieme miki mekateni'atiakuni, neta nekameniye-tuiriemiki. Kemi'ane tewi mi'itiya mitikwani kaniyiweni.

¹⁴ »Naiti 'ixaheritsixi Yawé naimeki memiteyetuiwa 'apiinite katinayeimiki.

¹⁵ Yunaiti matiari nuiwakate Yawé hetsiemieme memiyetuiwa 'ahetsiemieme katinayeimiki, tsepa tewi yatini tewaxi. Peru pekanitawikweitsitiamiki matiari nuiwakame tewi yatini tewa 'axia mika'ane.

16 Pekanitawikwetsitiamiki kepauka
matiari mieme xeimetseri mexeiyani.
Mitawikweitsitiarieniki katinaye'akamiki
'aixiwime pirata tuminiyari, kemi'ti'iniata tuki,
tamamata heimana xewi kiramuyari raheteme.

17 »Peru pepika'itawikweitsitiani matiari mieme
tuuru, muxa nu'aya, tsipu nu'aya, miki 'aixia
memipatsieki. Xuriyaya mawari taiyametsie
pekanitayeurimiki, wiyarieya pekanitataiyamiki,
'aixia mu'ia Yawé hetsiemieme mayaniki.

18 Waiyarieya 'ahetsiemieme kanayeimiki,
yaxeikiata tawieya mawariyari teiki hetserarieti
muyuitariwa meta teurieya tserietana mieme.

19 Ne Yawé nekametinietuirieka naima
mitipatsietika 'ixaheritsixi memineteyetuirie.
Katini'ahetsiemiemetini meta 'aniwema 'ukitsi
'ukari, 'aitsika hepai. 'Iki tiratu 'aixia mi'ane
kanihikitini, mutseyumarie nehixie 'unaki. Tiratu
nekaniwewieka 'ahamatia meta 'anuiwarima
wahamatia».

Rewitsixi kememiteyetuiriyarie

20 Yawé 'Aruni mipai katiniutahiawe:
«'Eki kwietsie tixaiti pepikatipitiarieni, kwie
pepikaxatiarieni 'ixaheritsixi watsata, ne
nemi'ahetsiemiemeki, ne tita pemitimikieni
nekanihikitini.

21 »Rewitsixi nekaniwayetuirieka 'ixuriki
tukiyarita memite'uximayaki, 'ixaheritsixi
memiteyetuaya tamamatatsie mieme xeime.

22 'Ixaheritsixi xika 'axamete'uyurieni
'ixuriki tukiyari hixie 'ahurawa me'ikineme
mekanikwikuni.

23 'Ayumieme rewitsixi xeikia 'ixuriki tukiyarita te'uximayatamete mekanihikitikakuni 'ixaheritsixi wahetsiemieme. Hutarieka 'iki 'aitsika kanihikitini 'umemahu wahetsiemieme: Rewitsixi tixaiti mekapiteyetuiriarieni,

24 ne nemitiwayetuiriki tamamatatsie mieme 'ixaheritsixi memiteyetuaya Yawé hetsiemieme xeime. 'Ayumieme mipai nekanaineni tixaiti memikateyetuiriarieniki 'ixaheritsixi memiteyetuiriarienitsie».

Tamamata hetsiemieme xeime
memiteyetuayakai

25 Yawé Muiteixi mipai katiniuta'aitiani

26 Mipai mitiwatahiaweki Rewitsixi: «Kepauka xemite'anupineni tamamatatsie mieme xeime 'ixaheritsixi memiteyetuaya, manata xepite'anakapini tamamatatsie timieme xeime xemineteyetuirieniki.

27 Xeme xemineteyetuirieni tiriku meripaiti mieme hepai nekatini maimiki, yatini kaxie winu-yari witsi'aneti mayeika.

28 Mipai xekateniyuriekakuni nehetsiemieme xekatenanakapinekuni, xemiteyetuayaniki yuhetsiemieme, 'ixaheritsixi memiyetuaya tamamatatsie timieme, miki 'Aruni mawari wewiwame xekateniyetuiwakuni.

29 Titaki xemite'anayexeiyarieni, nehet-siemieme xekateniti'utakuni xemiyetuayaniki. 'Aixia ti'aneneme tipatsiekame xekaneteniye-tuiwakuni.

30 »Kepauka 'aixia ti'aneme xeminetexatiani, miki mipai pitimatsiikini winu hepai yatini 'imiari hepai.

³¹ Tita mitiyuhayewa, miki xeme meta xeniwema yunaiti tsepa naitсарie xemitikwai piyiweni. Mipai xekatenipitiariekakuni 'ixuriki tukiyari muyepatsieta xemite'uximayaki.

³² Xenetsiyetuiiriemeri tamamatatsie miranukapiwa, mitiyuhayewari pikatimaiweni tsepa xemitekwa'a.

»Xepikatetsewiximaka mitipatsietika 'ixaheritsixi wamawari, xika mipai xeteyurieka xekanikwikuni».

19

Memika'itiyatika memi'itiyaniki

¹ Yawé Muiťsexi, 'Aruni mame mipai katini-warutahiawe:

² «'Ikita 'aitiarika 'iniari niukiyaritsie kanimiemetini ne Yawé nemiyetua: 'Ixaheritsixi wakaxi mekani'atiakuni heuxetame, 'aixia 'aneme katikuyeme, katakwietsanaweme xekaniyetuiriekuni.

³ Mawari wewiwame 'Eriyatsaxi xekaniyetuiriekuni, miki katinita'aitamiki mematitei takwayaritsie wakaxi manuyehanieniki, hixiena kananutixitekiemiki.

⁴ Hiki mawari wewiwame xuriyatsie kameme, 'atahutamexia 'ixuriki tukiyaritsie katineu'iyamiki.

⁵ Metatsiere wakaxi hixiena mitataiyarieniki katinita'aitamiki. Nawiyarieya meta waiyarieya, xuriyaya metatsiere kwitaya kanititaiyariemiki.

⁶ Hiki mawari wewiwame kariuxa xawari kanitihurimiki meta 'itsupu xawari, metatsiere

tuwaxa mixelaki, miki taipa katineuwiwimiki hakewa wakaxi metaiyarie.

7 'Imatirieka mawari wewiwame yupiinite katiniti'ekwamiki meta kaniti'iwamiki. 'Anake kaninuamiki memaititeitsie, peru 'akuxi ka'itiyati kaniyuhayewamiki kepaukake mikiyiretsie.

8 Metatsiere kemi'ane wakaxi mutataiyaxi kaniyuti'ekwamiki kaniti'iwamiki, ka'itiyati 'akuxi kaniyuhayewakamiki kepaukake mikiyiretsieke.

9 »Xewiti tewi 'itiyati wakaxi naxiyari kaniku-tuimiki, 'ateewa paiti kanenutuimiki. Muwa kaneikayemiki naxi 'ixaheritsixi 'itiya mawari-yari mematiwewiwatsie meta haa 'aixia mi'ane mekaniniitiakuni.

10 Kemi'ane wakaxi naxiyari mukutuni, mikita kaniyuti'ekwamiki ka'itiyati 'akuxi kaniyuhayewamiki kepauka mikiyiretsieke 'itiyati kanayeimiki. 'Iki 'aitsika yuheyemeki pihikitini 'ixaheritsixi wahetsiemieme meta 'ateewatari wahamatia memititei.

Haki kememite'itiyakai

11 »Kemi'ane xeime tewi mikime mimayiani, miki ka'itiyati kanayeimiki 'atahuta tukari.

12 'Aixia puyuyurieni, hairieka tukari 'anukamiekaku meta 'atahutarieka tukaritsie haa 'aixia mi'ane kaniyu'itimiki, mipai 'itiyati kanayeimiki xika mipai katiuyurieni pika'itiyani.

13 »Kemi'ane miki 'umayame 'aixia mikayuyurieni, Yawé tukieya kaninanaimaka. Miki tewi kanikumaweriyariemiki 'ixaheritsixi watsata 'axa'aneti muyuhayewaxiki 'aixia mikayuyuriki haa 'aixia mitiyuyuruwaki.

14 »'Iki 'aitsika kanihikitini kepauka kemi'ane 'ixuriki xamaruyaritia mimini: Yunaiti kemi'ane muwa memeutahaxiani, yunaiti kemi'ane muwa memayeteni, 'axamekani'itiariekakuni 'atahuta tukari.

15 Xika xarite 'aixia kareukunatikani naiti mikitsiere ka'itiyati kaniyuhayewamiki.

16 »Kemi'ane miki memayiani yeuta 'uyeikati 'umierieku, yatini yikimana 'umiku, yatini 'umeyari 'umayiani, yatini miki teukiya, 'atahuta tukari ka'itiyati kanayeimiki.

17 »Xeime tewi 'aixia muyurieniki 'axami'itiarie, xarita naxi kaniukawiwemiki 'itiya mawariyari hetsie, meta haa haixatamieme kaniukatuar-iemiki.

18 'Anatari xewiti 'aixia 'aneti 'itsupu kaniti-hawiyamiki, xamaruya kanita'iyamiki naime pi-initeya meta hamatiana memititei. Metatsiere kanita'iyariemiki kemi'ane 'umete mekumayia, yatini miki teukiya, yatini xewiti hemierieku, yatini yikimana 'umiku.

19 Tewi mi'itiya kaniti'iyamiki hairieka tukaritsie meta 'atahutarieka tukaritsie. 'Atahutarieka tukaritsie tewi mika'itiya 'itiyakame kanayeitiamiki, miki kaniyuti'ekwamiki kaniti'iwamiki. Mipai mikiyiretsie 'aixia 'aneti kanayeimiki.

20 Xika tewi mika'itiya ka'uyu'itieni, kanakumaweriyariemiki 'ixaheritsixi watsata Yawé tukieya ka'itiyakame mayeitiaki. Miki tewi pika'itiyaka haa 'aixia mitiyuyuruwaki mika'uyu'itiki.

21 'Iki 'aitsika yuheyemeki pihikitini 'ixaheritsixi wahetsiemieme.

»Kemi'ane haa mimayiani mikita kaniyuti'ekwamiki, kemi'aneta haa mumayuani 'aixia tiyuyuruwame mikita 'axakani'itariemiki kepaukake mikiyire 'anake 'aixia kaniyimiki.

22 Tewi mika'itiya tita mitimayiani mikita kati'itiyati katinayeimiki, kemi'aneta miki mimayiani ka'itiyati kanayeimiki».

20

Haa 'aitsie kemirane

1 Yunaiti 'ixaheritsixi makumawetsie Tsini mekanu'axiani mexiakame metseriyaritsie, Karetsi rakutewakaku mekanitiyaxe. Mana Miriyami mamitsie meta mana kaniukateukieni.

2 Mana haa waikawa mumawekaiki, 'ixaheritsixi mekanitiniukixietikine Muiťsexi hepaitsita meta 'Aruni,

3 Muiťsexi mipai mekatenuatieni: «Yawé kuta ta'iwama wahamatia temekwiniki mitanepitiakaitini.

4 ¿Tami tame Yawé tekateteiterimama? ¿Tita-yari 'ena makumawetsie petareyewiti temikwiniki tatewama wahamatia?

5 ¿Titayari 'Ekipitu petarayewiti 'ena 'axa'aneikia petati'atia? 'Ena kaniumaweni 'imiari, piní, kaxie, 'ikwaxi mayehatsiyatika, matsi 'akuxi haa tiu-mawe».

6 Muiťsexi meta 'Aruni mewaruhayewaka mekanekine 'ixuriki tukiyari hixie, mana mekanitihixima'uni. Hiki Yawé xawatiriyaya kaniyuhekiata wahixie,

7 Yawé Muiťsexi mipai katiniutahiawe:

8 «'A'itsi keneutikwe'i teiteri keni-warukuxeirieka. Miki wahixie 'eki meta 'Aruni, 'ai mipai xekatenitahiawikuni haa kehanetiani. Mipai xeteyurieyu haa kananemiki teiteri meta tewaxi xekaniwatiharitiakuni».

9 Yawé kemainekai mipai Muiťsexi katiniuyurieni, 'itsi kaniutikweni Yawé hixie mutiwekai.

10 Hiki Muiťsexi, 'Aruni hamatia teiteri mekani-warukuxeirieni 'ai hixie, Muiťsexi mipai kaniutayini: «Xekeneu'enana, 'axaxemite'u'iyari. ¿Kamitsi teteyiwawe 'iki 'aitsie haa temanetiani?»

11 Mipai 'utayika yu'itsiki 'ai hutakia kaniuwani, hiki haa kananeni waikawa, mana teiteri meta watewama mekaniutihareni.

12 Yawé, Muiťsexi 'Aruni mame mipai katini-warutahiawe: «Nehetsie yuri xemikate'erieki, kenemitipatsie xemika'imateki 'ixaheritsixi wahixie, xeme xepikahikitini xemiwaranuwitini hakewa kwie nemixehexatia».

13 Miki haa mipai katinimatiwani, haa manakaxiriwe Meriwa, mana 'ixaheritsixi Yawé memutatiki, mana kemitipatsie muyuhekiataxiki.

'Erumi 'Ixaheri huyeyari mutikweri

14 Karetsi 'ukaiti Muiťsexi kaniwareni'ani tex-axatamete ti'aitame 'Erumi kiekame hetsia, mipai tiwarahiaweti:

«Mipai 'a'iwa 'Ixaheri kanaineni: “'Eki pepitimate kehepai temite'uka'eniwa.

15 Pepirakumate tatutsima 'Ekipitu memeki, hakewa miixa wiyari teme'uwakai, metatsiere pepitimate 'Ekipitu kiekatari kememitate'u'uximatiakai tame meta tapaapama.

16 Metatsiere pepitimate Yawé ketemite'utawawiri tatsi'u'enieka, yuniuki tu-ayame kataneyeni'airieni 'Ekipitu mitatsi'ayewiti.

»"Enari tekaniuhuni Karetsi, hakewa 'akwie meka'atika.

17 Mipai tematewawirie pemitatsipitianiki 'akwietsie temuyekineki. Yuriki mipai nepaine nixeime 'a'etsaripa mana tepikaheuyekine meta xeime putsuta tepikahetihareni. Huyeta xeikia tepiyehu 'amatayewa 'utima, hawaiki tekaheukuyuyupiketi kepaukake temanuyekine"».

18 Hiki ti'aitame 'Erumi kiekame mipai katineini'airieni:

«Hakewa nemire'aita 'etsiwatima mana xepika'uyekikani, xika mipai xeheyini, ne nekanayeyeimiki nekuyaxima newarawititi muwa tekanixehetaxeiyakuni».

19 'Ixaheritsixi tawarita mipai mekaniutiyuani:

«Huye 'amatayewa 'utima xeikia tepiyehu, xika tatewama yatini tame hawaiki 'aputsuta tehetihareni tepite'ayukatuani. Tame tematsi-wawirie xeikia mana temuyekineki».

20 'Erumi kwieyaritsie ti'aitame haxiama mipai kaniutayini:

«'Ena xeme xepika'uyekine».

Hiki kanayeyani kuyaxi waikawa memiyiwawe warawititi,

21 kawapitianike kwieyatsie memuyekineki. Hiki 'ixaheritsixi xaitsie pita mekaneukani'arieni yamekateha'eriwati.

'Aruni kaniumiini

22 Hiki yunaiti 'ixaheritsixi Karetsi mekanayekine Huxi hiriyaitsie mekanu'axiani,

23 'Erumi kwieya mata'atikatsie. Mana Yawé Muiťsexi meta 'Aruni mame mipai katiniwarutahiawe:

24 «'Aruni 'apika'uyeikani 'ena kwiepa 'ari kanimimiki, kwie hakewa 'ixaheritsixi nemwarexatia mana pikaheutahani, xeme xeyuhutati xemikanetsi'anu'eniki kenemixerahiawekai haa Meriwa maneikakait-sie.

25 Hiki 'Aruni meta nu'aya 'Eriyatsaxi keniwaranuwitiki Huxi hiriyaitsie.

26 Mana 'Aruni pekanetikemariapiemiki mawari wewiwame kamixateya miranakatiki, nu'aya 'Eriyatsaxi pekatananakatitiamiki, manari 'Aruni kanimimiki».

27 Muiťsexi yakatiniuyurieni Yawé kemirehiawekai. Yunaime teiteri wahixie, yuhaikati Huxi hiriyaitsie mekanitiyune.

28 Hiki Muiťsexi, 'Aruni mawari wewiwame kamixateyari kanenutihinirieni, 'Eriyatsaxi pita kananakatitiani. Mana hiriťsie 'Aruni kaniimini. Hiki Muiťsexi 'Eriyatsaxi hamatia hiriťsie mekananakakine.

29 Kepauka yunaiti memitehetima kename 'Aruni hemikai, xetewiyari heimana tamamata tukari mekanitsuariwiyatiwekaitini.

21

'Arari kemira'iwarie

1 Kepauka kananeu tewiyari miti'aitametikai 'Arari kiekariyaitsie, Nekexi 'ukaiti, katineti-mani kename 'ixaheritsixi Hatarimi huyeyari

'utia mehahu, kaniwarutakwini hipameta kaniwarutiwiya.

² Hiki 'ixaheritsixi mipai mekaniutiyuani Yawé hetsiememe: «Xika 'eki teme'iwa yapehaineni mitatsi'aye'unie, naime wakiekari tekanka'unakuni».

³ Yawé kaniwaru'enieni 'ixaheritsixi kememite'iwawiriekai, kaniwarupitiani kananeutsixi memiwara'iwaki, yunaime teiteri mekaniwarukwini meta wakiekarite mekaniuka'una. 'Ayumieme mana Kuxima katiniuteriwarieni.

Kuu wurunitseki miwewiya

⁴ 'Ixaheritsixi mekanayekine Huxi hiriyaritsie Haramara Mixeta hepatsie me'eerieti, 'Erumi kwieyari warita me'ahuti. Huyeta me'uhuti mepikate'unenewi

⁵ mekaniutiniukixietikine Kakaiyari hepaitsita meta Muiťsexi:

—¿Titayari kuta 'Ekipitu xetatehayewiti maku-mawetsie temikwiniki? 'Ena 'ikwai haa kaniu-maweni. 'Ariri ta'iyaritsie katineuyemieni 'iki 'ikwai kwaiyariki.

⁶ 'Ayumieme Yawé kuuterixi memimiya kaniwareyeni'airieni memiwatikeniki, 'ana yumiireti 'ixaheritsixi mekaniukwini.

⁷ 'Ixaheritsixi Muiťsexi 'aurie me'ukineka mipai mekatenitahiawe:

—Yawé hepaitsita te'uniukixieka 'ax-atepите'uyuri meta 'ahepaitsita. Yawé keneutawawiri kuuterixi miwakumaweriyaki.

Muiťsexi wahetsie 'utanuaku,

⁸ Yawé mipai katinitahiawe:

—Kuu 'ikiyari keneutawewieka, kiyetsie 'ateewa keneuyeteka. Kemi'ane mekukeiwati kwimemix-eiya mekanitawikweikuni.

⁹ Muiťsexi kuu 'ikiyari purunitseki 'utawewieka kiyetsie 'ateewa kaniyetení. Kemi'ane me'utikeiyaka kuu kwi memukuxexeiyakai meputawikweitsitíariwakai.

Muhawi huyeyari

¹⁰ Hiki 'ixaheritsixi mekaniyekíne 'Uwuti rakutewakaku mekanitiyaxe.

¹¹ Manata 'Uwuti memíyekí 'Iye-'Awarini rakutewakaku mekanitiyaxe makumawetsie, Muhawi 'aurie tau makayuyuipe hepatsie.

¹² Manata memíyekí mayeweritsie Tsereri mekanitiyaxe.

¹³ Manata memíyekí haa 'Axinuni 'anutaíye mekanitiyaxe, makumawetsie 'amuxeutsixi wakwietsie muyehane. Haa 'Axinuni manuyehane kani'iniaritíni muhawitsixi wakwie meta 'amuxeutsixi kwieyari manuye'atíkatsie.

¹⁴ 'Ayumieme puyuteríwaniá Yawé kemitiyutami xapayaritsie:
«Haramara Mixeta hepatsie, mayeweweritsie meta haa 'Axinuni.

¹⁵ Mayeweweri mukiatsie 'akaniyeuka 'Axi meta Muhawi kwieyari manuye'atíkatsie».

¹⁶ Manata memíyekí Wehexi paití, putsu matinieretsie Yawé hakewa Muiťsexi mipai mitiutahiawixi: «Yunaime teiteri keniwarukuxeiri ne nekaniwaharitimiki».

¹⁷ 'Ana yameteyurieti 'ixaheritsixi mipai mekate-niukwika:
«Haa kehewatineni.

Putsu ke'utakwika.

¹⁸ Miki putsu, te'aitamete yu'itsiki mepiwati'inixi
mariwemeki memiteyurie yu'itsiki
memeiyepiki».

Makumawetsie memiyeki Matana mekanekine,

¹⁹ Manata memiyeki Nakarieri mekanu'axiani,
Nakarieri memiyeki Wamuti mekanu'axiani,

²⁰ Wamuti memiyeki Muhawi kwieyaritsie
mayeweri mekanu'axiani, Pitsikaha hiriyari
manukatsie, Ketsimuni mautahekiatsie
makumawe.

Tsikuni kemira'iwarie

²¹ 'Ixaheritsixi mekanwareni'ani texaxatamete
Tsikuni hetsia, 'amuxeutsixi tiwa'aitiwame, mipai
metehewiaweti:

²² «Tepimatsiwawirie pemira'aitatsie
temuyekineki. Yuriki mipai tepaitika hawaiki
mira'etsietsie tepikaheuyekine meta putsuta
tepihahetihareni. Huye 'amatayewa 'utia
xeikia tepuyekine, kepaukake temanuyekine
'akwieyaritsie».

²³ Peru Tsikuni pikawarupitia hakewa mira'aita
'ixaheritsixi memuyekinekekai. Matsi pita
yukuyaxima kaniwarukuxerieni watakwinike
makumawetsie. Kepauka Yahatsa miye'a
mekaniwarutiwiya.

²⁴ Matsi 'ixaheritsixi mekaniwara'iwa
wakwie mekanwarunawairieni, haa 'Axiuni
manuyekatsie ye'atikaime haa Kawuki
manuye'axetsie ye'atikaime, 'amunitsixi wakwie
mananiere, kwie 'aixia mirekukurarutiyarietsie
paiti.

25 'Ixaheritsixi 'amuxeutsixi wakiekaritetsie
mekaniye'axiani, mana wakiekaritsie
mekaniyukuhayeikawakaitini, metatsiere
kiekari Hetsiwuni meta kiekarite 'auriena
mamanetikateitsie.

26 Kiekari Hetsiwuni, Tsikuni kiekarieya
'amiyewa kanihikitikaitini, 'amuxeutsixi
tiwa'aitiwame, meripaiti ti'aitame Muhawi
kiekame mutamiekai, kwieya minawairiekai
haa 'Axinuni manuyekatsie paiti ye'atikaime.

27 'Ayumieme niuki wewiwamete mipai meka-
niutiyuaneni:

«Ketsuwuni kiekariyaritsie xekenahu, Tsikuni
kiekarieyatsie.

'Aixia xekeneuyuri. 'Aixia
xekeneukuyuriexia.

28 Hetsiwuni kiekariyaritsie tai kanatineni,
Tsikuni kiekarieyatsie nerikwari
kanatinexiani.

Muhawi kiekariteya naime kaniutixitsitiani
'Axinuni hatiyari hiriyari manuye'atika.

29 Muhawi 'ahetsiemieme xia'ui nepaine.

Pekani'uniniri, Kemuxi kiekarieya.

'Akakaiyari 'aniwema kaniwareutaweyaxiani
'aniwema 'ukari Tsikuni paiti
miwaranuhapaniki,
'amuxeutsixi tiwa'aitiwame wahetsia.

30 »Yunaime tekanixe'uka'una,

Hetsiwuni ye'atikaime meta Riwuni paiti
ye'akame.

Yunaime Nupa paiti tekanixe'uxirietikine,
tekanixe'uka'una Merewa paiti
xeye'atikaime».

³¹ Mipai mekateniuyaxe 'ixaheritsixi 'amuxeut-sixi wakwieyaritsie.

'Uhuki Watsanitsie ti'aitame kemira'iwarie

³² Muitsexi katiniuta'aita kwie Katsexi memuxeiyayuki, 'ixaheritsixi kiekari mamanetika mekaniwarutakwini, 'amuxeutsixi mekaniwarutaweiya mana memikiekai.

³³ Me'akunuaxiaka, Watsani huyeyari mekaniuwiya. Mana ti'aitame 'Uhuki, Watsani kiekame kaniwaranukunake yukuyaxima warawititi watakwinike 'Erurehi mirakutewatsie.

³⁴ Hiki Yawé Muitsexi mipai katiniutahiawe: «Pepikawamakaka, 'Uhuki nekanixeyetuiiemiki kuyaximama, meta kwieya naime. Tsikuni kepe-meyuri 'amuxeutsixi tiwa'aitiwame Hetsiwuni kiekame mipaita pekatiniyurimiki».

³⁵ Mipai mekatenimieni 'ixaheritsixi 'Uhuki ti'aitame meta niwemama, kuyaximama, nixeime mepika'uhayewaxi 'ayeniereme, mipai kwie mekatena'iwa.

22

Waraki Warami heki mireni'a

¹ 'Ixaheritsixi tawarita mekaniyekine, mayeweritsie Muhawi mekaniuyuhayewa, Kurutani 'anutaiye, Keriku hixie.

² Kepauka Waraki Tsipuxi nu'aya miretima 'ixaheritsixi 'amuxeutsixi kememiwaruyuriekai,

³ muhawitsixi 'ixaheritsixi mekaniwaruti-makani. Kwinie yemek mekatenimamakaitini kwinimieme memiyupaimekaiki.

⁴ Hiki muhawitsixi 'ukirawetsixi Mariyani kiekatari mipai mekateniwarutahiawe: «'Iki

miya memiyupaime ta'aurie mirahane naime mekatenixikuni, wakaxi 'ixa kemirakumaweriya hepai».

'Ana mana Waraki tsipuxi nu'aya katini'aitametikaitini Muhawi kwieyaritsie,

⁵ 'ayumieme Warami katiniutani'airieni Wehuxi nu'aya, Petuxi paiti mukatei, 'Eupirata hatet-sitayaritsie, 'amawitsixi wakwieyaritsie. Waraki mipai mekateneini'airieni:

«Hipati teiteri mepu'axia 'Ekipitu mehanexiaka, hiki naime kwie mepukunama, hikita ne'aurie mekaniu'axiani.

⁶ Waikawa nemetsiwawirie pemamieki 'iki 'axapemiwayurieniki nehetsiemie, waikawa pemitirikaiyeki. Mipaike newara'iwake nepine'erie 'ateewapai newaranuni'ame. Ne mipai nepitimate kemi'ane 'aixia pemuyurieni 'aixia'itiarieti payeika, kemi'aneta 'axapemuyurieni 'axa'itiarieti payeika».

⁷ Hiki 'ukirawetsixi Muhawi meta Mariyani kiekatari Warami mekatenekuxatiani Waraki kemainekai, mekaniu'axiani tumini me'a'iti mete'ipitianeke xika ya'utayinike 'ixaheritsixi 'axamiwayurieniki.

⁸ Warami kaniwaruta'inieni mana memitiheniki, mipai tiwarahiaweti kename 'uxa'ariekake tiwataxatianekekai Yawé kemititahiawekekai. Hiki 'itsikate mana mekanitiheteitini.

⁹ Kakaiyari Warami hetsia kaniyuhekiata mipai katinitahiawe:

—¿Kemi'ane mepiyia miki teiteri 'akie memitihe?

¹⁰ Warami mipai kaniutayini:

—Texaxatamete mekaniyiaka Waraki
Tsipuxi nu'aya miwareyeni'a, ti'aitame
Muhawi kwieyaritsie. Kaniwareyeni'ani
meminetetaxatiani:

¹¹ “Teiteri 'Ekipitu kiekatari kwie hiki 'ena
naime mekanikunaka. Kenamieka 'axakeni-
waruyuri nehetsiemie. Mipaike xiari nepiyiwe
newakwineti nemiwarutaweiya nekwietsie”.

¹² Kakaiyari Warami mipai katiniutahiawe:

—Pepikayemie wahamatia meta
pepikawakewaiyaneni 'ixaheritsixi, kiekari 'aixia
memu'itiae mekanihikitini.

¹³ 'Uxa'arieka Warami 'anukukeka 'itsikate
mipai katiniwarutahiawe Waraki miwareyeni'a:
«Xekenakunuaxia yukie, Yawé pika'inake
xehamatia nemeumieniki».

¹⁴ Memanuyetei muhawitsixi
mekanakunuaxiani hakewa Waraki mekatei,
mipai mekatenitahiawe: «Warami pikaheyuwairi
tahamatia mamieki».

¹⁵ Waraki tawarita kaniwareni'ani 'itsikate
matsi meyuwaikawame, waikawa memauka'u,

¹⁶ meheta'axiaka mipai Warami mekateniu-
tahiawe:

—Waraki Tsipuxi nu'aya mipai kanetaineni:

“Yemeki tixaitiki pepikarekununuwani
peminetsi haxeiyamieki,

¹⁷ ne nekamatinipitiamiki waikawa
perexeiyati pemayaniki, tsepa tita
peminetiutawawiri ne yanekatinikayeimiki.
Waikawa nekamaniwawirieka pemamieki 'iki
teiteri 'axapemiwayurieniki nehetsiemie”.

¹⁸ Warami mipai kaniutayini:

—Tsepa Waraki yuparatsiyu minetiyetuiri hurute meta piratate tihineme, ne 'atsinepikatiyurieni 'etsitipeme yatini timariweme, matsi Yawé nekakaiyari kemiti'aita yanepitiyurieneni.

¹⁹ Xemeta hiki tikariki 'ena xekenetiheni, ne Yawé 'akuxi nepita'iwawiya keminetitahiawe.

²⁰ Miki tikariki Kakaiyari kaniyuhekiata Warami hetsia: «Metsi 'iki teiteri mekameniku'inietiweni, kenemietsi wahamatia, xeikiatsi ne kenemerekihaweni yapekatinekamiemiki».

Warami meta puxuya

²¹ 'Uxa'arieka ximeri Warami kananukukeni, yupuxu kaniutixiratiani, hiki kaneyani 'itsikate muhawi kiekatari wahamatia.

²² Hiki wahamatia 'umiekaku Kakaiyari kaniuyeha'ani, huyetana kaniutakeni Yawé niuki tuayameya, ka'ipitianike mana muyeyaniki. Warami 'anakaiti kaniumiekaitini yupuxutsie meta hamatiana yuhutati mekaniuhukaitini 'iparewiwamete.

²³ Kepauka puxu Yawé niuki tuayameya muxei 'ixipara 'akwekame, huye kaniuku'eirieni xaitsie kaneukuyune. Hiki Warami kanikuwaxiani huyeta miyemieki.

²⁴ Yawé niuki tuayameya hetsimanuyewatsie kaniukeni, kaxie haraweriyari makumanetsie, miki tetexiki kanikurarutiariekaitini naitсарie.

²⁵ Kepauka puxu Yawé niuki tuayameya muxei, kwi hurawa tetsariyatsie kaniukuyani Warami yu'ikatsie katiniukwine. Hiki tawarita Warami kaniwani.

26 Yawé niuki tuayameya kananyeyerini xaitsie paiti kaniukeni kwi manuyewatsie, hakewa mikaheyiwe xaitsie meukuyune.

27 Kepauka puxu Yawé niuki tuayameya muxei, kaniukahuni Warami 'anakaiku. Hiki Warami kaniuyeha'ani kiyeki yupuxu kaniukuwaxiani.

28 Hiki Yawé puxu kaniupitiani mitaniuniki, hiki miki mipai Warami katiniutahiawe:

—¿Kekuta ne nematsi'uyuri, titayari haikakia penetiukuwaxia?

29 Warami mipai katinitahiawe:

—Penetsinanaimati pepumie. Xika 'ixipara ne-hakwekake, nekameniumienikeri.

30 Puxu Warami mipai katiniutahiawe:

—¿Netsi 'apuxu nepihiki nehetsie pemikuyerine, hikia mireukayunetsie? ¿Kepauka mipai nematsi-heyuri?

Warami mipai kaniutayini:

—Nekatixaitsieti.

31 'Ana Yawé yuniuki tuayame kaniuhekiata 'ixipara hakwekame Warami mixeiyaki. Warami kwiepa paiti kaniutihiximakeni.

32 Yawé niuki tuayameya kanita'iwawiya:

—¿Titayari haikakia 'apuxu petiukuwaxia? ¿Pekatimate ne nematsikunuitianike 'ena nemunuaki, nemixeiyaki kepeमितime 'aixia mika'aneki?

33 Kepauka puxu minetsihexei, haikakia hukaniuyune. Xika miki mipai kaheyinike, 'ekiri pekanimikinike, mikita rayenierenike.

34 Warami Yawé niuki tuayameya mipai katiniutahiawe:

—'Axanepitiuyuri. Mipai nepikaretima kename nehuye pe'anunarimakai. Kamitsi xika 'aixia kane'ane, nekanikunuamiki.

³⁵ Niuki tuayame Yawé hetsia mieme mipai katiniahawe:

—Kenemie wahamatia, keni'akweriwayurieka, ne kenemarekuhiaweni mipai xeikia pekanetainemiki.

Hiki Warami kaneyani Waraki miwareyeni'a wa'ukiyarima wahamatia.

Waraki Warami hamatia kememite'uyukaxei

³⁶ Kepauka Waraki miretima kename Warami 'uhamiekai, kanayeyani 'enukunakeke xeime muhawi kiekariyatsie kwie manu'axetsie haa manuyekatsie 'Axinuni.

³⁷ Waraki Warami mipai katiniutahawe:

—¿Tami ne nekamatiutani'airi? ¿Titayari nehetsia pekatina? ¿Nekamarakapitiaweme peti'erie?

³⁸ Warami mipai Waraki katiniuta'eiya:

—'Ari, 'ena nekaniuyeikani. Kepauka Kakaiyari xeikia mipai minetikuhiaweni yaneputaineni.

³⁹ Mana memiyeki Warami meta Waraki mekanekine, Kiriati-Kutsuti hepatsie.

⁴⁰ Waraki wakaitsixi kaniwarutimawa meta muxatsi, mekaniwarutikwani Warami hamatia meta 'itsikate wahamatia memu'uwakai.

⁴¹ 'Uxa'arieka Waraki Warami kanewitini Wamuti-Wahari hiriyari 'amanutitewatsie, hakewa 'ixaheritsixi memetitekai 'etsiwa miwaxeiyaki.

23

Matari Warami kemitikuxataikai

¹ Warami, Waraki mipai katiniutahiawe: «'Atahutame mawarite taiyame keneutiwewi meta 'atahutame tsikerutsixi meta 'atahutame muxatsi 'ukitsi».

² Waraki yakatiniuyurieni Warami kemirehiawekai, yunaiti mekanitimawa xeime tsikeru meta xeime muxa 'ukitime mawari taiyame xexuimetsie.

³ Hiki Warami, Waraki mipai katiniutahiawe: «'Ena keneuyuhayewa, 'amawari taiyariyari 'aurie, 'akuxi ne Yawé nepeta'iwawiya kemaineni. Yareutewitita nekametinitaxatiamiki kemineretahiawe». Hiki yemuri metsekametsie kaneutimiekaitini.

⁴ Kakaïyari kanenukunake, Warami mipai katiniutahiawe:

—'Atahutame mawari taiyame nekaniutiwewieni xexuimetsie xeime tsikeru xeime muxa 'uki nekaniutimawa.

⁵ Hiki Yawé Warami katiniutaxatiani, mipai katinitahiawe:

—Kenakunua Waraki hetsia kenemitayini mipai ketinetahiawi.

⁶ Warami kanakunuani Waraki kaniutaxeiya 'a'uweme yumawari taiyariyari 'aurie muhawit-sixi tewa'aitiwamete wahamatia.

⁷ Warami mipai katinikuxatakaitini:

«'Arami paiti, tau manatineika hiri hepatsie,

Waraki kaneneyewitini, ti'aitame Muhawi kiekame hetsia.

Mipai kanetiniutahiawe: “Kenamieka, Kakuwu 'axakeneuyuri nehetsiemieme.

Kenamieka, 'Ixaheri 'axakeneuyuri”.

⁸ Titayari 'axanetiwayurieneni

kemi'ane Kakaïyari 'axamikawayurie?

¿Keneyime 'axanepiwayurieni

Yawé mipai mikatiwara'eriya?

9 'Ai 'amanutitewitsie paiti nepuwataxeiya,

hiri 'ametititsie paiti nepiwaxeiya:

teiteri memanayexeyarie mepihiki,

mepika'iniatsie 'ena kwiepa miemete wa-
hamatia.

10 ¿Kemi'ane piyiwe Kakuwu nuiwarimama
miwaruti'iniata,

tumuanari hepai memuyupaime,

yatini tsikere yayupaimeme miwaruti'iniata

'Ixaheri nuiwarimama?

'Aixia mitiuka'iyari hepai ne'aneti neke'umini.

Wahepai netiyurieneti neke'ukumawere».

11 Hiki Waraki, Warami mipai katiniutahiawe:

—¿Kepenetsi'uyuri?

Nekamani'atiani

'axapemiwayurieniki

meminetsi'aye'unie

wahetsiemime, matsi pita 'aixia petiwayurie.

12 Hiki Warami mipai katinita'eiya:

—¿Kamitsi nekatiyiwe Yawé keminerahiawe

mipai nemutayini?

Hutarieka Warami kemitiutaxa

13 Hiki Waraki mipai katinitahiawe:

—Neuxei, hikimi xaitsie pita. Manata xeitapari
xeikia pekaniwarexeiyamiki, yunaime hawaiki,
mana hirixia 'axapekaniwareyurimiki.

14 Hiki mekanekine Tsupini hiriyaritsie Pit-
sikaha mititewatsie. Mana mawari taiyame
'atahutame kaniutiwewieni, xexuimetsie xeime
tsikeru xeime muxa 'uki mekaniutimawa.

15 Mana Warami Waraki mipai katiniutahiawe:

«'Ena keneuyuhayewa 'amawari taiyariyari 'au-
rie, 'akuxi ne Kaka'yari hamatia nepiretaxata».

16 Yawé Warami 'anukunakeka yuniuki kaniye-tuirieni mipai katinitahiawe: «Waraki hetsia kenakunua, kenemitayini mipai ketinetahiawi».

17 Warami kaneyani hakewa Waraki mekatei, kanitaxeiya 'a'uwekame yumawari taiyariyari 'aurie meta muhawitsixi 'ukirawetsixi wahamatia. Waraki mipai katinita'iwawiya:

—¿Yawé kehetayi?

18 Hiki Warami katiniutaxata:
«Kenanukukexi, Waraki, keneu'ena,
Tsipuxi nu'aya, keneneu'eni.

19 Kakaiyari mimiwe pikahiki
mikasi'itawa meta mika'ikupata.
Katinaye'atiwani kemitayini
yakatinikamieni.

20 Mipai kanetinahiaweni 'aixia
nemiwayurieneniki,
xika Kakaiyari mipai tinakeni,
ketsikuta tawarita netiyurieneni.

21 »Kakaiyari Kakuwu pikaxeiya 'axatiyurieneme
'Ixaheri pikatiuyukananaima.
Yawé wakakaiyari wahamatia puyeika,
wahamatia ti'aitame puyuxata.

22 Kakaiyari 'Ekipitu kaniwarayewitini
tuuru kemitiitirikaiye hepai.

23 Kakuwu hetsia 'ikewari pumawe,
meta 'Ixaheri hetsia 'awie memite'uyemate
mepikaxuawe.

Kakuwu meta 'Ixaheri wahepa'itsita mipai katini-
taniukiemi:
“Xeketeneuxeiya Kakaiyari 'aixia
kemitiuyuri”.

24 'Tki teiteri, xeimieme mekanixatani maye 'uka hepai,

miki maye 'uki mitikuwaine hepai.

Pikaka'uxipieni tita mitikuweiyane 'i'axemeke miwakwini waxuriya ha'iemeke».

25 Hiki Waraki, Warami mipai katiniutahiawe:

—Xika 'axapekawayurimiki, kamitsi tsikere 'aixia pepikawayurieka.

26 Warami mipai kaniutayini:

—¿Ne tami mipai nekamerahiawekai, kename ne Yawé keminetitahiawekekai yanetiyurienikekai?

Hairieka Warami kemitiuxa

27 Hiki Waraki, Warami mipai katiniutahiawe:

—Hikimi neuxei, xaitsie pita nepimatsi'anuwitini. Heiwati mana Kakaiyari 'inakeni 'axapemiwayurieniki.

28 Hiki Warami kanewitini Pehuxi hiriyaritsie paiti, makumawetsie Ketsimuni mahekiatsie.

29 Mana Warami mipai katinitahiawe:

—'Ena keneneutiwewiri 'atahutame mawari taiyame meta keniwarukuha'aritia 'atahutame tsikerutsixi meta muxatsi 'ukitsi.

30 Waraki yakatiniuyurieni Warami kemirehiawekai, mana kaniwarutimawa 'atahutame tsikerutsixi meta muxatsi 'ukitsi.

24

1 Hiki kepaukua Warami mipai miretima Yawé minakekai 'Ixaheri 'aixia muyuriekaki, hiki pikawarukewaiyaxi, meripaiti hepai, matsi tawarita makumawetsie kaneutanierere.

2 Kepauka Warami meutanierixi 'ixaheritsixi kaniwaruxeiya kememiteheunuiwari mipai

meteheukuteme, hiki Yawé 'iyarieya hetsiena kaninuani,

³ hiki mipai kaniutayini:

«Warami niukieya Wehuxi nu'aya,
tewi niukieya 'aixia miti'ane mitixeiya.

⁴ Niukieya mi'enie Kakaiyari kaniniukieyatini,
Naimekimitirikaiye mitixeiya,
mukakukutsutsie hepai mitikuxaxatiariwa.

⁵ »Kakuwu, 'axamarute witsipi'anene.

'Ixaheri, witsipitiyuxexeiya pemanukatsie.

⁶ 'Aki muyehapane hepai pitiyuxexeiya manuyunanake,

tuturi hatetsita mi'iteiritsie hepai
pitiyuxexeiya,

'aruhe 'iteiriyari Yawé mika'iteitaxi hepai,
kariuxa hatetsita miti'u hepai pi'anene.

⁷ Xariteya haa panakayeuriwe,
'imiarieya puyutemawie haa waikawa mex-eiyaki.

Ti'aitame pimariwe 'Akaki reuyeta,
mariweti 'aitsikaya payuyeitiwa.

⁸ »Kakaiyari 'Ekipitu kaniwarayewitini
tuuru tsimaruni mititirikaiye hepai.

'Ixaheri nuiwarite memeye'unie kani-watikwa'ani,
wa'umete kanititarani,
yu'iriki kaniwatimimini.

⁹ Maye 'uki hepai kanakatutsitani,
maye 'ukaratsi hepai 'akaniuhupuni:
kemi'ane ka'ukamati piyehaxiatiawe?

'Aixia meke'itiarieka 'aixia memimatsiyurie.

'Axameke'itiarieka 'axamemimatsiyurie».

10 Hiki Waraki kaniuyeha'ani Warami hepaitsita, yumamatetsie heuyitiminati mipai katinitahiawe:

—Nekametiniutani'airieni 'axapemiwayurieniki nemiwaraye'unie, hikiri hairieka matsi 'aixia petiwayurie pita.

11 Tsepa hiki kenemie 'akie. Ne mipai nepimarahiawekai kename nematipitianikekai, peru miki Yawé pikamatiutanaki'eriri.

12 Warami mipai katinitahiawe:

—Ne mipai nepitiwarahiawekai netsi'iniwamete pemiwareni'a:

13 “Tsepa Waraki yuparatsiyu huruki meta pirataki hineme minetiuxatia, ne 'aixia nepikatiuyuriwe meta 'axanepikatiuyuriwe, matsi Yawé nekakaiyari xeikia 'aitsikaya kemaine mipai nepi'aneni. Yawé xeikia kemineti'aitia mipai nepitiyurieneni”.

14 Hiki mexi neka'akunuawe nekie, nepimatitaxatiani 'iki kiekari 'ateiterima kemiwayurieni 'uxa'atini warie haye'ayu.

Warami naurieka kemitiutaxa

15 Hiki Warami mipai kaniutayini:

«Warami niukieya Wehuxi nu'aya,
teui 'aixia miti'ane mitixeiya niukieya.

16 Niukieya mi'enie Kakaiyari kaniniukieyatini.

'Amutewi kemitiku'eriwa mimate,
Naimekimitirikaiye mitixeiya,
mukakukutsutsie hepai mitikuxaxatiariwa:

17 »Nekanixeiyani, peru hiki 'akuxi hawaiki,
nekanixeiyani, peru 'ahurawa hawaiki.

Kakuwu xuraweya kananatinemiki,
 xewiti ti'aitame 'Ixaheri hetsie
 kananukukemiki.

Muhawi mu'uya kanitapinamiki
 meta Tseti niwemama wamu'ute.

18 'Erumi kana'iwaritemiki,
 Tsehixi meye'unie, tipiinieya katinayeimiki,
 mexi 'Ixaheri yukuha'aritiwani, mariwemeki
 mitiyurieniki.

19 Kakuwu nuiwarieyatsie xewiti rayu'iwati kan-
 itinemiki,
 'Ahixi kiekatari memuyuhayewaxi
 kaniwatayuniyamiki».

'Imatirieka Warami kemitiuxa

20 Warami 'Amareki 'uxeiyaka mipai kaniu-
 tayini:

«'Amareki mexiakame nuiwari kanihikitini,
 peru 'imatirieka naiti kanika'unariemiki».

21 Hiki Warami kenitsixi waruxeiyaka mipai ka-
 niutayini:

«Tsepa kuraru 'aixia 'aneme pimateka
 meta tsepa 'a'itua 'aitsie paiti makama,

22 'ekiri Kahini, taipa pekaneyani,
 meta 'Atsiriyia kamenanuhanimiki».

23 Hiki Warami mipai kaniutayini:
 «Xia'ui, ɟkemi'anetsi kuta pitawikweni
 kepauka Kakaiyari mipai mitiyurieni?

24 Kanuwate 'amipapa kani'axiakuni Tsipire
 manexiani,
 'Atsiriyia meta 'Ewexi memitewakwinitianike,
 miki yaxeikia mekanika'unariekuni».

25 Mipai titaxatiaka Warami kaneyani yukwiepa
 paiti, yaxeikiata Waraki yuhuyeta kaneyani.

25

'Ixaheritsixi ke'axamemite'uyuri

¹ Kepauka 'ixaheritsixi Tsitini memititekai, 'ukari muhawitsixi wahamatia mekaniuti-hitikine,

² miki mekaniwa'iniekaitini wakakaiyarixi mawari memiwawewiriekaki. 'Ixaheritsixi miki kakaiyarixi wahixie mekateniutikwa'akaitini meta wahixie mekaniutitunuma'uwekaitini.

³ Wahari-Pehuxi mehayexeiyati mekanayuyeitiwakaitini. 'Ayumieme Yawé kaniuyeha'ani.

⁴ Hiki Yawé Muitsexi mipai katiniutahiaawe: «Yunaime 'ixaheritsixi wa'ukiyarima keniwarukawitia 'utukakaku, nemihaxiapieniki 'ixaheritsixi nemikatiwakwinitianiki».

⁵ Muitsexi mipai katiniwarutahiaawe 'ixaheritsixi wa'itsikate: «Xekeniwarukuya kemi'ane Wahari-Pehuxi me'ayexeiyati memaki».

⁶ 'Ixaheritsixi me'utitsuanakaku 'ixuriki tukiari miranutahakitiretsie, 'ixaheri tewiyari xeime 'uka mariyani tewiyari kani'atiani, Muitsexi nierekaku meta yunaiti teiteri 'ixaheritsixi, yu'iwama kaniwarutahiaawitsitiani.

⁷ Hiki 'uniereka mawari wewiwame Pinexi 'Eriyatsaxi nu'aya 'Aruni teukarieya. Teiteri waruku'eirieka pitsika 'amitewi 'akwetikaneyani,

⁸ miki tewi kananukuweiya, xamarutana kaneutahani kaniwarutimini 'uki 'ixaheri meta 'uka. Mipai tiuyiku 'ixaheritsixi kememitekwi'ikai katineuyunuani.

⁹ 'Ana miki kwiniyaki xetewiyari heimana nauka miriyari (24.000) mekaniukwini.

¹⁰ Yawé Muiťsexi mĩpai katiniutahiawe:

¹¹ «Pinexi, 'Eriyatsaxi nu'aya meta 'Aruni teukarieya, miki katiniuyurieni nehaxia manukauitĩa, ne newakwerieti kenemirehiawekai mĩpai katiniuyurieni. 'Ayumieme ne'itetsarikaki 'ixaheritsixi nepikawaruka'unaxi.

¹² Pinexi mĩpai ketineutahiawi tiratu temiwewieniki ne nemikuhaweniki,

¹³ yukimana miki meta nuiwarimama mawari wewiwamete yuheyemeki mepihikitini, nehetsie mutanuaki 'itetsati, meta 'ixaheritsixi wahetsie 'itiya mawariyari muwewiki».

¹⁴ Tewi mumierie 'uka mariyani tewiyari hamatia, Tsimiri katinitewakaitini Tsaru nu'aya, manuyeka kanihikitikaitini Tsimehuni xeime nuiwarieyatsie mieme.

¹⁵ 'Uka mariyani tewiyari Kutsiwi katinitewakaitini, Tsuxi kaninu'ayatikaitini, manuyeka Mariyani xeime nuiwaritsie mieme.

¹⁶ Yawé Muiťsexi mĩpai katiniutahiawe:

¹⁷ «Mariyanitsixi xekeniwaretakuya keniwarekuya,

¹⁸ miki memixe'utakwiki mexete'iriwiyati, Wahari-Pehuxi hetsia memixeye'atiaki, kemuyi Kutsiwi manuyeka Mariyani niweya mumi, kepauka memikwi'ikaitsie Wahari Pehuxi heki».

26

Hutarieka 'ixaheritsixi kememite'uti'iniatsie

¹ Merikite 'ixaheritsixi miyamete'ukwiku reutiyetana, Yawé Muiťsexi mĩpai katiniutahiawe meta mawari wewiwame 'Eriyatsaxi 'Aruni nu'aya:

2 «Xekeniwaruka'utia 'ixaheritsixi yunaime waniwema kemi'ane memiwa'ukiyarima. Xekeniwaraka'utia xeitewiyari wiyari memihitika huteiki meutiyune, kuyaki 'aixia memi'anene 'ixaheritsixi wahetsiememeki».

3 Mui sexi meta 'Eriyatsaxi hamatia, yunaime teiteri wahamatia mekateniutaxata mayeweri Muhawi kwieyaritsie, haa Kurutani manuyeka 'aurie, Keriku hixie, mipai mekateniwaruta'aitiani

4 memiwaraka'utianiki 'ukitsi xeitewiyari wiyari meutiyune memexeiyatika, Yawé Mui sexi kemirahiawekai.

'Ixaheritsixi 'Ekipitu memiyeki 'iki mekanihikitikaitini:

5-6 Xuweni niwemama 'Ixaheri matiarieya: 'Enuki, Paru, Ketsiruni meta Karimi, miki wanuiwari mekanihikitini: 'enukitsixi, parutsixi, ketsirunitsixi meta Karimitsixi.

7 Miki mekanihikitini Xuweni nuiwarimama, Yunaiti mekanihikitikaitini huta tewiyari heimana haika miriyari, heimana 'atahuta tsienituyari, heimana xeitewiyari heimana tamamata (43.730) teiteri.

8 Paru nu'aya 'Eriyawu yuxewiti xeikia kanayani.

9 'Eriyawu niwemamata mekanakine: Nemuhuri, Ratani meta 'Awirani, me'anayexeyariekatiti teiteri wahetsiememeki, Mui sexi meta 'Aruni mekaniutiniukimani kepauka Kure miwa'iniekai kepauka 'axamitiuyuri Yawé hixie.

¹⁰ Kepauka kwie miwareukakwai Kure yunaime, meta kemi'ane memeweyakai. Tai kaniwarutitaiya huta tsienituyari, heimana huta tewiyari heimana tamamata teiteri, mipai tawari memikayiakaki katiniuyini.

¹¹ Matsi Kure niwemama mepika'ukwi.

¹²⁻¹³ Nemuheri nuiwarimama, Kamini, Tsera meta Tsahuri, Tsimehuni niwemama, Wanuiwari mekanihikitini: nemuheritsixi, kaminitsexi, tseratsixi meta tsahuritsixi.

¹⁴ 'Iki mekanihikitini Tsimehuni nuiwarimama. Yunaiti mekanakine xetewiyari heimana huta miriyari heimana huta tsienituyari (22.200) teiteri.

¹⁵⁻¹⁷ Tsepuni, Kaki, Tsuni, 'Utsini, 'Eri, 'Aruri meta 'Areri, 'iki Kahari niwemama mekanihikitini, 'ikita wanuiwarima: tsepunitsixi, kawuhitsixi, tsunitsixi, 'utsinitsixi, 'eritsixi, 'aruritsixi meta 'areritsixi.

¹⁸ 'Iki Kahari nuiwarimama mekanihikitini. Yunaiti mekanakine huta tewiyari miriyari heimana 'auxiwi tsienituyari (40.500) teiteri.

¹⁹⁻²⁰ 'Exi meta 'Unani Kura mepiniwemama, Kanani miki mekanikwini. Tseraxi, Paretsi meta Tseratsi wanuiwari mekanihikitini: tseraxitsixi, paretsixi meta tserahitsixi.

²¹ Paretsi niwemama, Ketsiruni meta Kamuri, wanuiwari mekanihikitini ketsirunitsixi meta kamuritsixi.

²² Miki Kura mekaninuiwarieyatini. Yunaiti mekanakine haika tewiyari heimana tamamata

heimana 'ataxewime miriyari heimana 'auxiwi tsienituyari (76.500) teiteri.

²³⁻²⁴ 'Itsakaxi niwemama, Tura, Puwa, Yatsuwi meta Tsimiruni, wanuiwari mekanihikitini: tu-rahitsixi, puwitsixi, yatsuwitsixi meta tsimirunit-sixi.

²⁵ Miki 'Itsakaxi nuiwarimama mekanihikitini. Yunaiti mekanakine haika tewiyari heimana nauka miriyari heimana haika tsienituyari (64.300) teiteri.

²⁶ Tsawuruni niwemama, Tsereri, 'Eruni meta Yareri, wanuiwari mekanihikitini: tserenitsixi, 'erunitsixi meta yareritsixi.

²⁷ 'Iki Tsawuruni nuiwarimama mekanihikitini. Yunaiti mekanakine haika tewiyari miriyari heimana 'auxiwi tsienituyari (60.500) teiteri.

²⁸ Kutse niwemama, Manatsexi meta 'Epirahini, wanuiwari mekanihikitini:

²⁹ Manatsexi niwemama, Makixi meta Karaha, Makixi nuiwarimama mekanihikitini, makiritsixi meta Karaha nuiwarimama.

³⁰⁻³² Karaha niwemama, Ketsexi, Kere, 'Atsiri-eri, Tsikeni, Tsemira meta Hepexi, wanuiwari mekanihikitini: ketseritsixi, kerekitsixi, 'atsiri-heritsixi, tsikenitsixi, tsemirahitsixi meta hep-eritsixi.

³³ Tserupekari Hepexi nu'aya 'ukitsi pikawarutinuari 'ukari xeikia, mekatentete-wakaitini, Makira, Nuha, Kukira, Mirika meta Tiritsa.

³⁴ 'Iki Manatsexi wanuiwari mekanihikitini. Yunaiti mekanakine huta tewiyari heimana tama-

mata heimana huta miriyari heimana 'atahuta tsienituyari (52.700) teiteri.

³⁵ 'Epirahini niwemama, Tsutera, Wekexi meta Takani, wanuiwari mekanakine, tsuterahitsixi, wekeritsixi meta takanitsixi.

³⁶ Tsutera nu'aya 'Erami, nuiwarieya mekanihikitini, 'eramitsixi.

³⁷ 'Iki mekanihikitini 'Epirahini nuiwarimama. Yunaiti xeitewiyari heimana tamamata heimama huta miriyari heimana 'auxiwi tsienituyari (32.500) teiteri mekanakine.

'Iki yunaiti nuiwarite Kutse hetsie mekaniyekine.

³⁸⁻³⁹ Wenikamini niwemama, Wera, 'Atsiweri, 'Akirani, Tsupani meta Kupani, mekaniwaniwaritini: werahitsixi, 'atsiweritsixi, 'akiranitsixi, tsupanitsixi meta kupanitsixi.

⁴⁰ Wera niwemama 'Axi meta Nahamani, wanuiwari mepihiki 'aritsixi meta namanitsixi.

⁴¹ 'Iki Wenikamini wanuiwari mekanihikitini. Yunaiti mekanakine huta tewiyari heimana 'auxiwi miriyari heimana 'ataxewime tsienituyari (45.600) teiteri.

⁴² Rani nu'aya Tsukani nuiwarieya tsukanitsixi mepihiki, miki xeikia mekanihikitikaitini Rani nuiwarieya.

⁴³ Haika tewiyari heimana nauka miriyari heimana nauka tsienituyari (64.400) teiteri mepihikitikai.

⁴⁴ 'Atsexi niwemama 'Imina, 'Itsiwi meta Weriya, wanuiwarima mepihiki: 'iminatsixi,

'itsiwitsixi meta weriahitsixi.

⁴⁵ Weriya niwemama Hewexi meta Marikiheri wanuiwari mepihiki: heweritsixi meta marikieritsixi.

⁴⁶ 'Atsexi xeimeta 'uka kanayexeiya Tsera titewakame.

⁴⁷ 'Iki 'Atsexi wanuiwari mekanihikitini. Yunaiti mekanakine huta tewiyari heimana tamamata heimana haika miriyari heimana nauka tsienituyari (53.400) teiteri.

⁴⁸⁻⁴⁹ Nepitahari niwemama Yatseri, Kuni, Ketsexi meta Tsireni, wanuiwari mekanihikitini: yatseritsixi, kunitsixi, ketsexitsixi meta tsirenitsixi.

⁵⁰ 'Iki mekanihikitini Nepitahari nuiwarimama. Yunaiti mekanakine huta tewiyari heimana 'auxiwime miriyari, heimana nauka tsienituyari (45.400) teiteri.

⁵¹ Yunaiti teiteri 'ixaheritsixi 'ataxewime tsienituyari heimana xeimiriari, heimana 'atahuta tsienituyari heimana xetewiyari heimana tamamata (601.730) mekaniyupaimekaitini.

Kwie kememiteyeturie 'iniaritikaime

⁵² Yawé Muietsexi mipai katiniutahiawe:

⁵³ «Kwie keniwayeturi 'iniaritikaime 'iki nuiwarite wahetsiememe mihikitiniki. Keyupaimeti memaka'utiarie mipai meyupaimeme keniwaruxatia.

⁵⁴ Kemi'ane nuiwari memiyumiire 'ayeukame pekaniwayeturiemiki, kemi'ane nuiwari 'etsimemiyupaimeni, 'etsiyekame pekaniwaxatiamiki. Yuxexuiti nuiwari yamekatenimikiekuni keyupaimeti memaye'uka.

55 Kwie 'iniariki mekanita'iwakuni nuiwari wa'ukiyarima kememitetetewakai.

56 Mekaniyuta'iwakuni yunaiti nuiwarite wahetsie, 'etsimemiyupaime meta 'amemiyupapaime wahamatia».

Rewitsixi kememute'aka'utsie

57 Rewitsixi Keritsuni, Kuhati meta Merari, wanuiwari mepihikitikai keritsunitsixi, kuhatitsixi meta meraritsixi.

58 Rewitsixi wanuiwaritsie memiyeki mepihikita: Riwinitsixi nuiwariyari, hewurunitsixi nuiwariyari, Makiri nuiwarimama, Muhutsi nuiwarimama meta Kure nuiwarimama. Kuhati 'ukiyarieya 'Amirani pihikitikai.

59 'Amirani 'iyaya Kukaweri pititewakai 'ukiyarieya Rewi pihikitikai, 'Ekipitu putinuiwakai. Tiri mepiwarayexei 'Amirahami hamatia mekanihikitini 'Aruni, Muitsexi meta wa'iwa 'uka Miriyami.

60 'Aruni Narawi puwapaapatikai, 'Awihu, 'Eriyatsaxi meta 'Itamaxi.

61 Narawi 'Awihu hamatia mekaniukwini Yawé hixie taipa 'axa'aneme memite'itimawiriki.

62 Rewitsixi xeimetseri memexeyatika mana meutiyune yunaiti xeitewiyari heimana haika miriyari (23.000) mekanakine. Hipati 'ixaheritsixi wahamatia mepika'u'iniatsie, wahepai memikateyetuiriyarienikekaiki.

63 'Iki mekanihikitini 'ixaheritsixi Muitsexi miwaruti'iniataxi meta 'Eriyatsaxi hamatia, mayeweri Muhawi kwieyaritsie, haa Kurutani manuyehane 'aurie, Keriku hixie.

⁶⁴ Meripaiti makumawetsie Tsinahi Muitsexi 'Aruni hamatia memiwaraka'utuakai, xewiti pika'ayemiekaiki hekwaremeki memaka'utsietsie,

⁶⁵ Yawé mipai mutayikaiki kename yunaiti mekwiniekai. Mekaniyuhayewaxeikia Karewi, Kepune nu'aya, meta Kutsuhexi Nuni nu'aya, tawarita xewiti pika'utawikwei.

27

Tserupekari niwemama 'ukari

('Inia 27:1-11 - 'Inia 36:1-12)

¹ Makira, Nuha, Kukira, Mirika meta Tiritsa Manatsexi nuiwarimama hetsie menimiemetetikaitini Kutse nu'aya, 'ukari Tserupekari niwemama mekanihikitikaitini Hepexi nu'aya, Karaha nu'aya, Makixi nu'aya meta Manatsexi nu'aya. Hiki miki meyu'auxiwiti mekanekine

² 'ixuriki tukiyari manuwetsie, Muitsexi meta mawari wewiwame 'Eriyatsaxi wahamatia metetaxatake meta memanuyetei wahamatia. Hiki mipai mekateniwarutahiawe:

³ «Tapaapa kanemini 'ukitsi kawatinuariweti, Kure minikaiki pika'uyi Yawé hepaitsita mau-niukakaiki. Kaniumini makumawetsie yukimana 'axakemitiyurienekaiki.

⁴ ¿Kamitsi metehayeyetiarieni nuiwarimama tapaapa kemititewa 'ukitsi mikawarutinuariiki? Tame tekaniniwemamatini. Ketaneyetuiiri kwie tapaapa 'iwamama wahamatia».

⁵ Muitsexi Yawé kaniuta'iwawiya kememitehehiawekai,

⁶ Yawé mipai katinita'eiya:

7 «Kememaitika Tserupekari niwemama 'aixia kani'aneni, 'ayumieme keniwayetuiri wahetsiemieme wapaapa 'iwamama wahapai. Wapaapa mihetsiemiemetikai miki keniwaruxatia.

8 »Metatsiere 'ixaheritsixi mipai ketiniwarutahiawi: “Kepauka xewiti tewi mimini 'uki katinuariweti, 'uka pita katinanupimiki.

9 Xikata miki 'uka ka'utinuarieni, 'iwamama pita mekatenanupikuni.

10 Xika 'uki ka'uti'iwatakaitini, paapaya 'iwamama mekatenanupikuni.

11 Xika paapaya kareka'iwaka, Xewiti 'ahurawa 'iwaya katinanupimiki hetsiena mieme mirayaniki. Mipai 'ixaheritsixi mekatenikahukuni 'aitsika miheitserie kanihikitikamiki, ne Muitsexi kenemitiuta'aitia”.

Muitsexi kemitiutahiawarie mimiximekaiki

12 Yawé Muitsexi mipai katiniutahiawe:

—'Awarini hiriyaritsie paiti kenemie, mana keneuxeiya kwie 'ixaheritsixi nemiwayetuiri.

13 Hiki 'ari pe'ixeiyame, pekanimimiki pekaniyemieni 'apaapama wahetsia 'a'iwa 'Aruni hepai.

14 Makumawe Tsini mirakutewatsie, kepauka teiteri 'axamemutiyuanekai, xeme xeyuhutati xepikanetsi'anueni, kepauka haa tetetsie xemanetia, teiteri wahixie mipai xepikatehetima kenemitipatsie.

Miki haa Meriwa mititewa Karetsi paiti kantine'aneni, Tsini makumawetsie.

Muitsexi xeime kemitiuta'iwau 'Ixaheri miyewitiniki

15 Muiṭsexi Yawé mīpai katiniuta'eiya:

16 —Yawé, yunaime teṭteri wakakaiyari, xeime keneutahiawi manuyekaniki 'iki teṭteri wahet-siemieme,

17 mīwaruwitiximeniki hakewa memetiyaṣe, mīwaranuwitiniḱi memuyukwiyuṣie meta mīwarakunuitianiki wakie. Mīpai Yawé 'ateṭerima muxatsi memika'ukutsiyari hepai mepikateyuxexeiyani.

18 Yawé Muiṭsexi mīpai katiniutahiawe:

—Kutsuḱexi Nuni nu'aya xekenayeitia, miki yu'iyariki 'aixia katiniyikihaweni. Hetsiena keneutime'i,

19 mawari wewiwame 'Eriyatsaxi hiṣie kene'atia meta yunaime teṭteri wahixie. Hiki yunaime wahixie mīti'aitaniki pekaniyetuiriemiki.

20 Pekatinihiritiamiki 'eki kepemiti'aitakai, mīpai yunaiti 'ixaheritsixi memei'eniekaki.

21 Hiki mawari wewiwame 'Eriyatsaxi hetsia kaniye'amiki, yamitayiniki 'iniari wewieti 'urimi meta *tumimi* heki Yawé kanitahiawimiki. Kepauka Kutsuḱexi mīta'inieni memuyukwiyuḱi, yunaiti teṭteri mekaniyehuni hamatiana, meta kepauka mīta'inieni memakunuaxianiki, mikita mekanakununuwakuni.

22 Muiṭsexi yakatiniuyurieni Yawé kemītita'aitia. Kutsuḱexi 'uta'inieka mawari wewiwame 'Eriyatsaxi hiṣie kanei'inieni meta yunaime teṭteri wahixie.

23 Hiki heimana kaneutimeni hiritiarika kaniyetuirieni, mīpai katiniuyurieni Yawé kemītita'aitiakai.

28

Wiyari 'iniariyari

¹ Yawé Muiťsexi mĩpai katiniutahiawe:

² »Mĩpai ketiniwarutahiawi 'ixaheritsixi memikatehatĩtimaiyaniki kemi'ane tukaritsie memĩnete'utimawiriwaniki. Miki mawari taiyarikayari wĩtsimu'ia miki ne'ikwai kanihikĩtini.

Tita yamĩtimawarieka

³ »Mĩpaita ketiniwarutahiawi 'ixaheritsixi, mawari taiyarika hetsiemieme, yamepĩnete'atĩiriwani xexuime tukaritsie mawari taiyariyari yareuyuhanemeki yuhutame muxatsi xeiwiyari mehĩtikaime 'aixia me'anenekame.

⁴ Xeime ximeri pekanitimawamiki, xeimeta taikai,

⁵ meta wahamatia huta kiruyari tiriku mĩtixiyari 'aixia mĩ'ane hatseitiki pĩnariiekame pekanitimawamiki.

⁶ 'Iki mawari taiyariyari yamĩreuyuhane kanihikĩtini, kenemĩtixekihawekai Tsinahi hĩriyaritsie taiyarika mawarikayaritsie, wĩtsimu'ia Yawé minake.

⁷ Yuxexuime muxatsi wahetsie xeirituruyari kaxie winuyari mĩtiyeuriyani mawariyari heutinikame kaniyetuamiki, tukita Yawé minake hetsiemieme kanitiyeuriyamiki.

⁸ Hutarieka mieme muxa taikai pekanitimawamiki, hatsite mawarikayari hamatia meta winu hatuiyariyari ximeri pemitimawaxi hepai. Taiyarika mawarikayari kanihikĩtini, Yawé minake 'iakariyari.

Mawarika xawatiki mieme

⁹ »Xawatiki pekaniwarutimawamiki yuhutame muxatsi xeiwiwari memihitika, 'aixia me'aneneme mekatekukuyeme, meta kaxie winuyari manuti-tuarike heutinikame, metatsiere nauka kiruyari 'imeriyu tiriku mitixiyari 'aixia mi'ane hatseitiki wiyamakame.

¹⁰ 'Iki mawari taiyariyari kanihikitini xawatiki mieme, hutariekamieme 'iki taiyarika kanihikitini kaxie winuyari mitiyeuriwa heutinikame.

Mawarika xeimetseritsie mieme

¹¹ »Metseri maye'axenitsie mexiakame tukaritsie mawari taiyariyari pekaniutiwewiwamiki Yawé hetsiememe, yuhutame tsikerutsixi, xeime muxa 'ukitime, meta 'atahutame muxatsi xeiwiwari mehikaimeme 'aixia memi'anene memikatekukuye.

¹² Yuxexuime tsikerutsixi wahamatia pekaniniitiamiki tiriku mitixiyari 'aixia mi'ane 'ataxewime kiruyari 'imeriyu hatseitiki wiyamakame, muxa 'uki hamatiata nauka kiruyari 'imeruyu tiriku mitixiyari 'aixia mi'ane wiyamakame hatseitiki,

¹³ meta yuxexuime muxatsi wahamatia, huta kiruyari tiriku mitixiyari 'aixia mi'ane hatseitiki wiyamakame. 'Iki mawari taiyariyari kanayeimiki, 'imikieri taipa kwaxiyariekame, witsimu'ia Yawé minake hetsiememe.

¹⁴ Menutinini 'iki kaniyimiki: Yuxexuime tsikerutsixi wahetsie huta rituruyari winu, muxa 'uki hetsiememe xeirituruyari heimana hixiapa 'akame winu, yuxexuime muxatsi wahetsieta xeirituruyari winu. 'Iki taiyarika

mawarikayari pekaniuwewiximemiki, naimewiyaritsie, xexuime metseriyaritsie 'aye'axekaku metseri 'anatiwautsekaku.

¹⁵ Mipaïta kani'aneni mawarika taiyariyari yapemitiutiwewiwanitsie meta hetsiena mautituarieni, yaxeikiata pekanitimawamiki Yawé hetsiemieme, mi'itiyani mawariyari, xeime tsipu 'ukitimeki.

Patsikwa 'ixiarariyari

¹⁶ »Patsikwa 'ixiarariyari Yawé hetsiemieme xekaniuwewiximekuni mexiakame metseriyaritsie tamamata heimana nauka tukariyaritsie 'umiekaku.

¹⁷ Tamamata heimana 'auxiwi tukariyaritsie 'ixiarari pekaniwewiemiki meta 'atahuta tukari paa mikakuxanariyarie pekanikwakamiki.

¹⁸ Mexiakame tukaritsie 'ixiarari patsiekameki memuyukuxexeiriwa pekaniwewiemiki, xewiti tixaitikitima pikati'uximayaka.

¹⁹ Yawé pekanitimawiriamiki taiki, yuhutame tsikerutsixi pekaniwatitaiyamiki, xeime muxa 'uki meta 'atahuta muxatsi xeiwiyari memihitika. 'Aixia memi'anene memikatekukuye.

²⁰ Yuxexuime tsikerutsixi wahetsie pekaniniitiamiki 'ataxewime kiruyari tiriku mitixiyari 'aixia mi'ane hatseitiki wiyamakame, meta muxa 'uki hetsie nauka kiruyari heimana 'imeriyu,

²¹ yuxexuime muxatsi xeiwiyari memihitika wahetsieta huta kiruyari.

²² Meta xeime tsipu pekaniyetuamiki mi'itiyani mawariyari mayaniki mixinarieniki, 'ahetsiemieme.

²³ 'Tki pekatinitimawamiki metatsiere mawari taiyariyari yamitiutimawariwa pekahayewati.

²⁴ Meta yapekatinimawanemiki 'atahuta tukari, 'iki 'ikwai kanihikiti witsimu'ia tai hetsie miwewiya, Yawé minake witsikemu'ia. 'Tki mipai pekatiniyurienemiki mawari taiyariyari yamitiutimawariwa pekahayewati meta manutituarike.

²⁵ 'Atahutarieka tukariyaritsie 'ixiarari patsiekameki memuyukuxexeiriwa pekaniwewiemiki, xewititima tixaitiki pikati'uximayaka.

Tsemana 'ixiarariyari

('Inia 28:26-31 - Maw 23:15-22, Hut 16:9-12)

²⁶ »Tsemana 'ixiarari muwewieririmetsie, Yawé pekatinitimawiriamiki 'imiari hehekwame matari mitiukaxiawerixi, meta 'ixiarari patsiekameki memuyukuxexeiriwa pekaniwewiemiki. Miki tukaritsie xewiti tixaitiki pikati'uximayaka.

²⁷ Yuhutame tsikerutsixi pekaniwatimawamiki, xeime muxa 'uki meta 'atahuta tsipuri 'ukitsi xeiwiyari mehitikaime, miki mawari taiyariyari witsimu'ia Yawé minake mayaniki.

²⁸ Yuxexuime tsikerutsixi wahamatia 'ataxewi kiruyari heimana 'imeriyu tiriku mitixiyari 'aixia mi'ane pekanitimawamiki hatseitiki pinariekame, muxa 'uki hamatiata tiriku mitixiyari 'aixia mi'ane nauka kiruyari 'imeriyu,

²⁹ yuxexuime muxatsi wahamatia huta kiruyari.

³⁰ Xeimeta tsipu pekanitimawamiki 'eki pemixinarieniki.

³¹ 'Iki naime pekatinitimawamiki pemenutitu'a heuyutinikame meta mawari taiyariyari yamitiutimawariwa pekahayewati meta manutituariwa. Miki tewaxi 'aixia memi'anene memikatekukuye mepihikitini.

29

Kuxineta 'ixiarariyari (*Inia 29:1-6 - Maw 23:23-25*)

¹ »Mexiakame tukaritsie 'atahutarieka metseritsie pekaniwewimiki 'ixiarari patsiekameki memuyukuxexeiriwa, 'ana nixewiti pikati'uximayaka. Miki tukaritsie kuxineta kanitihitsieriemiki.

² Mawari taiyarika pemiwewieniki witsimu'ia Yawé minake, pekaniwatimawamiki xeime tsikeru, xeime muxa 'uki meta 'atahuta muxatsi xeiwiayari memihitika 'aixia memi'anene memikatekukuye.

³ Tsikeru hamatia pekanitimawamiki tiriku mitixiyari 'aixia mi'ane hatseitiki pinariekame 'ataxewi kiruyari 'imeriyu, meta muxa 'uki hetsie nauka kiruyari heimana 'imeriyu,

⁴ meta 'atahuta muxatsi yuxexuime wahetsie, huta kiruyari heuyutinikame.

⁵ Yaxeikiata xeime tsipu heutinikame mi'itiyani mawariyari mayaniki, kimana mixinarieni mi'ayumieme.

⁶ 'Iki pekatinitimawamiki, pekatihayewati hatsite mawariyari meta kaxie winuyari mitiyeuriyani, taiyarika mawarikayari metseri maye'axetsie mieme, taiyarika mawariyari yamitiwewiya. Naime kenemiti'aita, 'iki

naime taiyarika witsimu'ia Yawé minake pekaniyurimiki.

Murukwitiarika tukariyari

('Inia 29:7-11 - Maw 16:2-34, 23:26-32)

⁷ »Tamamata tukaritsie 'atahutarieka metseriyaritsie 'ixiarari patsiekameki memuyukuxexeiriwa pekaniwewiemiki. Miki tukaritsie mekaniyuhakiekuni, meta nixewiti pikati'uximayaka.

⁸ Mawari taiyariyari witsimu'ia Yawé minake pemiwewieniki xeime tsikeru pekanitimawamiki, xeime muxa 'uki meta 'atahuta muxatsi xeiwi-yari memihitika. Miki tewaxi 'aixia mepi'aneneni mepikatekukuyeni.

⁹ Tsikeru hamatia tiriku mitixiyari 'aixia mi'ane pekanitimawamiki hatseitiki pinariekame 'ataxewime kiruyari 'imeriyu, muxa 'uki hetsieta tiriku mitixiyari 'aixia mi'ane nauka kiruyari 'imeriyu,

¹⁰ meta 'atahuta muxatsi yuxexuime wahetsie, huta kiruyari.

¹¹ Metatsiere tsipu 'uki mi'itiyaniki mawariyari heutinikame, meta mixinarieniki mawariyari meta mawari taiyariyari yamitiutiwewiwa meta hatsite mawariyari yaxeikiata kaxie winuyari mitiyeuriyani.

Xamararu 'ixiarariyari

('Inia 29:12-39 - Maw 23:33-43, Hut 16:13-17)

¹² »Tamamata heimana 'auxiwi tukaritsie 'atahuta metseriyari 'umiekaku 'ixiarari patsiekameki memuyukuxexeiriwa pekaniwewimiki, 'ana xewiti pikati'uximayaka. 'Atahuta

tukari 'ixiarari patsiekameki memukuxexeiriwa pekaniwewiemiki Yawé minake.

¹³ Mawari taiyariyari pemiwewieni Yawé hetsiemieme witsimu'ia, tamamata heimana haika tsikerutsixi pekaniwatimawamiki, meta yuhutame muxatsi 'ukitsi meta tamamata heimana nauka muxatsi xeiwiaryi memihitika, 'aixia memi'anene memikatekukuye.

¹⁴ Yuxexuime tsikerutsixi wahamatia pekanitimawamiki tiriku mitixiyari 'aixia mi'ane hatseitiki pinariekame 'ataxewi 'imeriyu kiruyari, muxatsi 'ukitsi wahamatia tiriku mitixiyari 'aixia mi'ane nauka kiruyari 'imeriyu,

¹⁵ yuxexuime tamamata heimana nauka muxatsi memihikitsie, huta kiruyari xeikia.

¹⁶ Metatsiere xeime tsipu mi'itinyaniki mawariyari heuyutinikame, meta taiyarika mawariyari yamitiutiwewiwa hatsi meutini'i meta kaxie winuyari mitiyeuriyani.

¹⁷ »Hutarieka tukariyaritsie, tamamata heimana huta tsikerutsixi pekaniwayurimiki, yuhutame muxatsi 'ukitsi meta tamamata heimana nauka muxatsi xeiwiaryi memihitika 'aixia memi'anene memikatekukuye.

¹⁸ Tsikerutsixi wahamatia meta muxatsi 'ukitsi, muxatsi xeiwiaryi memihitika wahamatia meta hatsite mawariyari meta kaxie winuyari mitiyeuriyani heutinikame, yuxexuiti kememiteheiyehiwa.

¹⁹ Meta xeime tsipu mi'itinyaniki mawariyari heutinikame, mawarika taiyariyari yamitiutiwewiwa meta hatsite mawariyari meta kaxie winuyari mitiyeuriyani.

20 »Hairieka tukaritsie tamamata heimana xewi tsikerutsixi pekaniwayurimiki, yuhutame muxatsi 'ukitsi meta tamamata heimana nauka muxatsi xeiwiwari memihitika 'aixia memi'anene memikatekukuye.

21 Tsikerutsixi wahamatia meta muxatsi 'ukitsi wahamatia, muxatsi xeiwiwari memihitika wahamatia meta hatsite mawariyari meta kaxie winuyari mitiyeuriyani heutinikame, yuxexuiti kememiteheiyehiwa.

22 Metatsiere xeime tsipu mi'itiyaniki mawariyari heutinikame, mawari taiyariyari yamitiutiwewiwa meta hatsite mawariyari meta kaxie winuyari mitiyeuriyani.

23 »Naurieka tukaritsie tamamata tsikerutsixi pekaniwayurimiki, yuhutame muxatsi 'ukitsi meta tamamata heimana nauka muxatsi xeiwiwari memihitika 'aixia memi'anene memikatekukuye.

24 Tsikerutsixi wahamatia meta muxatsi 'ukitsi wahamatia, muxatsi xeiwiwari memihitika wahamatia meta hatsite mawariyari meta kaxie winuyari mitiyeuriyani, yuxexuiti kememiteheiyehiwa.

25 Metatsiere xeime tsipu mi'itiyaniki mawariyari, mawarika taiyariyari yamitiutiwewiwa meta hatsite mawariyari meta kaxie winuyari mitiyeuriyani heutinikame.

26 »'Auxiwirieka tukariyaritsie 'atanauka tsikerutsixi pekaniwayurimiki, yuhutame muxatsi 'ukitsi meta tamamata heimana nauka muxatsi xeiwiwari memihitika 'aixia memi'anene memikatekukuye.

27 Tsikerutsixi wahamatia meta muxatsi 'ukitsi wahamatia, muxatsi xeiwiyari memihitika wahamatia pekanitimawamiki hatsite meta kaxie winuyari mitiyeuriyani, yuxexuiti kememiteheiyehiwa.

28 Metatsiere xeime tsipu pekanitimawamiki mi'itiyaniki mawariyari, mawarika taiyariyari yamitiutiwewiwa meta hatsite mawariyari meta kaxie winuyari mitiyeuriyani.

29 »'Ataxewirieka tukari 'atahaika tsikerutsixi pekanipayurimiki, yuhutame muxatsi 'ukitsi meta tamamata heimana nauka muxatsi xeiwiyari memihitika 'aixia memi'anene memikatekukuye.

30 Tsikerutsixi wahamatia meta muxatsi 'ukitsi wahamatia, muxatsi xeiwiyari memihitika wahamatia pekanitimawamiki meta hatsite mawariyari meta kaxie winuyari mitiyeuriwa, yuxexuiti kememiteheiyehiwa.

31 Metatsiere xeime tsipu mi'itiyaniki mawariyari heutinikame, mawarika taiyariyari yamitiutiwewiwa meta hatsite mawariyari meta kaxie winuyari mitiyeuriyani heutinikame.

32 »'Atahutarieka tukaritsie 'atahuta tsikerutsixi pekanipayurimiki, yuhutame muxatsi 'ukitsi meta tamamata heimana nauka muxatsi xeiwiyari memihitika 'aixia memi'anene memikatekukuye.

33 Tsikerutsixi wahamatia meta muxatsi 'ukitsi wahamatia, muxatsi xeiwiyari memihitika wahamatia pekanitimawamiki meta hatsite mawariyari meta kaxie winuyari mitiyeuriyani yuxexuiti kememiteheiyehiwa.

34 Metatsiere xeime tsipu pekanitimawamiki mi'itiyaniki mawariyari, mawarika taiyariyari yamitiutiwewiwa meta hatsite mawariyari meta kaxie winuyari mitiyeuriyani heutinikame.

35 »'Atahairieka tukari 'ixiarari patsiekameki memuyukuxexeiriwatsie, 'ana xewiti pikati'uximayaka.

36 Mawari taiyariyari pemiwewieniki Yawé witsimu'ia minake, xeime tsikeru pekaniyurimiki meta xeime muxa 'uki metatsiere 'atahuta muxatsi xeiwiwari memihitika 'aixia memi'anene memikatekukuye.

37 Tsikeru hamatia meta muxa 'uki metatsiere muxatsi xeiwiwari memihitika wahamatia pekanitimawamiki hatsite meta manutiniire kememiteheiyehiwa.

38 Metatsiere xeime tsipu pekanitimawamiki mi'itiyaniki mawariyari pekatihayewati mawarika yapemititiwewiwa tukariki, hatsite mawarikayari meta kaxie winuyari mitiyeuriyani.

39 »'Iki mawarika kanihikitini Yawé het-siemieme pemutiwewiwani kemi'ane tukaritsie mika'iniaritika, hipatita tsepa kememiteyihiritia memiwewirie, kememiteyuwairiya wamawarika, mawari taiyariyari, hatsite mawarikayari, kaxie winuyari mitiyeuriyani meta 'aixia memiteyuxeianiki mawariyari».

40 Hiki Muiisexi Yawé kemitita'aitiakai naime 'ixaheritsixi yakatiniwarutahiawe.

30

'Ukarawetsixi kememiteyuhiritia

1 Muiṭsexi mipai katiniwarutahiawe 'Ixaheri nuiwarieyatsie memanuyetei: «Yawé mipai kanaineni kename

2 kepauka 'uki Yawé hetsiemieme muyuhiritia tixaiti mitiyetuaniki, yarehiaweti kename yatikayani, miki pikatiku'itawani matsi keheye'atiani kemutayi.

3 »Kepauka 'uka 'iimari, yupaapa kie 'ukaiti 'akuxi Yawé hetsia muyuhiritia yamitikayaniki,

4 xika paapaya retimaime 'atsikatitahiawe, miki kemitiyuhiritiakai naime katinaye'atiamiki.

5 Peru xika paapaya retimaimetiti yakatiutanaki'erieni kemitiyuhiritiakai yamitikayaniki, naimeki kemutayikai tixaiti pikarayani, Yawé katineiyehiwiriemiki paapaya yamikatiutanaki'eriki.

6 »Xika 'uka 'utiwikieni yuhiritiame yamitikayaniki, xika kahayuye'erieni,

7 xika kinaya retimani peru xika 'atsikatitahiawe ka'itatieni, miki kaneye'atiamiki kemitiyuhiritia.

8 Peru xika kinaya retimaime yakatiutanaki'erieni, miki kemitiyuhiritiakai tixaiti pikarayani Yawé katineiyehiwiriemiki.

9 »Wiura yatini 'eiriyakame kemitiyuhiritia kaneye'atiamiki.

10 »Kepauka 'ukaratsi wikiekame tixaitiki mitiyuhiritia yamitikayaniki,

11 xika kinaya retimaime 'atsikatitahiawe ka'itatieni, miki kaneye'atiamiki naime kemitiyuhiritia.

12 Peru xika kinaya retimaime 'ita'imaiya, hiki miki pikayiwe meye'atianiki xeimetima

kemitiuyuhiritia, kinaya yamikatitanaki'eriki.
Yawé katineiyehiwiriemiki.

¹³ »Kinaya heitserie kaneixeiyani
yamitayiniki yatini yamikatitanaki'erieniki titaki
mitiyuhiritiakai Yawé hetsia.

¹⁴ Xikata kinaya retimaimetiti kayuwati
'uyeikani, 'atsimikahaineki kani'iniaritini
kename yara'eriwa kemitiuyuhiritia. Kunaya
yara'eriwati kaniyanemiki 'atsimika'utayiki
kepauka miretima.

¹⁵ Xikata retimaimetiti 'arikeketa 'uta'imali,
miki hetsiena katinahuimiki yi'iya hetsiemieme».

¹⁶ 'Iki 'aitsika Yawé Muitsexi kaniyetuirieni,
kememi'aneniekai yikinamati yi'itati
kememi'aneniekai meta 'uki 'uka munuarie
kememi'aneniekai mexi hetsiana 'ukani.

31

Mariyani kememite'utami

¹ Yawé Muitsexi mipai katiniutahiawe:

² «Mexi pekamiwe, 'apaapama wahetsia
pekaheyiwe, mariyanitsixi pekaniwatakwiniki
pekatinuwakuhiwieriemiki 'ateiterima
wahetsiemieme».

³ Muitsexi 'ixaheritsixi mipai katiniwaru-
tahiawe: «Xekeneuyukuha'aritia hipati temuhuki
mariyanitsixi temuwatakwiniki. Miki wahetsie
Yawé katinayukatuamiki.

⁴ Yuxexuiti 'Ixaheri nuiwarimama xeimiriyari
yuteiterima mekewareniaxiani».

⁵ 'Ixaheri nuiwarimama yuxexuiti
mekaniwareniaxiani xeimiriyari yuteiterima,

yunaiti mekanakine tamamata heimana huta miriyari (12.000) 'ukitsi memuyukwiyuki.

⁶ Muiťsexi kaniwareni'ani tamamata heimana huta miriyari 'ukitsi. Wahamatia kaneyani Pinexi mawari wewiwame nu'aya 'Eriyatsaxi, mihiritiariakai piinite tukita timieme metatsiere kuxineta mutahitsiwaniki kepauka memuyutakwini hetsiemieme.

⁷ Yawé Muiťsexi kemitiuta'aitiakai, 'ixaheritsixi mekaniuyutakwini, mekaniwarukwini yunaime 'ukitsi mariyanitsixi.

⁸ 'Ewi, Xekeni, Tsuxi, Kuxi meta Xewa mariyani kwieyaritsie yu'aixiwiti memite'aitamete 'ixiparaki mekaniukwi'iwa, metatsiere Warami Wehuxi nu'aya mekaniumieni.

⁹ 'Ukarawetsixi mekaniwarutiwiya meta tiiri mariyanitsixi waniwema, wa'iwarika mayaniki wawakaitsixi mekaniwarehapani, wamuxatsi meta wapiinite.

¹⁰ Mariyanitsixi wakiekari meta memukutetikateitsie naime mekateniutitaiya,

¹¹ yunaime teiteri mekaniwarehapani meta tewaxi. Naime tita memite'u'axixi meta tita mitiwapiinitikai

¹² Muiťsexi meta mawari wewiwame 'Eriyatsaxi mekateniyetuirieni meta yunaime 'ixaheritsixi. Yunaime memiwarehapa meta tita memite'u'axixi mekatenepini memakuteitsie Muhawi makuweritsie, haa manuyehane Kurutani 'aurie, metatsiere Keriku hixie.

¹³ Muiťsexi, mawari wewiwame 'Eriyatsaxi hamatia meta yunaiti 'ixaheri kiekariyaritsie

memanuyetei mekanayekine mewareunakiyuka
'ateewa mematiteitsie.

¹⁴ Muiťsexi waikawa kaniha'akaitini xeimiri-
yari wa'ukiyari wahetsia xeitsienituyari xeikia
memanuaxiaki.

¹⁵ Mipai katiniwaruta'iwawiya: «¿Titayarikuta
'ukarawetsixi xekatewarekwi?

¹⁶ Miki 'ukarawetsixi Warami
kemitiwakuxaxatiwakai 'axawayurieti,
'ayumieme 'ixaheritsixi Yawé mepuku'eirie
Wahari-Pehuxi pita memayexeiyaniki.
'Ayumieme Yawé teiterimama mekanuikwini
kwiniyaki.

¹⁷ Yunaimetiiri xekeniwarukuya metayunaimeti
'ukarawetsixi memimayiyatika,

¹⁸ kaniyiweni hirixia 'ukari memikamayiyatika
xemiwarewitini.

Ke'aixia memiteyu'itiekaiteyukwikate metamanutaxiriwa

¹⁹ »Yunaiti kemi'ane hipame memiwarekwi,
yatini kemi'ane mikite memiwaremayia, 'ateewa
meniyuhayewakuni xematiteitsie 'atahuta tukari.
Hairieka tukari 'anukamiekaku meta 'atahuta
tukari 'anukamiekaku, xekaniyu'itiekuni meta
kemi'ane xemiwaretiwi.

²⁰ Metatsiere yukemarite mekaniti'ekwakuni,
metanawiki mitiwewiyatika, tsipuri wahuxari
'ikariyari, yatini kiyeki mitiwewiyatika».

²¹ 'Eriyatsaxi mawari wewiwame mipai katini-
warutahiawe kuyaxi kemi'ane memeyukukwikai:
«Mipai kanaineni 'iniari niukiyari Yawé Muiťsexi
miyetuiri:

²² Huru tepiyari, pirata, purunitse, tepia, 'Etsi-
taniyu, purumu,

23 naiti tita tai mitinewiwe, taipa katineuxiriyamiki miti'itiyaniki, perutsiere haa mitiyu'itiwaki kanitihauxinariemiki. Tita tai mikatinewie miki hakiki xeikia 'aixia kaniti'itiariemiki.

24 'Atahutarieka tukaritsie, 'ana xeme yukamixate xekateniti'ekwakuni 'ana xe'itiyati xekaniyuhayewakuni. 'Anake yunaiti mematitei xekani'axiakuni».

Tita memiteha'iwaxi kememiteyutapitiani

25 Yawé Muitsexi mipai katiniutahiawe:

26 «'Eki meta mawari wewime 'Eriyatsaxi meta 'ukirawetsixi 'ixaheritsixi xekaniwati'iniatakuni teiteri memutiwiyarie meta tewaxi.

27 Xekateniwatapitiakuni kuyaxi memiteha'iwaxi kemi'ane memeyukukwi meta yunaiti kiekatari yaxeikia tipapaimeme.

28 Kemi'ane memeyukukwi mipai pekatini-watahiawimiki memite'a'iwaxi hetsie Yawé hetsiemieme memenaka'iniki. Teiteri yunaime tewaxi puxuri, wakaitsixi, muxatsi, xeime pekananakahanimiki 'auxiwime tsienituyaritsie.

29 Ketipaimeme memite'uta'axixitsie kuyaxi mana pekaniwaranakahapaniriexiamiki, mawari wewiwame 'Eriyatsaxi pekatiniyetuiriemiki 'imikieri mayaniki Yawé hetsiemieme.

30 'Ixaheritsixi ketipaimeti wahetsie mitikunanake, yuxexuime pekatiniwareukuha-paniriemiki huta tewiyari heimana tamamatat-sie, 'imarixi yaxeikiata wapuxuri, wakaitsixi, muxatsi tsepa tita tewayari, miki rewitsixi pekatiniwayetuiriemiki, miki netuki memi'iwiya memihikiki».

³¹ Muitsexi meta mawari wewiwame 'Eriyatsaxi yamekateniuyurieni Yawé Muitsexi kemitiuta'aitia.

³² Kuyaxi tita memitehepikairi kati'iniariti, tita memite'a'iwaxi katinihikitikaitini 'ataxewime tsienituyari heimana haika tewiyari heimana tamamata heimana 'auxiwime miriyari (675.000) muxatsi,

³³ haika tewiyari heimana tamamata heimana huta miriyari (72.000) wakaitsixi,

³⁴ haika tewiyari heimana tamamata heimana xewi miriyari (71.000) puxuri

³⁵ metatsiere xeitewiyari heimana tamamata heimana huta miriyari (32.000) 'ukari 'ukitsi wahamatia memikakahiwawe.

³⁶ Kemi'ane memeyukukwi mipai tipaimeme mekatenehini:

Haika tsienituyari heimana xeitewiyari heimana tamamata heimana 'atahuta miriyari, heimana 'auxiwi tsienituyari (337.500) muxatsi,

³⁷ Yawé hetsiemieme mekaniyetuiyani 'ataxewime tsienituyari heimana haika tewiyari heimana tamamata heimana 'auxiwi (675).

³⁸ Xeitewiyari heimana tamamata heimana 'ataxewime miriyari (36.000) wakaitsixi, meta Yawé hetsiemieme mekaniyetuiyani haika tewiyari heimana tamamata heimana huta.

³⁹ Huta tewiyari heimana tamamata miriyari heimana 'auxiwime tsienituyari (30.500) puxuri, mekaniyetuiyani Yawé hetsiemieme haika tewiyari heimana xewi.

⁴⁰ Tamamata heimana 'ataxewime miriyari (16.000) 'ukari, Yawé hetsiememeta mekaniyetuiyani xeitewiyari heimana tamamata heimana huta.

⁴¹ Yawé hetsie m̄timiemet̄ikai, M̄itsexi mawari wewiwame 'Eriyatsaxi katiniyetuirieni Yawé kem̄tiwaruta'ait̄iakai.

⁴² Kuyaxi mem̄iteha'iwaxi mem̄ite'atia, M̄itsexi hix̄iata ti'akame 'ixaheritsixi katiniwayetuirieni,

⁴³ 'ayumieme 'ixaheritsixi wahetsiemieme katinayani haika tsienituyari heimana xeitewiyari heimana tamamata heimana 'atahuta miriyari heimana 'aux̄iwime tsienituyari (337.500) mux̄atsi,

⁴⁴ xeitewiyari heimana tamamata heimana 'ataxewi miriyari (36.000) wakait̄sixi,

⁴⁵ xeitewiyari heimana tamamata miriyari heimana 'aux̄iwi tsienituyari (30.500) pux̄uri

⁴⁶ metatsiere tamamata heimana 'ataxewi miriyari (16.000) 'ukari.

⁴⁷ 'Ixaheritsixi wahetsiemieme mir̄atia, M̄itsexi huta tewiyari heimana tamamata tēiteriyaritsie yux̄exuime kaniwareukuha-panirieni meta huta tewiyari heimana tamamatatsie yux̄exuime tewaxi, yemeki Yawé kem̄itita'ait̄iakai, hiki miki tinaime mep̄iteyetuiriyarie rewitsixi, Yawé tukieya mem̄ih̄irit̄iariekai.

Kuyaxi tewa'ait̄iwamete wamawarika

⁴⁸ Hiki tēiteri kuyaxi mem̄ih̄irit̄iarietika, tats̄iari xeimiriyari mem̄ih̄irit̄iarietika meta

xeitsienituyari memihiritiarietika, Muitsexi hepa me'ukineka

⁴⁹ mipai mekatenitahiawe: «'Ani'arima yukuyaxima mekaniwaruti'iniata, nixewiti pikaheuyewetse keyupaimeme temuhiritiari.

⁵⁰ 'Ayumieme Yawé hetsiemieme mawari tepiwewie, ketita temiteyetuaxia hurute taxexuiti: mamatsiemieme, tepia kukari huru matsiwayari, kuka menawutia meta kukate. 'Iki naime tepite'atiwa temixinarieniki mawariyari Yawé hixie».

⁵¹ Muitsexi meta mawari wewiwame 'Eriyatsaxi mekatenanupini tiwaikawame huruki mitiwewiyatika.

⁵² Huru yunaiti memiyetia xeimiriari memiwaruwitiki meta xeitsienituyari mawari Yawé hetsiemieme mayaniki kanayani xeitsienituyari heimana nauka tewiyari heimana tamamata kiruyari.

⁵³ Yuxaxaitatati kuyaxi yu'iwarika mekani'atixiakaitini.

⁵⁴ Muitsexi meta mawari wewiwame 'Eriyatsaxi naime miki huru mekatenanupini kuyaxi tewa'aitiwamete memitewayetui, hiki mekaneitini 'ixuriki tukiwarita muwa Yawé 'ixaheritsixi yamitiwara'eriwaniki.

32

Xuweni meta Kahari Kurutani hatuxameyari 'anataiye memuyuhayewaxi

¹ Xuweni nuiwarieya meta Kahari tewaxi mepuwarexeiyakai yemeki waikawa, mekaniuneniere Katsexi kwieyaritsie meta

Karaha, mana 'aixia miraku'anekaiki tewaxi wahetsiemieme.

² 'Ayumieme Muitsexi mipai mekateniutahiawe meta mawari wewiwame 'Eriyatsaxi meta yunaime 'ukirawetsixi 'ixaheritsixi:

³ —'Ataruti kwieyari meta Riwuni, Katsexi, Nimira, Hetsiwuni, 'Eraré, Tsewani, Newu metatsiere Wehuni,

⁴ Yawé tatsiparewiekaku mana tepitehayu'iwaxi 'ixaheritsixi wahetsiemieme mayaniki, 'ayumieme 'aixia pi'ane 'iki 'ateiterima watewama wahetsiemieme.

⁵ Xika yapera'eriwani ketaneupitia miki takwie temayeitianiki. Tame pepikatatsi 'anuwitikini hapa Kurutani hatuxameyaritsie 'anutaie paiti.

⁶ Hiki Muitsexi mipai katiniwarutahiawe Xuweni nuiwarimama meta Kahari:

—¿Kamitsi 'aixia ti'ane xe'iwama xeikia memuyukwitiweni xemeta 'ena xetetiteni xeikia?

⁷ 'Ixaheritsixi mipai meputiyuane kwie Yawé miwayetuiritsie mepiye'axiani, xika mipai xe'uyini miki xekayuwairiyati xepakine.

⁸ Mipai mekaniiyinitiere xe'ukiyarima kepauka ne nemiwareni'a kwie memixeyayuki Karetsi-Waxineya.

⁹ Mekanekine kwie mekanexeiya mayeweri 'Etsikuri, kepauka memu'axia, mekaniwarutiweranariya 'ixaheritsixi, Yawé kwie hakewa miwareyetuiri mana memikaye'axianiki.

¹⁰ Miki tukaritsie Yawé waikawa kaniuyeha'ani yuriki mipai kaniutayini:

¹¹ “Yu'iyariki xemikanetsi'u'eniki, nixewititima xeitewiyari wiyari heimana mexeiya 'Ekipitu

memiyeki kwie kapixeiya 'Apirahami, 'Itsahaki meta Kakuwu nemiwaruxatia.

¹² Mekanixeyakuni xeikia Karewi Kepune nu'aya Keni tewiyari, mikiri Kutsuhexi Nuni nu'aya, miki xeikia yu'iyariki meka-neni'eniekaitini, hipatiri hawaiki mekapixeiya”.

¹³ Yawé kaniuyeha'ani waikawa 'ixaher-itsixi wahepaitsita, makumawetsie meka-niu'uwakaitini huta tewiyari wiyari, kepaukake memukwi miki yunaiti 'axamemite'uyurie kai.

¹⁴ »Xemeta hiki 'axateyuruwamete, yaxeikia xekateniyurikuni xepaapama wahepai Yawé haxiaya tawarita xekaniniitiakuni 'ixaheritsixi wahetsiemieme.

¹⁵ Xika xeme xeka'uyuwairiya Yawé kemaine, mikita yaxeikia makumawetsie 'iki teiteri kaniwatixirimiki, xemetsi teiteri xekaniwaka'unakuni».

¹⁶ Hutarieka miki Muitsexi mipai mekateniu-tahiawe:

—Kuraru tepitiwewieni tatewama wahet-siemieme, meta kiekari tepitiwewieni taniwema wahetsiemieme.

¹⁷ Hiki ta'iri teti'ime tepanuyeyaxe 'ixaheritsixi wahixie muwapaiti tepiwareye'atiani hakewa paiti memeyuhayewa. Taniwema peru 'aixia kiekaritsie metheukutekaku wahetsie munuakaki mana kiekatari mewarukwiniki.

¹⁸ Takie kwitiwa tepika'akunuaxiani kepaukake 'ixaheritsixi yunaiti yukwie meme'axe.

¹⁹ Tame miki wahamatia tixaiti tapiini tepikatehayeitiani haa manuyehane Kurutani 'anutaiye timieme, tame tahetsie timieme 'ena

pita pitikupine haa manuyehane tau manatineika hepatsie.

²⁰ Muitsexi mipai katiniwarutahiawe:

—Xika xeyuwairiyani mipai xemuyini, yu'iri xeketeneutipika hikimitika tekaniyukwiyuni.

²¹ Xekenanukini Kurutanitsie yu'iri xete'upiti, Yawé xeparewiekaku xekeneuyutakuya kepaukake yunaime xemiwara'iwa.

²² Kepauka Yawé kwie mitatsiyetuirienitsie, hiki 'ana xekanakunuaxiakuni yukie, mipai xeyime xekatenaye'atiakuni Yawé hetsiemieme metatsiere 'ixaheritsixi wahetsiemieme. Yawé mixehetimaki 'iki kwie xehetsiemieme payani.

²³ »Peru xikata xeyuti'imali, mipai xeketenemaika 'axaxekateniyurieka Yawé hetsiemieme. Peru xepikateheuyehiwiarieni 'axaxemite'uyuriki.

²⁴ Xekeneutiwewi kiekari xeniwema wahetsiemieme, meta kuraru xetewama wahetsiemieme, meta xekatenaye'atiakuni kexemutiyua».

²⁵ Kahari nuiwarimama meta Xuweni nuiwarimama mipai Muitsexi mekateniutahiawe:

—Tame 'ani'arima yatekateniyurikuni Yawé kemiti'aia.

²⁶ 'Ena Karaha kiekariyaritsie mekaniyuhayewakuni taniwema, tawakaitsixi meta tamuxatsi,

²⁷ peru tame 'ani'arima tekananikinikuni Kurutanitsie ta'iri te'u'iti tekaniwatakwikuni Yawé memaye'unie, miki kemiti'aia.

28 Hiki Muitsexi mawari wewiwame 'Eriyat-saxi mipai katiniutahiawe, meta Kutsuhexi Nuni nu'aya metatsiere 'ixaheritsixi 'ukirawetsixi:

29 —Xika Kahari meta Xuweni wanuiwarima Kurutanitsie yu'iri me'u'iti me'anukine memuyuk-wiyuki kwie xemi'axeki, Yawé kemaine, xeme xekaniwayetuiriekuni 'iki kwie Karaha kwieyari.

30 Xikata meka'anukine, miki kwie mekani'axikuni xehamatia Kanani paiti.

31 Kahari meta Xuweni wanuiwarima mipai mekaniutiuyuani:

—Tame 'ani'arima yatepitekakine Yawé kemaine.

32 Miki kemaine, tekananikinikuni ta'iri te'u'iti Kanani kwieyaritsie. Tapiini mirayani peru 'uwapita katinikupika Kurutani 'anataiye.

33 Hiki Muitsexi kaniwayetuirieni Kahari meta Xuweni nuiwarimama, metatsiere Manatsexi Kutse nu'aya nuiwarimama hixiapa memi'axe, ti'aitame Tsikuni kwieya 'amuxeutsixi tiwa'aitiwame, ti'aitame 'Uhuki kwieya Watsani kiekariyaritsie ti'aitame. Niwayetuirieni kwie kemiyeukai naime kiekari mana mukumanekai, tatsiari kiekari naime miki kwieyaritsie mimiemetikai.

34 Kahari nuiwarimama kiekari mekaniuti-wewieni Riwuni, 'Ataruti, 'Aruhexi,

35 'Ataruti-Tsupani, Katsexi, Yukiweya,

36 Weti-Nimira metatsiere Weti-Arani. Kiekari 'aixia mi'anene hepai mekateniwewieni metatsiere kuraru mekaniutiwewieni muxatsi wahet-siememe.

37 Metatsiere mekanitiwewieni kiekari Hetsi-wuni, 'Eraré, Kiriyatahini,

³⁸ Newu, Wahari-Mekuni metatsiere Tsiwima, mekanipataxi ani kemititetewakai.

³⁹ Makixi nuiwarimama Manatsexi nu'aya Karaha mekananikine mekane'iwa, mana memititekai 'amuxeutsixi mekaniwarukwini.

⁴⁰ Hiki 'ayumieme Muitsexi Makixi Kutse nu'aya Manatsexi nuiwarimama miki Karaha kwieyari kaniwayetuirieni, miki mana mekaniyuhayewa.

⁴¹ Meta Yahixi Manatsexi nu'aya hipame kiekari kaniwara'iwa, miki Kawuti-Yahixi katiniuteriwa.

⁴² Nuwa Kenati kana'iwa meta nuiwarimama 'auriena mamanetika, miki kwieyari yuhepai katiniuteriwa.

33

'Txaheritsixi kememite'iki

¹ Kepauka 'ixaheritsixi 'Ekipitu memayeki Muitsexi meta 'Aruni mewaruwitiximekaku, mekanihukaitini yunaiti kuyaxi wahepai.

² Yawé Muitsexi ti'aitiakaku katinaka'utiwakaitini hakewa memeye'axekai hakewa memekikakai. Mipai mekateniikine:

³ Mexiakame metseritsie tamamata heimana 'auxiwi 'umiekaku, xeitukari 'anukamiekaku Patsikwa 'ixiarariyari me'uwewieka, mekanayekine 'ixaheritsixi Xamitsexi mirakutewatsie. Mete'ayu'iwaka 'ekipitutari wahixie mekanayekine,

⁴ miki mexixi yuniwema matiari miemete mewateukutiwekai, Yawé miwarukwikai kwiniyaki. Yaxeikiata yaputayikai kakaiyarixi 'ekipitutari wahepaitsita.

⁵ 'Ixaheritsixi Xamitsexi mekaniyekine, Tsukuti mekaniu'axiani.

⁶ Manata memiyeki Tsukuti, 'Etami mekaniu'axiani, makumawe kwieyari manuye'atika.

⁷ Manata memiyeki 'Etami, mekanakunuaxiani Pi-'Akiruti, Wahari-Tsepuni tau manatineika hepatsie, Mikiruri hixie mekaniu'axiani.

⁸ Manata memiyeki Pi-'Akiruti mekananukine haramaratsie makumawetsie mekaniu'axiani. Mana me'u'uwati makumawetsie haika tukari 'Etami mirakutewatsie Maraha mekanitiyaxe.

⁹ Manata Maraha memiyeki 'Erimi hepa mekanekine, mana kanitinenierekaitini tamamata heimana huta haixateyari meta haika tewiyari heimana tamamata taki 'amipapa mati'u, hiki mana mekanitiyaxe.

¹⁰ 'Erimi memiyeki Haramara Mixeta 'aurie mekaniu'axiani.

¹¹ Haramara Mixeta 'aurie memiyeki Tsini makumawetsie mekaniu'axiani.

¹² Makumawetsie Tsini memiyeki Ruka mekaniu'axiani.

¹³ Ruka memiyeki, 'Arutsi mekaniu'axiani.

¹⁴ 'Arutsi memiyeki, Xepirini mekaniu'axiani, hakewa 'ixaheritsixi haa memanuhareniki memikahexeyakai.

¹⁵ Xepirini memiyeki, Tsinahi makumawetsie mekaniu'axiani.

¹⁶ Makumawetsie Tsinahi memiyeki, Kiwuruti-Hatawa mekaniu'axiani.

¹⁷ Kiwuruti-Hatawa memiyeki, Katseruti mekaniu'axiani.

¹⁸ Katseruti memiyeki, Xima mekaniu'axiani.

¹⁹ Xima memiyeki, Ximuni-Peretsi mekaniu'axiani.

²⁰ Ximuni-Peretsi memiyeki, Riwina mekaniu'axiani.

²¹ Riwina memiyeki, Xitsa mekaniu'axiani.

²² Xitsa memiyeki, Tserata rakutewakaku mekaniu'axiani.

²³ Tserata memiyeki, Tsepexi hiriyaritsie mekaniu'axiani.

²⁴ Tsepexi hiriyaritsie memiyeki, Karara rakutewakaku mekaniu'axiani.

²⁵ Karara memiyeki, Makeruti rakutewakaku mekaniu'axiani.

²⁶ Makeruti memiyeki, Takati rakutewakaku mekaniu'axiani.

²⁷ Takati memiyeki, Teraki rakutewakaku mekaniu'axiani.

²⁸ Teraki memiyeki, Mitika rakutewakaku mekaniu'axiani.

²⁹ Mitika memiyeki, Katsimuna rakutewakaku mekaniu'axiani.

³⁰ Katsimuna memiyeki, Mutseruti rakutewakaku mekaniu'axiani.

³¹ Mutseruti memiyeki, Wene-Yakani rakutewakaku mekaniu'axiani.

³² Wene-Yakani memiyeki, Kikahari hiriyaritsie mekaniu'axiani.

³³ Kikahari hiriyaritsie memiyeki, Kutiwata rakutewakaku mekaniu'axiani.

³⁴ Kutiwata memiyeki, 'Awuruna rakutewakaku mekaniu'axiani.

³⁵ 'Awuruna memiyeki, 'Etsihuni-Kewexi rakutewakaku mekaniu'axiani.

³⁶ 'Etsihuni-Kewexi memiyeki, Karetsi mekaniu'axiani Tsini makumawetsie.

³⁷ Karetsi memiyeki, Huxi hiriyaritsie mekaniu'axiani 'Erumi kwieyari manuye'atika.

³⁸ Yawé yahainekaku 'Aruni Huxi hiriyaritsie nanutiyani, mana kaniumi mexiakame tukaritsie 'auxiwiriekame metseritsie, huta tewiyari wiyari 'anuyemiekaku kepauka 'ixaheritsixi memayeki 'Ekipitu.

³⁹ 'Aruni kaniumi Huxi hiriyaritsie xeitsien-ituyari heimana xeitewiyari heimana haika (123) wiyari hiti.

⁴⁰ Ti'aitame kananeu tewiyari 'Arari miti'aitakai, Nekexi kiekame Kanani kwieyaritsie meta 'Ara, katinetimani kename 'ixaheritsixi 'ahurawa me'uhukai.

⁴¹ Huxi hiriyaritsie memiyeki, Tsarimuna rakutewakaku mekaniu'axiani.

⁴² Tsarimuna memiyeki, Pununi rakutewakaku mekaniu'axiani.

⁴³ Pununi memiyeki, 'Uwuti rakutewakaku mekaniu'axiani.

⁴⁴ 'Uwuti memiyeki, 'Iye-'Awarini rakutewakaku mekaniu'axiani, Muhawi kwieyari manuye'atika.

⁴⁵ 'Iye-'Awarini memiyeki, Riwuni Kahari rakutewakaku mekaniu'axiani.

⁴⁶ Riwuni Kahari memiyeki hiki 'Arimuni-Riwuratahini rakutewakaku mekaniu'axiani.

⁴⁷ 'Arimuni-Riwuratahini memiyeki hiki 'Awarini hiriyaritsie mekanitiyaxe, Newu mirakutewa 'aurie.

⁴⁸ 'Awarini hiriyaritsie memiyeki, Muhawi makuweritsie mekaniu'axiani, Kurutani 'aurie, Keriku hixie.

⁴⁹ Kurutani 'utima mekanikuyaxe Weti-

Yetsimuti meye'atikaiti 'Aweri-Tsitini me'uniereti,
Muhawi kwieyari makuweritsie.

Kememite'utahiawarie
memixatariiekaisie mieme

kwie

⁵⁰ Muhawi makuweritsie, Kurutani 'aurie,
metatsiere Keriku 'aurie, Yawé Muitsexi mipai
katiniutahiawe:

⁵¹ «'Ixaheritsixi mipai ketiniwarutahiawi,
kepauka Kurutanitsie memanikine kepauka
Kanani memiye'axiani,

⁵² yunaime mana kiekatari mekani-
warayeweyakuni yunaime wakakayarixima
memixixiyatika meta tepiaki memiwewiyatika
mekaniwaka'unakuni. Metatsiere keni-
waruta'aitia watukite memiti'unaki,

⁵³ xika xetehayu'iwa mana xepitiyaxe miki
kwieyaritsie nemixeyeturi.

⁵⁴ Miki kwie pekaniwatawiyatsitiamiki
'iniariki, 'iwamarixi hikia meke'ukuyaxixiani.
Kemi'ane nuiwari kwinimieme memiyipaimeni
miki matsi kwie 'ayeukame mekani'axikuni,
metatsiere kemi'ane yaki memiyupaimeni miki
'etsiyeume mekani'axikuni. Kemi'ane 'iniariki
memi'axe miki tiwapiini katinayeimiki, yunaiti
nuiwari kememiyupaimeni mipai yeyeukame
mekani'axikuni.

⁵⁵ »Xikata xekawarayeweiya mana kiekatari
hakewa xemetiyaxe, xika pita mana
xewaruhayewa, miki teiteri 'uxa'awarie
mekanixe'uximatiakuni, xehixita mireuwiwieni
hepai yatini xuya xe'akita maweni hepai.

⁵⁶ Hiki ne 'anapita kexemiwayurienikekai xe-
mepita mipai nekanixeyurimiki».

34

Kanani kwieyari mata'atikatsie

¹ Yawé Muiteuxi mipai katiniutahiawe:

² «'Ixaheritsixi memitemaikaki mipai ketiniwarutahiawi Kanani kwieyari hakewa meuye'atika, kwie xehetsiemieme mayani, mana kaniuye'atikani:

³ »Tahetia manuye'atikatsie kanitsutikamiki Tsini makumawetsie, 'Erumi kwieya mata'atikatsie. Tau manatineikatsieta, Haramara Mimiki mayema manuyeniere tahetia manuye'axe mana katinawiyakamiki.

⁴ Manata miyeyani xekwie manuye'atikani, tau makayuyupike hepatsie, Terikaxi mematihet-sie wahapa, makumawe Tsini kaniuyeyeimiki Karetsi-Waxineya paiti, Katsaxi-'araxi meta 'Atsimuni kaniye'atikaimiki.

⁵ Manata 'Ekipitu 'akiyaritsie kaneukayunimiki haramara Meritexaniyu mata'atika miye'aniki.

⁶ »Kwie manuye'atikani tau makayuyupike hepatsie mieme haramara mata'atika tetsita kaniuye'atikaimiki.

⁷ »Kwie manuye'atikani tayeta manuye'atikatsie haramaratsie heukaweti hiri 'Uxi mititewatsie,

⁸ manata 'Uxi miyeyani Rewu Kamati paiti. Manata miyeyani Tserari kaniye'amiki,

⁹ manata miyeyani Tsipuruni paiti, Katsaxi-'Enahani mirakutewatsie kaniuye'amiki. Xekwie manuye'atika miki kanayeimiki tayeta muyekatsie.

¹⁰ »Xekwie manuye'atikani tau manatineika hepatsie mieme, Katsaxi-'Enahani kanitsutiamiki, Tsepani mirakutewatsie kaniukayeimiki.

¹¹ Tsepani miyeyani Xiwira kaneukayunimiki, 'Ahini tserieta mukuma, mana miyeyani tau manatineika kaneutayunimiki harakuna Kinereti tet-sitayaritsie ye'anike,

¹² manata Kurutani hatuxameyari 'utima kaneukayunimiki, Haramara Mimiki mititewatsie kaniye'amiki.

»Miki naukati xekwieyari manuye'atika kanayeimiki».

¹³ Muitsexi 'ixaheritsixi mipai katini-waruta'aitiani: «'Iki kwie kanihikitini xeyu'iwatiweti xemitawiya. Yawé mipai kanaineni 'atanauka heimana 'imeriyu nuiwari xeikia mekanitawiyakuni,

¹⁴ Xuweni meta Kahari, metatsiere Manatsexi nuiwarimama hixiata me'ati yukwie memu'axixikiri.

¹⁵ 'Iki huta nuiwariyari heimana 'imeriyu yukwie mekanexeyakaitini tau manatineika hepatsie, haa Kurutani manuyehane 'aurie, Keriku 'anutaue, tau manatineika hepa».

Kwie kememiteyetuiriyarie

¹⁶ Yawé Muitsexi mipai katiniutahiawe:

¹⁷ «'Iki teiteri kwie memiyetuanu mekanihikitini wakwie mayaniki: mawari wewiwame 'Eriyat-saxi meta Kutsuhexi Nuni nu'aya.

¹⁸ Xemeta, xeime xekanitahawikuni yunuiwaritsie, mixeparewieniki kwie mixeyetuirieniki».

¹⁹ Kememitetetewakai memanuyetekai nuiwaritsie:

- Karewi Kepune nu'aya, Kura nuiwarimama wahetsiemieme,
²⁰ Tsamuhuri 'Amihuri nu'aya, Tsimihuni nuiwarimamatsie.
²¹ 'Erirari Kitsiruni nu'aya, Wenikamini nuiwarimamatsie,
²² Wukihi Kukiri nu'aya, Rani nuiwarimamatsie,
²³ Kaniheri 'Epuri nu'aya, hixiapa memi'axe Manatsexi Kutse nu'aya nuiwarimama wahetsiemieme.
²⁴ Kemuhuri Tsipitani nu'aya, manuyeka 'Epirahini Kutse nu'aya nuiwarimama wahetsie,
²⁵ 'Eritsapani Parinaki nu'aya, manuyeka Tsawuruni nuiwarimama wahetsie,
²⁶ Paritiheri 'Atsani nu'aya, manuyeka 'Itsakaxi nuiwarimama wahetsiemieme,
²⁷ 'Akihuri Tserumi nu'aya, manuyeka 'Atsexi nuiwarimama wahetsiemieme,
²⁸ Peraheri 'Amihuri nu'aya, manuyeka Nepitahari nuiwarimama wahetsiemieme.
²⁹ Yawé 'iki kaniwaruhiritiani kwie 'ixaheritsixi memiwayetuirieniki, Kanani kwieyaritsie.

35

Rewitsixi wakiekaritetsie

- ¹ Muhawi makuweritsie, haa manuyeka Kurutani 'aurie, Keriku 'anutaie, Yawé Muitsexi mipai katiniutahiawe:
² «Mipai ketiniwaruta'aitia 'ixaheritsixi kepauka memiteyeturiyarieni, rewitsixi kiekari mekaniwayetuiriekuni mana memititeniki, naime kwie 'auriena mahane.

3 Mipai 'ana rewitsixi mekaneixeyakakuni yukiekari mana memititeni meta kwie mekanexeyakakuni wamuxatsima meta yutewama wahetsie mieme.

4 »Kwie xemiwayetuirieni rewitsixi mana memitetihweniki kiekari 'aurie kanahanekamiki, kiekari kuraruyaritsie 'auxiwime tsienituyari heutatewakametsie.

5 Kiekari hakewa meye'atika, mana xekani'iniatakuni xeimiriari meturuyari tau manatineika hepatsie, hikiapitata xeimiriari meturuyari, tau makayuyupike hepata xeimiriari meturuyari metatsiere kiekari yeta meutiyunetsie xeimiriari meturuyari. 'Iki kwie kanayeimiki mana memitetihweniki yukiekari 'aurie.

6 »Kiekari rewitsixi memiyetuiriyarieni, 'ataxewiti kiekari yu'awiwietame kanakinimiki. Mana xewiti muyuti'awieta kaniywemiki tiuyumieme. 'Iki kiekari mi'ataxewi, tawarita 'akuxi xekaniwayetuiriekuni huta tewiyari heimana huta.

7 Naiti kanayeikani huta tewiyari heimana 'atahaika kiekari yukwie memitehatihweni heuyutinikame mipai xekateniwayetuiriekuni.

8 Kiekari kepaime 'ixaheritsixi rewitsixi mekiwayetuirieni yukwie memumikietsietiti mieme yuxexuiti nuiwarite, kememiyupapai meni mipai katini'iniatsiemiki. Tatsiari kemi'ane kwinie memiyupai meni waikawa kiekari mekaniyetuakuni, kemi'aneta nuiwari yakimemiyupai meni yakipaimeme kiekari mekaniyetuakuni».

Kiekari hakewa memeyuti'awiwietani

⁹ Yawé Muiťsexi mĩpai katiniutahiawe

¹⁰ 'ixaheritsixi mĩpai mĩtiwatahiaweki: «Kepauka Kurutani hatuxameyaritsie xemanukine, Kanani xemi'axiani,

¹¹ kiekari meke'utiwauni yu'awiwietame, miyĩweni muwa memiyu'awietaniki kemi'ane ka'imaime xeime mĩmieni.

¹² Miki tewi kaniyiwemiki muwa muyu'awietaniki tikihiwiyarieniki. Mĩpai pikamierieni mĩtiuyumi teiteri mekataxanet-sitiariewekaku.

¹³ »Kiekari 'ataxewiti kanayeimiki xemenuye-wauniki kiekari yu'awiwietame mĩhikitiniki.

¹⁴ Haikaťi kaniti'ukamiki Kurutani hatuxameyari manuyeka tau manatineika hepatsie, haikatita Kanani kwieyaritsie.

¹⁵ 'Iki kiekari 'ataxewiti yu'awiwietame kanayeimiki 'ixaheritsixi wahetsiemieme meta 'ateewa kiekatari, mana kiekatari yatini tsepa mana memikakiekatari. Kemi'ane mĩtiuyumi ka'imaime, miki kiekaritsie muyuta'una kaniyiwemiki.

¹⁶ »Xika xewiti tepiaki tiuyuwani, xika miki tewi muweiya 'umini, mĩtiuyuwa katiniyumiekametini, mikita ke'umierieni.

¹⁷ »Xika xewiti teteki xeime 'utuaxa, xika miki mutuaxie 'umini, mĩtiuyutuaxixi katiniyumiekametini, mikita ke'umierieni.

¹⁸ »Xika xewiti kiyeki tiuyuwani, xika miki mukuweiya'xia 'umini, mutiuyuwa katiniyumiekametini, mikita ke'umierieni.

19 Mumierie 'iwaya tiyumiekame pukuwaune.
Kepauka mikaxeiya kanimiemi.

20 »Xika xewiti xeime 'utamieyu 'umini yiki
ti'anemek, yatini tixaiti mireitahiwiriki yiki
tiku'eriwati,

21 yatini mihutsuki 'eye'unieti, kemi'ane
mimi katiniyumiekametini mikita ke'umierieni.
Mumierie 'iwaya tiyumiekame pukuwaune.
Kepauka mikaxeiya kanimiemi.

22 »Heiwa yakatiniuyiweni xewiti 'at-
sikara'eriwati xeime kanetaimamiki, yatini xeime
kaniutuaximiki,

23 yatini ka'imaimete tete xeimetsie
kaniukahiamiki, xikata miki tewi 'umini.
Miki memika'ayuye'uniekai, mika'ima
mitikwinitianiki,

24 hiki miki teiteri mekateniyurikuni, 'iki 'aitsika
kemaine mexeiyati, 'aixia mekateniyurikuni
mixanetsie hetsiemieme meta mixaneta
hetsiemieme,

25 teiteri hetsiena mirahiwa hetsie
mekanitanuakuni, mekanitatuakuni kiekari
muwayu'awieta tawarita munuaniki, muwa
keyuhayewani, mawari wewiwamete
tiwa'aitiwame hatseiti mipatsie mukawiriyarie
miyuke kaniwayeyeimiki.

26 »Xikata mukuweiyariene wayeyani kiekari
hakewa meyu'awieta kwieya maye'atika
'anayeyani,

27 meye'unie mimieni kaniyiwemiki, hetsiena
pikarahiyani xika mipai tiuyurieni 'ateewa paiti
'uyeikakaku.

28 'Ayumieme mukuweiyariene miki kiekaritsie keyuhayewani mayu'awietatsie kepaukake mimini mawari wewiwamete tiwa'aitiwame. 'Anake kaniyiwemiki munuaniki yukwietsie.

29 »'Iki 'aitsika ke'aye'atiariwani yunaime 'anuiwari wahetsiememe, tsepa hakewa xeme'uwa.

30 »Yuwaikawati xeikia yamehaitikaikaku piyiweni xewiti mumierieni mitiuyumi. Xewiti xeikia yahainekaku pikayiwani xewiti mimierieni.

31 »Yapepikatinaki'erieka mitawikweitsitarieniki kemi'ane mimierieniki hetsiena mitiunakixi. Miki ke'umierieni.

32 »Metatsiere yapepikatinaki'erieka mirayukatuayani muyu'awieta yukwietsie munuaniki mawari wewiwamete tiwa'aitiwame kamiwekaku.

33 »Kwie xemanu'uwatsie xepikatsewiximaka. Xuriya kepauka mitayeuriyani kwie ka'itiyati kanayeimiki, kemi'ane xuriya mutayeuri miki xuriyayaki xeikia kwie kani'itiyamiki.

34 »Kwie ka'itiyakame pepika'ayeitiaka hakewa pemeyeikatsie, neta mana nekaniuyeikani, kariki ne Yawé nekanihikitini 'ixaheritsixi watsata nemuyeika».

36

*'Ukarawetsixi kwie kememite'umikie
(Inia 36:1-12 - Inia 27:1-11)*

¹ Karaha nuiwarimama wa'ukiyarima Muietsexi hetsia mekananukine meta hipame 'ixaheritsixi memanuyetei wahetsia. Karaha Makixi kaninu'ayatikaitini, Manatsexi teukarieya, miki nuiwari Kutse hetsie mekaniyekine.

² Mipai mekateniwarutahiawe:

—Kepauka Yawé mipai'uta'aitia kwie 'ixaheritsixi pemawayetuirieniki, metatsiere pimatsi'uta'aitia ta'iwa Tserupekari kwieya niwemama 'ukari pemawayetuirieniki.

³ Neuxei, xikata miki 'ukitsi mewarutiwitini xeime nuiwaritsie miemete, wakwie meta tanuiwaritsie miemetikai miki kemi'ane nuiwaritsie miemete memiwarutiwiti miki wakwie pitari kanayeimiki. Hikitari tame takwie tekaneuyehipani yayeume pemitatsiyeturi.

⁴ Kepauka maye'ani mematatuiwa wiyariyari, miki kwie kemi'ane nuiwaritsiemiemete memiwaruwitiki miki wahetsiemieme kanayeimiki, tametari takwie tekaneuyehipani taniwema wahetsiemieme.

⁵ Hiki Yawé yahainekaku, Muitsexi 'iki 'aitsika 'ixaheritsixi kaniwayetuirieni:

—Kutse nuiwarimama heitseriekameki mekaniutiyuaneni.

⁶ Tserupekari niwemama 'ukari, wahetsiemieme Yawé mipai katina'aitani: Miki mepiyiwawe tsepa kemi'ane memiwarutiwiti, perutsi Kutse nuiwarieya hetsie xeikia.

⁷ 'Ixaheri kwieyaritsie mipai pikatiyianeni kwie xeinuiwaritsie mieme tawarita xeime nuiwaritsiemieme pika'ayeikani, yuxexuititsi 'ixaheritsixi mekaneixeyani yuhiritiarika memi'iwianiki yukwie watutsima memiwayeturi.

⁸ Yunaiti 'ukari tsepa kemi'ane nuiwariyari, kwie xika 'umikieni, 'uki ke'utiwitini yunuiwaritsie mieme. Mipai xika xe'aneni xeyunaiti 'ixaheritsixi xekaneixeyakakuni yukwie xepaapama memixe'umi.

9 Xewiti kwie xeime nuiwaritsie
pika'uyuyupikeni, yuxexuiti nuiwari 'Ixaheri
hetsiemiemete meke'i'iwiyani yukwie
memumikie.

10 Hiki Tserupekari niwemama
yamekatenikakine Yawé Muiťsexi
kemiťiuta'atiakai.

11 Mipai mekatenitetewakaitini 'ukari: Makira,
Tiriṭsa, Kukira, Mirika meta Nuha. Miki yu'iwama
yateewa mekaniwarutiwitini,

12 Manatsexi Kutse nu'aya nuiwarimama
wahetsiemiemete, mipai 'ana wakwie
wahetsiemieme kaniuyuhayewa meta miki
nuiwari hetsiemieme.

13 'Iki 'aitsika meta 'iniari niukiyari kanihiťitini
Yawé 'ixaheritsixi miwayetuiři, Muiťsexi
yatikihiawekaku, Muhawi makuweritsie haa
manuyehane Kurutani 'aurie, Keriku hiťie.

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition**

**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3